

Genesis

Ann Bokwakwarin

Kurereb Dura

Wab Genesis an yabin min “Ann Bokwakwarin” Atonio buk ekakasonet on mamaba safam a tafanam imamatar, orot jever an bosurufin, tafanamai bokomas a baikokosar an bosurufin a mamaba God an etai sabu auris ibobo on. Ann Bokwakwarin on fofonin kusebin dura ass ruam gagamis sinmatar:

1) Yayab kaitamom inai yayab auyotoat an yayatan kaitamom: Mamaba God safam a tafanam ifofourai on a ainau an dudur mamaba God orot jever ifouris tafanamai simama on. Nin on Adam a Eve, Cain a Abel, Noah a Sareu Gagamin a Babylon bigo (goa ann weromin) osi asi dudur.

2) Yayab auyotoat an yayatan ruam inai yayab orot ruam, orot ta aurin auyotoat (50) Ainau Israel sabu nanatus wawas agiris asi dudur. Ainauin on Abraham, On on sisagobai an baitutum a an fonabo God aurin on. Namon on gibunai dudur on natun Isaac a wawan Jacob (mat seyoyorai Israel) a Jacob nanatun auyotoat an yayatan ruam, osi min Israel dam auyotoat an yayatan ruam simatarai. Dudur gagamin bag on Jacob natun tani Joseph aurin a bobo simatar ato Jacob nanatun fani awawas nanatus mat iboes sinat Egypt nan simama. Atonio buk amonai on sabu asi ma yawas on ebidudur, baise gagamin bag on aifan God ifour on ebiyoboet. On an bosurufin on dura bag God on safam tafanam ifourai, ato an baisawarin on aumatan mat mamaba God an baisosoan arimon nana inbotein an sabu inbiyoboes aurin on. Atonio buk amon engon on God ekesin abi abi ifofouren on an dudur wat, On sabu ato iyabon komasis sibiayamen on ebigurubabanis a ebimakies, an sabu ebibaisis a ebinetewaris, ato asi dudur eyayatitiwagen. Atonio buk atamanin on sabu asi baitutum an dudur on sigayam ato ari ra sabu on buk siniyab ato inkufaiwaris asi baitutumai sinama.

Dura Gagamis Ass Safam Tafanam a Orot Jever ifouren *1.1–1.25*

Bokomas a Baikokosar an bosurufin *3.1–24*

Adam emon inai Noah *4.1–5.32*

Noah a Sareu Gagamin Igat *6.1–10.32*

Babylon Bigo (Goa ann weromin) *11.1–9*

Shem emon inai Abram *11.10–32*

Warar Unis: Abraham, Isaac, Jacob *12.1–35.29*

Esau Wawan Agirin 36.1-43
 Joseph Taitain Tutuan mat 37.1-45.28
 Israel Sabu Egypt nan 46.1-50.26

Ann Bokwawarin

1 ¹Ainau anai bag God safam a tafanam ifourai. ²Tafanam on wagan wat ato men abi tani iyen on, wouman on kamit tefan engon ikiman, ato God an Ayu on tefanai isisin i nan i nat. ³Ato God iyau, “Ratafin etagawai” ato itagawai, ⁴God it ratafin on obin, on mes On ratafin on wouman emon ikuseb. ⁵God ratafin on iwabai, “Ra”, ato wouman on iwabai “Fom.” Rabirabi inai isawar ato fomenei inat, On min ra ainauin.

⁶Namon God iyau, “Sanaf basunai ematar ato sareu ekuseb turin tefanai a turin babanai,” ⁷On mes God sanaf iyein ato sareu ikuseb sareu sanaf babanai a sareu sanaf tefanai. Ato on nanaba imatar. ⁸God on sanaf iwabai, “Kasakasau.” Rabirabi inai isawar ato fomenei inat ato on min ra bairuin.

⁹Ato God iyau, “Sareu ato kasakasau babanai on enai efan kaitamom eikaita. Ato eiyamai motob rarranin egat.” Ato on nanaba imatar. ¹⁰God on motob rarranin iwabai “Tafanam.” Ato sareu ibikaita on iwabai “Kamit.” Ato God it on obin. ¹¹Namon God iyau, “Motobai on wengar a wayo magis magis sekubou, fani on uwas fesi auman ato fani on uwas fofous mat, asi dam asi damai.” Ato nanaba imatar. ¹²Motobai nan wengar a wayo magis magis sikubou sigai, fani on uwas fesi auman ato fani on fofous mat, asi dam asi damai. Ato God it on obin. ¹³Ato rabirabi inai isawar ato fomenei inat. On min ra baitonin.

¹⁴Ato God iyau, “Kasakasau an sanafai nan ratafin ematar, ato fom ekuseb ra mabinai a fom mabinai ato eiyamai matu, ra a kwanda asi baiyoboen mes. ¹⁵Ato ratafin kasakasau an sanafai sematar tafanam intagawai.” Ato nanaba imatar. ¹⁶God ratafin gagamis ruam ifouren, ratafin gagamin on wera, ra inkaifarai aurin ato ratafin anaminei on roke, fom inkaifarai aurin. Ato on siribod mat ifouren. ¹⁷God kasakasau an sanafai osi ratafis iya tafanam intagawai mes. ¹⁸Mat asi ratafin on ra a fom itkaifarai ato ratafin on wouman emon itkuseb, ato God it on obin. ¹⁹Ato rabirabi inai isawar ato fomenei inat. On min ra baibatin.

²⁰Ato God iyau, “Eiyamai sareuai on sawar yayawasis sigaraba eibonuen ato kiwiu tafanam tefanai, kasakasauai nan sinarob sinrabon.” ²¹On mes God kamit an bobaitu gagamis, sawar yayawasis a sawar baiyayobis magis magis a kiwiu er fafes auman on asi dam asi damai engon ifouren. God it on obin. ²²God imomoginen ato iyau, “Wonatoub nanatum sinison ato kamit amon wonibonuai ato eiyamai kiwiu tafanamai sinison.” ²³Ato rabirabi inai isawar ato fomenei inat, on min ra bainimin.

²⁴Ato God iyau, “Eiyamai tafanamai sawar yayawasis asi dam asi dam sinmatar, gogabur an bobaitu, abi abi gugudis motob tefanai sekakayam on, a rega an bobaitu asi dam asi damai.” Ato nanaba imatar. ²⁵God on rega an bobaitu, gogabur an bobaitu a sawar gugudis motob tefanai sekakayam on engon iyamen asi dam asi damai. Ato God it on obin.

²⁶Namon God iyau, “Ot ari orot jever tanfouris sinnat ot magit matat ati itin ba sinmatar. Ato osi kamit an iyan, tefan an kiwiu, bobaitu tafanam engon tutufin a sawar gugudis motob tefanai sekakayam on engon sinkaifaren.” ²⁷On mes God orot jever ifouris sinnat On Toun magin matan ba simatar, God Toun magin matan ba on orot jever ifouris. On orot jever ifouris. ²⁸God imomogines ato iyawures iyau, “Omi nanatum babaisonis wonitu sinarat sinan tafanam engon tutufin sinibonuai ato sawar tafanamai sen on engon osi sinkaifaren. Yau baibad abitem ato kamit an iyan, tefan an kiwiu a sawar gugudis motob tefanai sekakayam on engon omi wonkaifaren.” ²⁹Namon God iyau, “Yau on tafanamai wengar uwas seyaya engon tutufin a wengar uwas fofous aumas engon tutufin on ato abitem omi ami bayu mes wonam. ³⁰Yau on wengar rorous a wayo ato aboen tafanamai bobaitu tutuenis engon, kiwiu tefanai serorob, a sawar gugudis motobai sekakayam engon on asi bayu mes aites on sinam.” Ato nanaba imatar. ³¹God sawar abi abi engon ifofouren iten on obin bag. Ato rabirabi inai isawar ato fomenei inat. On min ra nimtereban kaitamom.

2 ¹On etai God safam a tafanam a sawar ta ta amonai sen on engon ifouren isawar. ²Ra nimtereban bairuinai God bobo engon tutufin ifofouren on i sawaren, on mes on ra nimtereban bairuin bobo engon tutufin emon on i yarir. ³Ato God on ra nimtereban bairuin imomoginai ato iyamai ra kakafaiin imatar, yabin On bobo engon tutufin ifofouren on isawaren weie on emon i yarir.

Adam A Eve

⁴Atonio on safam a tafanam mamaba imamatar on an dudur.

On an werai BADA God safam a tafanam ifourai, ⁵on nan on men wengar a wayo tani motobai ikubou igai mes, yabin BADA God on usan men iyamai tafanamai iyar a men orot tani nan imama on motobai ittar itab. ⁶Baise sareu motob emon igai ato motob tefan engon inunubai.

⁷BADA God on motob an fofou emon on orot^a ifourai, weie yawas an yabat on aburunai ibabain ato orot inat yawasin imatar.

⁸Namon BADA God on Eden au wera matan emon nan masau ibofefes, ato orot ibimatarai on nan iyein. ⁹BADA God on wengar magis magis a

^a 2.7 Hebrew dura orot on sau (adam) mat dura an tatamin turin ekokofan sau on motob (adamah;) mat on wab min Adam (Gen 2.20 nan wonitai.)

wengar uwas aam auris obis anbabaton on nan ifouren sikubobouis sigai. On masau basunai on yawas an wengar on nan itatawar. A wengar tani ato sagob initem menan on yawas obin a yawas komasin on mat nan itatawar.

¹⁰Sareu masau ibinunubai on Eden emon isusur, on nan on ikuseb sareu matas bat simatar. ¹¹Sareu ainauin wabin on Pishon, on Havilah tafanam amonai yai ebikibubuai, on nan on agim gold sen. ¹²On tafanam an agim gold on obin, wengar kerin yanden ninibin a agim an baiyan gagamin wabin onix on mat nan sen. ¹³Sareu bairuin wabin on Gihon, on Cush tafanam amonai yai ebikibubuai, ¹⁴Sareu baitonin wabin on Tigris, on Asshur au wera matan na yai.

¹⁵BADA God on orot ibo Eden Masauai nan iyein masau ittar itab a itkaifarai mes. ¹⁶Ato BADA God on orot dura wawaninai iyawur iyau, “Om on wengar uwas atonio masauai on engon unam; ¹⁷baise om men wengar ato sagob initem menan on obin a komasin on uwan unan mes. Om on wengar uwan unanin on arimon totor wat unarab.”

¹⁸BADA God iyau, “Men iyobin arimon orot ekesin mom inama inmassibu. Yau arimon on orot an baibaisotin turan anfourai inibaisin.” ¹⁹On mes BADA God on motob ibo ato on emon bobaitu tutuenis a tefan an kiwiu engon tutufin ifouren, ato iboen inat orot aurin iteit wabis itites mes. Ato orot mamaba bobaitu kakaita kakaita ibiwabis min on nanaba seyoyores. ²⁰On mes orot on gogabur an bobaitu, tefan an kiwiu a motob an bobaitu tutuenis engon iwabis. Baise Adam an baibaisotin turan on men igaturai on.

²¹On mes BADA God orot iyamai nousin ifot bag iyen bubur. Ato on nana iyen bubur ato God on orot sesebin rarik tani iboseir ato anefanin on korofin ibo iyafotai. ²²Namon BADA God on orot sesebin rarik emon jever ifourai ato ibo inat orot aurin.

²³Ato orot iyau, “Ensairen! Ari weie nin on yau tou au rarik a yau tou au biou turin. On arimon aniwabai, ‘Jever,’ yabin God on yau au rarik emon imatarai.”

²⁴On yabinai orot arimon ayon taman inikirires ato inan jever rus sinikaita ato osi rus arimon sinnat usin kaitamom sinmatar.

²⁵Orot awan jever rus on keremomotis, baise osi men sibomamai on.

Adam A Eve Rus God Fonan Siseir

3 ¹BADA God on rega an bobaitu engon ifofouris sanasi, mota on kutatabir ansagobotin bag men bobaitu fani ba. Mota on jever aurin iyau, “Omi min dura bag, God iyawurem atonio masau amonai on men wengar uwan tani wonan i?”

²Jever on mota iyawur iyau, “Wei on masau amonai wengar uwas on engon wanam. ³Baise God on iyau, ‘Omi wengar ato masau basunai

bag etatawar on uwan men wonan a men wonrueyin mes, ato omi on wonbiyamai on arimon wonarab.’ ”

⁴Baise mota on jever iyawur iyau, “Omi dura bag arimon men wonarab on. ⁵Yabin God isagob omi wengar uwan wonboai wonanin on arimon matam sinruserenis wonnat God ba wonmatar, ato arimon wonsagob menan on obin a menan on komasin.”

⁶Namon jever wengar uwan it on bayu obin ato wakiroron isoror, mat inonot on igogoi bag gigiboan itboai, on mes jever wengar uwan tani ibo iyan. On awan orot bisinai imama on turin itai iyan. ⁷Namon osi rus matas on siruserenis, ato tous sisagobis on keremomotis. On mes osi bubudau rorous sisagiren ato beber mes siyafofotes.

⁸On rabirabi wera saminai orot awan rus on BADA God masuai ibibib on rarabin sitatam, on mes osi rus sinai wengar sanasi siyob. ⁹Baise BADA God on orot aurin iyor iyau, “Adam, om menan?”

¹⁰Orot iyafotai iyau, “Yau atatamim Om masuai ubib unat on mes aber auob, yabin yau on keremomotiu.”

¹¹Ato God iyau, “Iyafan ikasonem om keremomotim? Om wengar uwan ato dura wawaninai asofafarim men utan on ubo uyan bait?”

¹²Orot iyafotai iyau, “Jever ato om ubiteu on wengar uwan turin iteuan.”

¹³Namon BADA God on jever aurin iyau, “Atonio bobo on aifan uyamai?” Ato jever iyafotai iyau, “Mota min on ikuyoyowiu ato abo aan.”

¹⁴On mes BADA God mota aurin iyau, “Om atonio bobo uyamai on mes, om on gogabur asi bobaitu a rega asi bobaitu engon tefasi on om audabim! Om arimon yamui undudun ato arimon fofou unam am yawas tutufinai. ¹⁵Ato Yau arimon aniyamai om a jever rum on sanamui on wonbimagigiren bonen a om am fesi a jever an fesi mat on sinbiragit bonen. Ato osi tani on arimon unim infasfinim ato om on arimon ann etun ungiat.”

¹⁶Namon God on jever aurin iyau, “Om unbinafot nan on arimon usibaban gagamin anitem, om arimon usibaban auman fifirig unitu. Baise om on arimon nana awam orot ungogoiat bisinai wat. Ato om arimon on an faiwar babanai unama.”

¹⁷Ato God on Adam aurin iyau, “Om dura wawaninai asofafarim wengar uwan men utan, ato om awam fonan utatam ubo uyan on mes, Yau motob on audabai. Om arimon am yawas tutufinai bobo gagamin bag unabo weie bayu inmatar unan ¹⁸Gwagwar a wayo aisikis on arimon sinkubouis sinag am masau sintoutanis, om arimon wengar a wayo rorous motob emon segeg on unam. ¹⁹Om arimon bobo wawanin unabo abar untakakair unreben weie bayu inmatar. Om wantoan nana bobo wawanin unbobo mom asir unarab ato au motob unmatabir men unsur,



yabin Yau on motob emon afourim. Yau on fofou emon afourim on mes om unmatibir men au fofou.”

²⁰Adam awan iwabai Eve,^b on an yabin min sabu yawasis semama, osi ayos.

²¹BADA God bobaitu korofis on iyamen beber mes, ato Adam awan rus iyotes. ²²Ato BADA God iyau, “Orot ari inat ot ba imatar, on sawar engon tutufin obin a komasin on isagob. On men tanibasitai iman inotet ingat wengar yayawasin ba uwan inboai inan, ato yawasin wantoan inama.” ²³On mes BADA God orot ifaitan Eden masau emon igat, efan menan God orot ifourai nan masau ittar itab mes. ²⁴BADA God on orot a jever ifaitanis sigat gibunai, on anea wawanin a seri wairaf wamemeran auman aunan augibun ebitabubu on Eden Masau au wera matan na iya eta itkakaifarai onai sabu men yawas an wengar aurin sitar mes.

Cain A Abel

4 ¹Adam awan Eve rus siyen ato jever inafot fifi orot ituai wabin iyor Cain. Jever iyau, “Yau BADA an baibaisai on fifi orot aituai.” ²On gibunai jever on Cain tain Abel ba ituai ato osi sirat gagamis simatar weie, Abel on sheep kaifarotin imatar ato Cain on masau bofesotin imatar. ³Wera fani sisawar gibunai Cain an masau emon bayu fani iboen inat BADA aurin sirifu ikutetai. ⁴Baise Abel on an foro sheep sanasi abou boboun tani on iyasubun iweyab bios momos wat iboen inat. BADA on Abel a an sirifu ikutetai aurin on iyasisir, ⁵baise Cain an sirifu ikutetai on BADA it men iyasisir. On mes Cain iyatatab kwakwan ato magin iwani. ⁶Namon BADA on Cain aurin iyau, “Om aibo mes ebiyatatab? Om aibo mes magim iwani? ⁷Om bobo obin wat unfofour on Yau arimon anibasitem. Baise om men bobo obis unfofour on bokomas on ebottiwag iniragitem mes. Bokomas on egogoi bag inboem, baise om unfaskikin bokomas unbomerubai.”

⁸Namon Cain on tain Abel aurin iyau, “Ot tagat tanai au masau.” On an werai osi masauai nan Cain imisir tain Abel irab iyasubun.

⁹Namon BADA on Cain aurin iyau, “Om taim Abel on menan?”

On iyafotai iyau, “Yau men asagob. Ato nin min yau au bobo tau an kaifarai mes i?”

¹⁰BADA iyau, “Om aifan uiyamai? Etatam om taim an tara on orot jever ba motob emon auriu eyoyor. ¹¹Om taim uyasubun ato an tara on igaror isur motobai. On fasinai Yau audabim ato om arimon atonio motob emon on an faitanim ungar. ¹²Om atonio motobai masau unbobo on men arimon bayu yabin obin inyein on. Om arimon am mair ma ambin ato asir amui unidadanamim mom tafanam au engonai.”

^b 3.20 Eve an yabin tani on yayawasin.

¹³Ato Cain on BADA aurin iyau, “Yau au baimaki ubiteu on gagamin bag men fofonin anboai on. ¹⁴Om on ari atonio motob emon urukouwiu agat, ato arimon magim emon mat anob. Yau arimon tafanamai au goa ambin ato etai anidadanam, ato iyai iyafan ingatureu on arimon inasubunueu.”

¹⁵Baise BADA on Cain iyawur iyau, “Ambin bag. Iyai iyafan om inasubun on arimon an garamin nimtereban ruam ba on tefanai nanaba animakiai.” Namon BADA on Cain usinai kukufot iyein onai iyai iyafan ingaturai on men inasubun. ¹⁶On mes Cain on BADA magin emon igat inai Eden wera matan Nod tafanamai nan ima.

¹⁷Cain awan rus siyen ato inafot natun orot Enoch ituai. On gibunai Cain on mafam gagamin iyoyonin min on natun fifi orot wabin Enoch on iwab seirai. ¹⁸Enoch natun Irad irat, ato Irad on Mehujael taman, a Mehujael on Methushael taman a Methushael on Lamech taman. ¹⁹Lamech on jever ruam iawanis, tani wabin Adah ato tani wabin Zillah, ²⁰Adah natun orot Jabal ituai, on min iyabon ato guwi ai sima gogabur an bobaitu sibitues on osi tamas. ²¹On tain on Jubal; on min iyabon ato tataf a orof sikwakwareren on osi tamas. ²²Zillah mat on natun orot Tubal-Cain ituai, on min baiyuyur ta, ta on agim bronze a agim iron ai iteteren. Tubal-Cain robun min Naamah.

²³Lamech awawan ruam iyawures iyau, “Omi Adah a Zillah, rum tainam wonreben. Omi Lamech awawan au dura wontatam, yau orot ibigawudeu aurin on asubun a orot boboun kiyam ibiteu on asubun. ²⁴Iyafan Cain inasubun on arimon baimaki ra nimtereban ruam inboai ato iyafan Lamech inasubun on arimon baimaki ra orot ton, orot ta aurin auyotoat an yayatan nimtereban ruam inboai (77).”

²⁵Adam awan rus siyen men ato jever fifi tani ba ituai ato iwabai Seth, ato iyau, “God on fifi tani ba iteu Abel an efan irorog, yabin Cain tain iyasubun on mes.” ²⁶Seth on eb natun orot irat ato iwabai Enosh. On an werai sabu sibosuruf BADA sikwakwafirai.

Adam Wawan Agirin

5 ¹Adam wawan agirin wabis min atonio. On an rai God sabu ifofouris on, On Toun an itin ba ifouris. ²God on orot jever ifouris weie imomogines, ato iwabis, “orot a jever.” ³Adam ima an kwanda 130 weie natun orot Seth irat. Seth min taman an itin ba irat. ⁴Seth irat gibunai Adam on kwanda 800 ba ima weie nanatun orot a jever fani ba sirat. ⁵Ato on ima an kwanda 930 weie irabob.

⁶Seth ima an kwanda 105 an rai on natun orot Enosh irat. ⁷Enosh irat on gibunai, Seth on kwanda 807 ba ima weie nanatun orot a jever fani ba sirat. ⁸Ato Seth ima an kwanda 912 weie irabob.

⁹Namon Enosh ima an kwanda on orot bat, orot ta aurin auyotoat weie on natun orot Kenan irat. ¹⁰Ato Kenan irat gibunai Enosh on ima kwanda 815 on amonai weie nanatun orot a jever fani ba sirat. ¹¹Enosh ima an kwanda 905 weie irabob.

¹²Namon Kenan ima an kwanda orot ton, orot ta aurin auyotoat an rai, on natun orot Mahalalel irat. ¹³Mahalalel irat gibunai, Kenan ima an kwanda 840 weie nanatun orot a jever fani ba sirat. ¹⁴Ato Kenan ima an kwanda 910, weie irabob.

¹⁵Namon Mahalalel ima an kwanda orot ton an yayatan nim weie natun orot Jared irat. ¹⁶Ato Jared irat gibunai, Mahalalel on kwanda 830 ba ima weie nanatun orot a jever fani ba sirat. ¹⁷Mahalalel on ima an kwanda 895 weie irabob.

¹⁸Namon Jared on ima an kwanda 162 weie natun orot Enoch irat. ¹⁹Ato Enoch irat gibunai, Jared on kwanda 800 ba ima weie nanatun orot a jever fani ba sirat. ²⁰Jared an ima kwanda 962 weie irabob.

²¹Namon Enoch ima an kwanda orot ton an yayatan nim weie natun orot Methuselah irat. ²²On gibunai, Enoch an kwanda 300 ato on God ituranai rus sikaita sima, ato on nanatun orot a jever fani ba sirat. ²³Enoch on an kwanda 365 ba ima. ²⁴Ato Enoch on an yawas tutufinai God ituranai rus sikaita simama, on mes God ibo igai au safam.

²⁵Methuselah ima an kwanda 187 weie natun orot Lamech irat. ²⁶Ato Lamech irat gibunai, Methuselah on an kwanda 782 ba ima, weie nanatun orot a jever fani ba sirat. ²⁷Ato Methuselah ima an kwanda 969 weie irabob.

²⁸Lamech ima an kwanda 182 weie natun orot irat. ²⁹On wabin iyor Noah,^c ato iyau, “On arimon inibasit inkaifaret ati baisababan a usibaban an werai, yabin ato motob on BADA iyaudabai yen.” ³⁰Noah irat gibunai on Lamech ima an kwanda 595 weie on nanatun orot a jever fani ba sirat. ³¹Lamech ima an kwanda 777 weie irabob.

³²On gibunai Noah ima an kwanda 500 weie on nanatun orot ton sirat. Osi wabis min, Shem, Ham a Japheth.

Orot Jever Asi Komasin

6 ¹On an rai sabu ibosuruf irarat tafanam au engon ibonu ato nanatus jeverig mat sirat. ²Osi God nanatun orot sabu tafanamai nanatus jeverig sites on momogis fafa on mes asi gogoi nanaba siboes siawanis. ³Namon BADA iyau, “Yau au yabat aratein ato sabu abites on men arimon sinama au wantoan mes, yabin osi on sabu maiauis. Osi on men sinama inan kwanda 120 inisobonai mes.” ⁴On an werai a wera gibunai sabu on gagamis kokoisi bag simama. Osi on God nanatun orot ato tafanamai

^c 5.29 Hebrew dura wab Noah an tatamin on sau Kubainunub.

sabu nanatus jeverig sibiawanis on nanatus sirat sabu faiwaris a wabis gagamis bag ainau simama. ⁵Ato BADA it sabu tafanamai simama asi yawas on komasis bag, mat osi sabu asi bainonot ra fufur sibinonot on engon komasis wat. ⁶Ato BADA inonotai on iyobin sabu tafanamai on men itifouris on mes nunuan on ibaban kwakwan. ⁷On mes BADA iyau, “Basit Yau sabu tafanamai afofouris on engon anikomasis a anfulun insawar, bobaitu, kiwiu a motob tefanai sawar yayawasis baiyayobis on mat engon anikomasis, yabin abiyababan on aibo mes nanaba afouris.” ⁸Baise BADA on Noah aurin iyasisir.

Noah

⁹⁻¹⁰Atonio on Noah an dudur. On nanatun orot engon ton: Shem, Ham a Japheth. Noah an yawas on totorin wat, on tafanamai sabu sanasi imama on an ubar tani ambin. On God ituranai rus kaitanei wat sibibib. ¹¹Baise God matanai sabu tafanamai simama asi yawas sifofour on engon komasin wat. Tafanam au engon on baigagam a yawasis komsis wat on ibonu. ¹²God iyeit tafanam au engon it on komasin bag, yabin sabu engon tutufin on yawas komasis wat sifofour simama.

¹³On mes God on Noah yawur iyau, “Yau ainonot nono sabu engon tutufin anfulun insawar, yabin tafanam amonai on gamo a baigagam wat on awan ibonu. Yau on dura bag tafanam a sabu engon anikomasis. ¹⁴On mes om wengar obin tani unboai ato on nan am wa unyon, ato amonai efan engon unbotitiwag, weie amonai a kounai on fotu rababarinai wat on unbobabaren. ¹⁵Om wa unyoyonin an weroromin on 130 mita, ato wa an tayabarin on 22 mita, ato wa amon emon igai au uwayob on 13 mita. ¹⁶Om wa tefan an guwi unyoyonin on men uniyamai insur kwakwan wa rewan engon inyafotai mes. Ab om 5 mita nanaba on masar unikirir ato ratafin inar. Ato wa amonai ma an efan on engon ton uniyamen, tani on babanai, tani on basunai a tani on tefanai ato metewan on kaitamom sesebinai unyein. ¹⁷Yau arimon sareu gagamin aniyafarai tafanam au engon inboai ato sawar yayawasis semama on engon inikomasis. Ato sawar engon tutufin tafanamai semama on engon sinarab. ¹⁸Ato baise yau arimon rut dura bo baibasit taniyamai weie om awam rum a nanatum orot awawas mat on wonan wa amonai wonar. ¹⁹Om on bobaitu a sawar yayawasis ruruam ruruam, orot a jever on unboes mat wa amonai wonar ato unkaifares yawasis sinama. ²⁰Mat om kiwiu asi dam ta ta on ruruam ruruam, orot a jever a bobaitu gagamis a gugudis asi dam ta ta a sawar baiyayobis asi dam ta ta motobai sekakayam on mat engon unboes wa amonai wonar unkaifares yawasis sinama. ²¹Om on bayu magis ta ta menan aam aurin on engon unabo ato nan efan kaita unyadodog, fani om aurim a fani osi mat auris.” ²²God mamaba Noah iforai on engon nanaba ifour.

Sareu Gagamin Igat

7 ¹BADA on Noah iyawur iyou, “Om awam a nanatum orot awawas mat engon eboes, ato wonai wa amonai worui, yabin Yau agaturem om ekesim wat nin tafanamai on am yawas totorin wat efour. ²Ato bobaitu ta ta gumidaris awawas mat on nimtereban ruam nanaba eboen, ato bobaitu men gumidaris on eb awawas mat kakaita kakaita eboen, ³a on eb kiwiu magis magis awawas mat engon nimtereban ruam eboen, yabin osi bobaitu kiwiu min arimon tafanamai yawasis sinama ato sinatoub men. ⁴Ato ari inan ra nimtereban ruam gibunai, yau usan gagamin aniyafarai arimon inyayar mom inan ra orot ruam a fom orot ruam insawar. Ato orot jever a bobaitu yawasis mamaba afofour on engon anufun sinsawar.” ⁵BADA mamaba Noah iforai on engon nanaba ifour.

⁶Noah an kwanda 600 an rai on sareu gagamin bag tafanamai igat. ⁷On awan rus a nanatun orot awawas mat engon sinai wa amonai sirui, onai sareu gagamin on men itikomasis mes. ⁸Bobaitu gumidaris a men gumidaris, a mat kiwiu, sawar yayawasis, baiyayobis kakaita kakaita awawas mat, ⁹on sinat Noah mat wa amonai sirui, mamaba BADA dura wawaninai iyou on nanaba. ¹⁰Ra nimtereban ruam gibunai sareu gagamin bag igat tafanam engon ikiman.

¹¹On an werai Noah min an kwanda 600, ra auyotoat an yayatan nimtereban ruam, roke bairuinai nan sareu matas ta ta motob babanai sitasesebis, safam asi metewan engon siruserenis ato usan gagamin bag isur. ¹²Ato usan min tafanamai nana iyayar mom ra orot ruam a fom orot ruam isawar. ¹³On ra kaitamomai usan ibosuruf iyayar an werai Noah awan rus, nanatun orot ton; Shem, Ham a Japheth awawas mat on engon sinai wa amonai sirui. ¹⁴Gogabur a rega asi bobaitu ta ta gugudis gagamis, kiwiu ta ta, sawar yayawasis baiyayobis motobai sekakayam ta ta engon mat sinai. ¹⁵Sawar yawasis ta ta awawas awawas mat on Noah mat sinai wa amonai sirui. ¹⁶Ato bobaitu orot jever kakaita kakaita mamaba God Noah iforai iyou on nanaba sinai sirui weie BADA Toun metewan irufot fotai.

¹⁷Ra orot ruam amonai usan on nana iyayar ato sareu gagamin igat ibururum igai motob engon ikiman ato wa iyarugai. ¹⁸Sareu on ibururum igai ato iborit, on mes wa on sareu tefanai iyarui. ¹⁹Ato sareu on ibururum igai oyau gagamis tefas mat egnon ikiman. ²⁰On sareu on ibururum igai oyau gagamis tefas isobonai igai aiyetun bag ato an fofon on mita nimtereban ruam ibo. ²¹Ato rega an bobaitu magis magis simama a kiwiu ta ta, bobaitu gugudis yawasis nin tafanamai simama on, sabu mat engon sirabob isawar. ²²Sawar engon ato tafanamai siyaratein yawasis simama on engon sirabob isawar. ²³Ato sawar yayawasis nin

tafanamai simama on engon ifufun, sabu a bobaitu ato motobai sibibib a kiwiu aiyetunai osi mat engon tafanam emon ifufun. Noah ekesin mom a iyabon on mat wa amonai sirui on siyawas. ²⁴Ra 150 amonai on sareu on nana ibururum iyen.

Sareu Igat An kanfoun

8 ¹Baise God on Noah a bobaitu mat engon nan wa amonai simama on men inosfotes on. God on yabat iyamai isisin ato sareu ibosuruf itiririn isusur. ²A motob babanai sareu sigegeg on iyafotai a safamai sareu an metewan on irufotai ato usan iyayar on ibotan, ³ato sareu on sunub sunub itiririn isusur mom asir ra 150 isawar. ⁴Roke nimtereban ruam amonai ra auyotoat an yayatan nimtereban ruam nan on wa inat Ararat oyauai iyagai. ⁵Sareu on nana itiririn isur inan, ato roke auyotoat an ra ainauinai nan on oyau tefas sirerebis.

⁶Ra orot ruam isawar gibunai Noah on wa an gigo iruseren, ⁷ato owe on iyafarai igat, baise owe on asir irorob inan inat mom sareu engon itiririn isur isawar ato motob rerebai igat. ⁸Namon Noah on kiwiu kumag ba iyafarai igat sareu ititai mamaba itiririn isur isawar ai ambin. ⁹baise on werai sareu on nana motob engon ikiman iyen on mes kumag on men efan tani igaturai nan itamair itiyarir. On mes on irob imatabir men inat wa aurin ato Noah iman iyotet igat ibo men irui. ¹⁰Basit Noah on ra nimtereban ruam ba imousin ato kumag iyafarai men igat inai. ¹¹On rabirabi on kumag awanai wengar olive roroun igi auman imatabir men inat Noah aurin. On nan Noah isagob on sareu itiririn isur. ¹²Namon on ra nimtereban ruam ba imousin ato kiwiu kumag iyafarai men igat inai, baise ari on men imatabir men.

¹³On an rai Noah an kwanda 601, on roke ainauin an ra ainauin nan on sareu motobai on ibosuruf iraran. Noah on wa tefanai guwi on iruseren ato it on motob iraran. ¹⁴Roke bairuin an ra orot kaitamom an yayatan nimtereban ruam amonai on motob engon iraran isawar.

¹⁵Namon God on Noah aurin iyau, ¹⁶“Om awam rum a nanatum orot awawas mat on engon wa emon wogat. ¹⁷Om sawar yayawasis asi itis ta ta ato mat womama, osi min kiwiu a bobaitu, sawar yayawasis ato motobai sekakayam on engon eboes mat wogat, onai osi arimon sinatoub ato tafanam engon sinibonuai.” ¹⁸On mes Noah awan rus a nanatum orot awawas mat engon wa emon sigat sinai. ¹⁹Bobaitu engon a sawar yayawasis motobai sekakayam engon a kiwiu asi dam ta ta engon on asi kuayoai asi kuayoai nan wa emon sigat sinai.

Noah Sirifu Ikutetai

²⁰Noah on sirifu agim kema iyon BADA aurin; on bobaitu a kiwiu gumidaris ta ta asi itin itinai iboen ato tutufis agim kema tefanai iteren

sirifu ikutetai. ²¹BADA atonio sirifu yanden ninibin on iyasisirai ato iyau, “Yau men meyan arimon sabu bobo aifan sebiyamai fasinai on motob an audabai men; Yau asagob ari wera sabu bobous asi bainonot on komasis. Yau men meyan arimon sawar yawasis anikomassen men, ato ari wera afofour ba. ²²Tafanam nana yen on arimon fesi bofefes an wera, bayu kuwain an wera, sibuin an wera a forabin an wera, kwanda an wera a baimar an wera, ra a fom. Atonio osi matu on arimon nanaba sinen au wantoan.”

God An Dura Bo Baibasit Noah Rus Siyamai

9 ¹Namon God on Noah a on nanatun orot mat engon imomogines ato iyawures iyau, “Omi nanatum fifirig sigaraba wonitu ato ami dam warar inarat tafanam engon inibonuai. ²Tafanamai bobaitu tutuenis engon, kiwiu aiyetunai engon, sawar tutufin motobai sekakayam a kamit an iyan engon on arimon omi sinberuem. Osi engon min arimon omi ami baibad babanai sinama. ³Omi on sawar yayawasis engon semama a sekakayam on engon ami bayu mes wonam, mamaba Yau matan ainau bofefes asi kanefu abitem ba. Ari osi sawar engon on abitem ami bayu mes. ⁴Baise sawar kaitamom on masono bionai tara inen on men wonan mes, yabin yawas on tara ai nan yen. ⁵Ato orot jever iyafan turan an yawas eboseir on arimon animakiai inarab a bobaitu ato orot jever an yawas eboseir on eb arimon animakiai inarab. ⁶Iyai iyafan orot jever iyasubun on an garamin orot jever emon sinasubun. Yabin God orot jever ifourai on Toun anitin ba ibo.

⁷Ato omi on fifirig sigaraba wonitu ato ami dam warar inarat onai tafanam engon sinibonuai.”

⁸Namon God on Noah nanatun orot mat auris iyau, ⁹“Yau ari au dura bo baibasit abiyamai omi a omi wawam agirim gibui sinrarat auris mat. ¹⁰A mat osi sawar yawasis engon, kiwiu, gogabur an bobaitu a bobaitu tutuenis engon a tafanamai sawar yayawasis engon tutufin mat ato wa amon emon wogat auris mat abiyamai. ¹¹Yau atonio dura ai on au dura bo baibasit omi mat tabiyamai: Yau men arimon gibui sareu gagamin aniyamai ingat sawar yayawasis asi yawas inboseseiren mes, a men arimon gibui sareu gagamin aniyamai ingat tafanam inikomasai mes.” ¹²Ato God iyau, “Yau atonio dura bo baibasit an matair omi mat sanati abiyamai a sawar yayawasis engon tutufin mat womama auris a sabu gibui sinrarat engon mat auris. ¹³Yau au tarub on kasakasauai ayein ato on, on arimon dura bo baibasit an matair mes iniyamai Yau a tafanam mat sanayi. ¹⁴On an rai yau kasakasau aniyamai ingat aiyetunai inaru nan on tarub mat min on kasakasauai inrobotet. ¹⁵Yau arimon au dura bo baibasit omi Yau mat a sawar yayawasisi engon mat tabiyamai on annos. Men arimon sareu gagamin aniyamai ingat men tafanamai sawar yayawasis engon tutufin inikomasen.

¹⁶On an rai tarub kasakasauai inrrobotet anitai on, yau arimon ato dura bo baibasit wantoanin on annos, God a sawar yayawasis sanasi tafanamai itis ta ta engon auris.” ¹⁷On mes God on Noah aurin iyau, “Atonio on dura bo baibasit an matair yau a tafanamai yawas engon sanati aiyamai.”

Noah Nanatun Orot

¹⁸Noah nanatun orot iyabon ato wa amon emon sigat on Shem, Ham a Japheth. (Ham on Canaan taman) ¹⁹Atonio on Noah nanatun orot ton, ato osi nanatus wawas agiris emon on sitagege tafanam au engon inbonu.

²⁰Noah on tar ba an orot ato on ainau ibosuruf masauai wengar wine itanum. ²¹On an werai on sareu wine turin itoman, on ibosuruf ikokok ato on sawar igabobounen keremomotin an guwi amonai iyen bubur. ²²Canaan taman Ham on taman Noah keremomotin iyen bubur it ato igat tuan a tain ikasones. ²³Namon Shem a Japheth rus beber sibo abarasi sitarasour, weie aufut aufut sirui tamas keremomotin iyen bubur on sisabutan. Osi magis on sab siya onai tamas keremomotin iyen bubur on men sititai mes. ²⁴On an werai Noah unin iyobin ato imisir men, on isagob natun giyamomos Ham on bobo aifan iyamai.

²⁵On mes iyau, “Canaan, yau audabim, om arimon agirotim bag unmatar tutuam uniagires.” ²⁶Mat on eb iyau, “Yau abifefeyan au BADA God aurin on Shem inimoginai ato iniyamai Canaan on innat Shem an agirotin inmatar.” ²⁷Yau abifefeyan au BADA on Japheth an motob on iniratai ato Japheth on Shem an goa tafanam inboai. Ato Canaan on on an agirotin inmatar.”

²⁸Sareu gagamin igat gibunai on Noah an kwanda on 350 ba ima. ²⁹On engon ibikaita on Noah an kwanda 950 ima weie irabob.

Noah Nanatun Wawan Agirin

10 ¹Atonio on Noah nanatun fifirig orot wabis: Shem, Ham a Japheth. Atonio fifirig ton on sareu gagamin igat gibunai on nanatus sirat.

Japheth Nanatun Wawan Agirin

²Japheth nanatun fifirig orot wabis on Gomer, Magog, Madai, Javan, Tubal, Meshech a Tiras. ³Gomer nanatun wawan agirin on Ashkenaz, Ripahath a Togarmah. ⁴Javan nanatun wawan agirin on Elishah, Spain, Cyprus a Rhodes; ⁵atonio osi dam warar on tore a nua ai nan simama. Osi min Japheth nanatun wawan agirin an dam on dam ta ta a tafanam sigaraba sanasi sima ato osi engon on fonas ta ta sibikakafun.

Ham Nanatun Wawan Agirin

⁶Ham nanatun fifirig orot wabis on Cush, Egypt, Libya a Canaan. ⁷Cush nanatun wawan agirin on Seba, Havilah, Sabtah, Raamah a

Sabteca. Raamah nanatun wawan agirin on Sheba a Dedan. ⁸Cush natun orot irat wabin Nimrod, on orot ainau inat orot faiwarin bag imatar, i yo igagam tafanam ibo. ⁹BADA an baibais emon on inat masono bo am an orot gagamin imatar, on mes sabu sebikakafun sau, “Om orot iyafan Nimrod ba on unnat regai bo am an orot gagamin bag unmatar.” ¹⁰Ainai on Nimrod mafam gagamis ton on i kakaifaren; Babylon, Erech a Akkad. Osi min Babylonia tafanam amonai. ¹¹Nimrod on Babylonia tafanam emon on inai Assyria nan mafam gagamis i goyon, osi mafam gagamis min Nineveh, Rehoboth Ir, Calah, ¹²a Resen, on Nineveh a mafam gagamin Calah basunai.

¹³Ato Egypt nanatun wawan agirin on Lydia, Anam, Lehab, Naphtuh, ¹⁴Pathrus, Casluh a Crete. Philistia sabu on Crete emon sinat.

¹⁵Canaan nanatun orot wabis on Sidon a Heth. ¹⁶Canaan on eb wawan agirin on Jebus, Amor, Girdash, ¹⁷Hivi, Ark a Sini, ¹⁸Arvad, Zemar a Hamath. On gibunai osi Canaan dam kakaita kakaita on sisonag sinai efan ta ta nan sima. ¹⁹Canaan an tafanam an farat on Sidon mafam ibosuruf au gorof na inai Gerar mafam farat nan igat, on min Gaza mafam bisinai. Ato osi asi tafanam an farat turin min nan ibosuruf men au wera matan na inai au mafam Sodom a Gomorrah, Adamah, a Zeboiim nan igat on min Lasha efan bisinai. ²⁰Atonio on Ham nanatun wawan agirin. Osi dam kakaita kakaita on sinai tafanam ta ta nan sima ato osi dam min asi dura ta ta nan sibikakafun.

Shem Nanatun Wawan Agirin

²¹Shem on Japheth tuan ainai orot, on an dam warar on Hebrew yangan. ²²Shem nanatun orot wabis on Elam, Asshur, Arphaxad, Lud a Aram on osi asi dam iwabis. ²³Aram wawan agirin on Uz, Hul, Gether a Meshech yangan. ²⁴Arphaxad taman on Shelah ato on taman on Eber. ²⁵Eber on nanatun orot ruam: Fifi orot tani wabin on Peleg, yabin Peleg irat imama an werai on sabu on tafanamai simama on sikuseb mabis mabis sinai. Ato on wab Peleg an yabin min “Sikuseb.” Ato Peleg tain tani wabin on Joktan. ²⁶Joktan nanatun wawan agirin on Almodad, Sheleph, Hazarmaveth, Jerah, ²⁷Hadoram, Uzal, Diklah, ²⁸Obal, Abimael, Sheba, ²⁹Ophir, Havilah a Jobab. Atonio osi engon on Joktan nanatun orot wawan agirin wat. ³⁰Ato osi dam on tafanam Mesha farat nan simama on inai Sephar nan igat na au wera matan oyau oyau tafanamai nan. ³¹Atonio on Shem nanatun wawan agirin. On dam kakaita kakaita on tafanam ta ta nan sima ato osi engon min asi dura ta ta nan sibikakafun.

³²Atonio osi dam warar wab kakaita kakaita, asi tafanam asi tafanam ai simama, osi engon on Noah nanatun wawan agirin wat. Sareu gagamin igat gibunai, Noah nanatun wawan agirin on sisonag sinai tafanam ta ta engon ibonu.

Babylon Goa Ann Weromin

11 ¹Anai bag sabu tafanam tutufin engon on asi dura kaitamom wat sibikakafun. ²On an rai osi sibib sinai au wera matan na ato efan roubabanai sigaturai, on min Babylon tafanamai nan. Namon osi nan sigoyon sima. ³Osi tous wat sikakafun bonen siyau, “Omi wonat! Ot motobai noukwat tanboai tangamatabir ato tanteren sinwani agim ba sinmatar.” On mes sabu sibosuruf dura mamaba siyau on nanaba sifour noukwat siteren agim ba simatar nan situbabarai. A sawar rababarin wabin kolta on siboen sibotitiwag nan noukwat tetern on sitbobabarai itbokikin mes. ⁴Namon osi sikakafun siyau, “Ot ari on mafam gagamin tanyon ato on amonai on goa ann weromin mat tanyon inag inan safam aiyetun inboai. Ot taniyamai wabit tanyein ato men mabit mabit tansonag mes.”

⁵Namon BADA isur inat mafam gagamin a goa ann weromin sabu sibigoyon on ititai mes. ⁶Ato BADA ikakafun iyau, “Woit, atonio sabu on kaitamom wat ato dura on kaitamom wat sebikakafun; osi atonio bobo sefour on nin on sebosuruf. Osi men weromin, asi bobo aifan segogoi sinafour on arimon fofonin siniyamai mom. ⁷Ot tansur asi dura on tanikitabiren sinitagogois ato arimon tuturas fonas men sintatam sinsagob dura aifan sebikakafun on.” ⁸On mes BADA sabu ikugeyis sinai tafanam au engonai nan sima. Ato osi mafam gagamin siyoyonin min situge kirir. ⁹On mes on mafam gagamin min siyor Babylon, yabin on nan BADA sabu engon tutufin asi dura ikitabiren sitagogois ato ikugeyis mabis mabis sitagege tafanam tutufin engon ibonu.

Shem Nanatun Wawan Agirin

(1 Chronicles 1.24-27)

¹⁰Atonio on Shem nanatun wawan agirin. Sareu gagamin igat gibunai kwanda ruam isawar, Shem an kwanda on orot wat nim weie, on natun orot irat wabin Arphaxad. ¹¹On gibunai on ima inai an kwanda 500 weie, nanatun orot a jever fani ba sirat.

¹²Arphaxad an kwanda on orot kaitamom, orot ta aurin ayotoat an yayatan nim (35) weie on natun orot irat wabin Shelah. ¹³On gibunai on ima inai an kwanda 403 weie nanatun orot a jever fani ba sirat.

¹⁴Shelah an kwanda on orot kaitamom, orot ta aurin ayotoat (30) weie on natun orot irat wabin Eber. ¹⁵On gibunai on ima inai an kwanda 403 weie on nanatun orot a jever fani ba sirat.

¹⁶Eber an kwanda on orot kaitamom, orot ta aurin ayotoat an yayatan bat (34) weie natun orot irat wabin Peleg. ¹⁷On gibunai on ima inai an kwanda 430 weie nanatun orot a jever fani ba sirat.



¹⁸Peleg an kwanda on orot kaitamom, orot ta aurin auyotoat (30) weie natun orot irat wabin Reu. ¹⁹On gibunai on ima inai an kwanda 209 weie nanatun orot a jever fani ba sirat.

²⁰Reu an kwanda on orot kaitamom, orot ta aurin auyotoat an yayatan ruam (32) weie natun orot irat wabin Serug. ²¹On gibunai on ima inai an kwanda 207 weie nanatun orot a jever fani ba sirat.

²²Serug an kwanda on orot kaitamom, orot ta aurin auyotoat (30) weie natun orot irat wabin Nahor. ²³On gibunai on ima inai an kwanda 200 weie nanatun orot a jever fani ba sirat.

²⁴Nahor an kwanda orot kaitamom an yayatan nimoreban bat (24) weie natun orot irat wabin Terah. ²⁵On gibunai on ima inai an kwanda 119 weie nanatun orot a jever fani ba sirat.

²⁶Terah an kwanda on orot ton, orot ta aurin auyotoat (70) weie on nanatun orot Abram, Nahor a Haran ba sirat.

Terah Nanatun Wawan Agirin

²⁷Atonio on Terah an dam warar an dudur. On min Abram, Nahor a Haran osi tamas. Haran on Lot taman. ²⁸Baise Haran on orot boboun imama ato nan an rat baren Ur mafami nan irabob, on min Babylonia tafanam amonai. Ato on taman Terah on nana ima. ²⁹Abram on Sarai iawan ato Nahor on Haran natun jeverei Milcah iawan. Haran min Milcah a Iscah rus tamas. ³⁰Sarai on arin on mes men fifi ta ituai on.

³¹Terah on natun Abram, wawan Lot, on min Haran natun orot a rawan jever Sarai, on min natun Abram awan, osi engon iboes ato Ur mafam Babylonia tafanam emon sigat sitan au Canaan tafanam aurin. Osi sinai Haran sigat ato nan sigoyon sima. ³²Terah ima inai an kwanda 205 weie irabob.

God Abram Iyor

12 ¹BADA on Abram iyawur iyau, “Om am tafanam, taitaim tutuam, tamam an dam warar on eikirires ato egat enai tafanam anbiyoboem on nan ungat. ²Yau arimon aniyamai nanatum wawam agirim inison ato tafanam engon inbonu. Yau arimon animomoginem ato wabim aniyamai inarat, om fasimui on sabu engon arimon obin sinboai.

³Yau arimon sabu iyabon om aurim obin sebiyamai on arimon obin auris aniyamai. Ato iyai iyafan in audabim on arimon angaramin an audabai, ato om fasimui on sabu engon tafanamai arimon obin sinboai.”

⁴On mes Abram igat mamaba BADA iyawur nanaba, ato abun Lot on rus sinai. Abram an kwanda on orot ton, orot ta aurin auyotoat an yayatan nim, (75) on an werai Haran mafam ikirir igat. ⁵Abram on awan Sarai, abun Lot, asi sawar engon a an agirotis ato Haran nan i boes on engon mat sigat sinai Canaan tafanamai sigat.

⁶Abram on Canaan tafanamai ibib inat wengar gagamin wabin Moreh itatawar anfaratai, Shechem nan. On an werai Canaan sabu min on tafanamai simama. ⁷BADA on Abram aurin irobotet ato iyawur iyau, “Atonio tafanam on arimon om wawam agirim anites.” On mes Abram on sirifu agim kema iyon BADA aurin ikutetai efan menan BADA aurin irorobotet nan. ⁸Namon on Shechem emon inai Bethel oyau oyau tafanamai au wera matan na nan an guwi iyon. Bethel tafanam on au wera sifun na ato Ai tafanam on au wera matan na. On nan Abram sirifu agim kema tani ba iyon BADA aurin, ato nan kwafirai. ⁹Namon Abram ibosuruf men inanawan i nan mom inai Negev tafanamai igat.

Abram Egypt Nan

¹⁰On an werai Canaan tafanamai on gomar imatar, on mes Abram isur inai Egypt nan wera dibon wat itama yabin min afoi gagamin i raran. ¹¹Osi sinat Egypt mafam aurin sibiufin ato Abram on awan Sarai aurin iyau, “Yau sagob om on jever momogim anbabaton. ¹²On an werai Egypt sabu om sinitem on arimon sinau, ‘Atonio jever on, on rot awan.’ Namon osi arimon yau sinasubunueu baise om on arimon sinikirirem unama. ¹³On mes om unawures unau, yau on om robum, onai on yau arimon om fasimui on sinkaifareu tiwag yawasiu anama.”

¹⁴On an werai Abram inat au Egypt ato, osi Egypt sabu jever sit on momogin anbabaton. ¹⁵Ato on an werai Egypt an aiwab rot an babadis jever sit on sinai aiwab rot matanai jever an itin obin aurin on siduduran, ato sibo sinai aiwab rot an goai. ¹⁶Egypt an aiwab rot inos Abram on robun Sarai, on fasinai on Abram aurin an obin iyamai an sheep a cow fani, donkey toub a tona fani, agirotis jever a rot fani a camel fani on ibogai isiwari.

¹⁷Baise BADA on sawau fesar wawanis iyafaren Egypt an aiwab rot a on an goa amonai sabu simama auris, yabin aiwab rot on Abram awan Sarai ibo awan mes on fasinai. ¹⁸On mes Egyot aiwab rot on Abram iyor inat aurin ato itetamai iyau, “Om yau auriu aifan uiyamai? Om aibo mes men ukasoneu Sarai on om awam i? ¹⁹Om aibo mes uyau, ‘Sarai on yau robu,’ on mes yau abo awau mes. Om awam atonio ebo ato rum wogat wonai!” ²⁰Namon Egypt an aiwab rot an babadis dura wawaninai ifores sinai Abram awan rus siboes siyafares. Osi si gat on asi sawar tutufin osi ibinoanis on engon mat siboen sigat.

Abram Lot Rus Sikuseb

13 ¹On mes Abram awan rus, abun Lot a asi sawar engon tutufin mat siboen Egypt emon sigat sinai au Negev tafanam. ²Abram on foro bobaitu, agim silver a agim gold emon on inat sawarotin imatar. ³Ato on tafanam Negev emon on imateter inai Bethel tafanamai nan.

Menan ainau an guwi iyon imama nan, on min Bethel a Ai basusi. ⁴On efanai min matan ainau Abram sirifu agim kema iyon ato nan BADA ikwafirai.

⁵Lot on eb on abun Abram ba rus sibibib on toun an sheep, goat, cow, awan nanatun a an bobootis sigaraba mat iboes sinai. ⁶Ato Abram a Lot rus asi bobaitu on sison kwakwan ato on motobai wayo on men fofonin arimon nan kaita sitama. ⁷On mes Abram an bobaitu kaifarotis a Lot an bobaitu kaifarotis amosi gam imatar. On an werai Canaan sabu a Perizz sabu min nana on tafanamai simama.

⁸Namon Abram on Lot iyawur iyau, “Om on yau abu, on mes om am bobootis a yau au bobootis on men sitagam on. ⁹Om matam ereben enai tafanam namui yen on eit ato erubin, weie om rut tankuseb. Om on au asugagaf unnanan on, yau arimon au asumaiau anan; ato om au asumaiau unnanan on, yau arimon au asugagaf anan.”

¹⁰Lot matan iyeit inai Jordon roubaban sareu nunub on it. Ato on sareu nunub min on nanaba inai Zoar mafam aurin na, ato an itin on BADA an masau ba ai Egypt tafanam ba. (On an rai on BADA mafam gagamis Sodom a Gomorrah on men ikomasen.) ¹¹On mes Lot toun on Jordon roubaban sareu nunub tutufin on irubin ato au wera matan na inai. Abram a Lot rus min on nan sikuseb. ¹²Abram on Canaan tafanamai ima ato Lot on mafam gagamis sanasi mafam Sodom bisinai roubabanai nan guwi iyon ima. ¹³Sodom sabu asi yawas on komasin bag, osi BADA matanai on ra fufur bobo komasis bag sifofour.

¹⁴Lot on Abram ikirir inai gibunai, BADA Abram iyawur iyau, “Om menan etatawar nan on matam yeit enai au tanam a au gorof, au wera matan a au wera sifun. ¹⁵Yau arimon tafanam engon ato eitai on om anitem, om a wawam agirim auris mat ato on min arimon om ininoanim au wantoan. ¹⁶Yau arimon nanatum wawam agirim sigaraba motob an fofou ba on anitem, ato iyai iyafan fofonin motob an fofou iniyab on fofonin wawam agirim iniyab. ¹⁷Om emisir ebib enai tafanam au engon efatete einateteai yabin yau arimon on tafanam engon anitem.” ¹⁸On mes Abram on efan ikirir ato ikoi inai Hebron mafam nan Mamre wengar gagamis bisisi nan igoyon ima. Ato on nan sirifu agim kema iyon BADA aurin.

Abram Lot Ibaisin Iboseirai

14 ¹⁻²Wera fani sisawar gibunai, baigagam gagamin bag on nan Canaan tafanamai imatar. Ato aiwabis bat wabis min: Amraphel on Shinar mafam emon, Arioch on Ellasar mafam emon, Kedorlaomer on Elam mafam emon a Tidal on Goiim mafam emon on sigat tafanam tani an aiwabis engon nim on mat sitigagam mes. Osi aiwabis nim wabis min: Bera on Sodom an aiwab, Birsha on Gomorrah an aiwab,

Admah on Shinab an aiwab a Shemeber on Zeboiim an aiwab a Bela an aiwab orot (on mafam min ari seyoyorai Zoar), ³Osi aiwabis bat on Siddim roubabanai (on roubaban min seyoyorai Una Kamitin) nan wou orot kuayo gagamn mat sikaita. ⁴Kwanda engon auyotoat an yayatan ruam, osi aiwabis on Kedorlaomer an baibad babanai sima baise kwanda auyotoat an yayatan ton amonai osi sibosuruf Kedorlaomer fonan siseseir. ⁵Kwanda auyotoat an yayatan bat amonai Kedorlaomer a aiwabis ton asi wou orot mat sikaita sigat Rephai, on Astheroth Karnaim nan, Zuz on Ham nan, Emit on Shaveh Kiriath nan sigagam sisowar sabu engon sibomerubes. ⁶Mat osi sigagam sisowar Hor sabu, Seir oyau oyau nan simama a nana inai El Paran efan koiteterin bisinai simama on engon sibomerubes. ⁷Namon osi simatabir men sinai au En Mispbat (on min ari seyoyorai Kadesh), on nan sigagam sisowar Amalek tafanamai sabu engon tutufin sibomerubes a Amor yangan iyabon Hazazon Tamar nan simama on mat engon sibomerubes.

⁸⁻⁹Namon Sodom an aiwab, Gomorrah an aiwab, Admah an aiwab, Zeboiim an aiwab a Bela an aiwab (on min ari seyoyorai Zoar). Osi aiwabis nim on sigat sinai Siddim roubabanai nan baigagam an uwar sitein aiwabis bat mat sitigagam mes. Osi aiwabis bat min Kedorlaomer, Amraphel, Tidal a Arioch.

¹⁰On roubabanai nan on dogu amosi kolta rababaris siyen ato on an rai Sodom a Gomorrah asi aiwabis asi wou orot mat si yai on, asi wou orot fani on osi dogu amosi sifeu ato aiwab orot ton a asi wou orot fani on siyayai sinai au oyau. ¹¹Aiwab orot bat sisowar ato Sodom a Gomorrah asi sawar obis engon tutufin a asi bayu mat siboen sinai. ¹²Osi Abram abun Lot a an sawar gugu mat on engon siboen, yabin on Lot min Sodom nan imama.

¹³Orot tani i yai on totor wat inai Hebrew orot Abram ikasonai. Abram on Amor orot Mamre an wengar gagamis bisisi imama, on Eshcol a Aner tais tuas, osi min Abram tuturan, on mat sikaita simama. ¹⁴On an rai Abram dura itatam abun Lot on sifatumai, on an wou orot engon 318 iyabon on mat simama on iruayo is ato iboes mat sigib yeinis sinai Dan mafamai nan. ¹⁵Fom amonai Abram an orot engon ikusesebis asi efan asi efanai nan iyeinis ato mat sigagam sisowar ato sifaitanis sinai au Hobah mafam, Damascus au gorof na. ¹⁶Abram on sawar engon igaturen iboen men. Mat on abun Lot a an sawar gugu, jever fani a agirotis fani iboes imatabir.

Melchizedek Abram Imomoginai

¹⁷Abram on isowar Kedorlaomer a an aiwab tuturan mat ibomerubes gibunai imatabir men. On inat au go ato Sodom an aiwab orot on Shaveh roubaban emon igat itnefotai mes. (on Shaveh roubaban min ari

seyoyorai Aiwab An Roubaban) ¹⁸Namon Melchizedek, Salem an aiwab orot a God Aiyetunenei Bag an tafaror bainetewarotin on rafi sarar a sareu wine iboen inat Abram aurin. ¹⁹Melchizedek on Abram imomoginai ato iyawur iyau, “God Aiyetunenei Bag, on safam a tafanam Fourisotin on inimomoginem. ²⁰God Aiyetunenei Bag on tanifain taniduranai yabin on faiwar item ugagam usowar am ragit engon ubomerubes.” Ato Abram abi abi baigagam emon iboen inat on matas engon auyotoat iya ato on emon matan tani on ibo aiwab orot Melchizedek itai.

²¹Sodom an aiwab orot on Abram iyawur iyau, “Om abi abi engon tutufin on unbotanen, baise au sabu wat on eiteu men.”

²²Abram iyafotai iyau, “Yau on BADA God Aiyetunenei Bag, safam tafanam Fourisotin Wabinai abifaro, ²³yau men arimon am sawar gugu ai akikiman an uram turin wat on anbotan, onai om unau yau emon Abram inat sawarotin imatar. ²⁴Yau tou auriu on men abi tani anbotan on, baise bayu ato au orot siyam on wat anbotan. Baise yau tuturau Aner, Eshcol a Mamre on sawar turin wonites yabin osi on yau mat wanai waigagam.”

God An Dura Bo Baibasit Abram Rus Siyamai

15 ¹Abram Lot ibaisin gibunai, BADA on bomomoutai nan dura ibo igat Abram aurin ato iyawur iyau, “Om men unaber mes. Yau arimon om am beyan mes ba anmatar an rufafarim; ato am siwar on arimon gagamin bag anitem.”

²Baise Abram iyau, “O BADA au Aiwab, abi siwar arimon uniteu, yau on natu ambin on mes anrarabob gibunai on au bobo orot Eliezer Damascus emon on au buder engon on ininoanai.” ³Ato Abram iyau, “Om fifirig men uiteu, on mes yau au bobo orot on arimon au buder engon on ininoanai.”

⁴Namon BADA on bomomoutai dura ibo igat Abram iyawur men iyau, “Atonio bobo orot Eliezer on men arimon om am buder ininoanai on, baise om toum natum orot on arimon om am buder ininoanai.” ⁵BADA on Abram guwi emon ibo igat au koun ato iyawur iyau, “Om au safam etage ato efourtobon siribod uniyab, om am dam warar min arimon on nanaba inison siribod ba.”

⁶Abram on BADA itutumai, on mes BADA on Abram aurin iyasisir ato iyamai inat an yawas totorin imatar.

⁷Namon BADA on Abram iyawur iyau, “Yau on BADA, yau on Ur mafam Babylonia tafanam emon abonanawaiim ugat, atonio tafanam atitem om itinoanim mes.”

⁸Baise Abram iyau, “BADA au Aiwab, yau mamaba ansagob atonio tafanam on arimon yau ininoaniu?”

⁹On mes BADA on Abram iyafotai iyau, “Om Cow, goat a sheep tona kakaita kakaita asi kwanda ton a kumag a maufor on eboen enat auriu.”

¹⁰Abram osi bobaitu iboen inat God aurin, iyasububunuen weie on basui itaraseseben ruruam simatar ato reban reban iya, baise kiwiu on men itaraseseben on. ¹¹Namon kikim sisur bobaitu bios sitam mes, baise Abram ifaitanis sinai.

¹²On an rai wera inai isofafir, Abram iyeinir nousin ifot bag iyen bubur, ato wouman beruber komasin on inat itaragabuai. ¹³Namon BADA Abram aurin iya, “Om am dam warar on arimon sabu touman sinmatar sabu fani asi tafanamai sinama, ato tafanam matuanis on sinmisir siniyames auris siniagir a sinikokosaris inan kwanda 400 insawar. ¹⁴Baise yau arimon osi sabu iyabon siyames sebiagires on animakies, ato on an werai tafanam touman sinbikirir on, osi arimon sawar gagamin auman sinboen singat. ¹⁵Ato om toum on arimon nana unama inan uniorokwar bag weie tufai unarab ato singlarobim. ¹⁶Om nanatum a wawam mat on engon wonarab insawar weie om agirim on sinmatagir men sinned atonio tafanam sinboai. Yau Amor sabu on men gariwat anfaitanis singat. Ab osi asi bobo komasis sinfour on inarat gagamin bag weie osi animakies ato anfaitanis singat.”

¹⁷Wera inai isur iwouman ato rakaita sigun er an wairaf bakur auman a tafa yoyourin mat nan sirobotet ato bobaitu biyos siyen on sanasi sirabon sinai. ¹⁸On rai BADA on Abram rus dura bo baibasit siyamai ato BADA on Abram iyawur iya, “Yau aumatanim om am dam warar on atonio tafanam engon tutufin anites. Egypt sareu kafakakai an farat inai Euphrates sareu gagamin an faratai. ¹⁹Mat osi arimon Ken yangan, Kenizz yangan, Kadmon yangan, ²⁰Hitt yangan, Perizz yangan, Rephai yangan, ²¹Amor yangan, Canaan yangan, Gergash yangan a Jebus yangan asi tafanam mat engon sinboai.”

Hagar A Ishmael Rus

16 ¹Abram awan Sarai on men fifi tani ituai on. Baise Sarai an bobo jeverei wabin Hagar, on min Egypt emon on rus simama, ²on mes Sarai on Abram aurin iya, “BADA on yau irufoteu men fofonin fifirig anitu on. On mes om enai au bobo jeverei rum wonen; tait on jeverei emon weie fifi inituai weineu.” Ato Sarai dura aifan iya on Abram ibasitai. ³On mes Abram awan Sarai on an bobo jeverei Hagar, Egypt emon on ibo awan Abram itai on awan mes. (Abram tafanam Canaan nan ima kwanda auyotoat isawar gibunai atonio bobo imatar.) ⁴On mes Abram on Hagar rus siyen ato Hagar inafot. On an rai Hagar isagob on inafot, on ibosuruf igigimemen a on an bada jever Sarai ibisuweiganai.

⁵Namon Sarai on Abram aurin iya, “Om am komasin emon on Hagar yau ebisiweiu. Yau au bobo jeverei aitem, ato ari isagob on inafot on mes yau ebisiweiu. BADA om yau rut ati dura infofon, iyafan an dura on totorin wat!”

⁶Abram iyafotai iyau, “Obin bag, am bobo jeverei on om am baibad babanai emama ato aifan enonosin on nanaba aurin unafour.” Namon Sarai on yawas wawaninai Hagar aurin ifofour, on mes Hagar iyayai inai.

⁷BADA an anea on efan koiteterinai kibubur sareu bisinai nan Hagar igaturai. On kibubur sareu min eta au Shur inan bisinai. ⁸Ato anea iyau, “Hagar, Sarai an bobo jever om men emon ne unat ato aume na enan?” Hagar iyafotai iyau, “Yau au bada jever Sarai on aai kirir.”

⁹Namon BADA an anea iyau, “Om ematabir men enai am bada jever aurin ato on an baibad babanai unama unabo.” ¹⁰Namon anea an dura ibotein iyau, “Yau arimon am dam warar sigaraba bag anitem, ato men iyafan tani fofonin iniyab on. ¹¹Om arimon fifi orot unituai, wabin unyorai Ishmael,^d yabin BADA am yababan am tou on itatam nono. ¹²Baise om natum orot on arimon rega donkey ba inama, on arimon sabu engon auris iniragit ato sabu engon min natum orot aurin siniragit. On arimon ekesin wat mabinai inama, men an dam warar mat.”

¹³On mes Hagar on toun itetemai iyau, “yau min dura bag God ait ato anmama sabu ankasones?” BADA on Hagar aurin ikakafun on mes Hagar on wabin iyor, “God on yau eiteu.” ¹⁴On fasinai dogu sareu ato Kadesh mafam a Bered efan basusi yen on sabu seyoyorai,^e “BADA Yayawain On yau eiteu, on an dogu Sareu.”

¹⁵Hagar on Abram natun orot ituai ato Abram iwabai Ishmael. ¹⁶On an werai Abram an kwanda on orot wat bat an yayatan nimtereban kaitamom.

Askibubu On Dura Bo Baibasit An Matair

17 ¹On an werai Abram an kwanda on orot wat bat, orot ta aurin auyotoat an yayatan bat, BADA on Abram aurin irobotet ato iyawur iyau, “Yau on God Faiwariu bag.^f Om Yau auriu unifonabo a ra fufur am yawas totoris wat unafour. ²Yau arimon au dura bo baibasit rut taniyamai ato am dam warar on sigaraba anitem.” ³Abram sindan irou ikwafir isur magin motob iruyein, ato God on iyawur iyau, ⁴“Yau atonio dura bo baibasit om rut tabiyamai: Yau aumatanim, om on arimon sabu sigaraba wawas agiris unmatar. ⁵Om wabim Abram yen on abikitabirai Abraham,^g yabin Yau afofourim unnat sabu sigaraba wawas agiris unmatar. ⁶Yau arimon wawam agirim sigaraba anitem, ato am dam warar inison tafanam engon sinboai. Ato fani on arimon sinnat aiwab sinmatar.

^d 16.11 Hebrew dura wab Ishmael an yabin min, God itatam. ^e 16.14 Hebrew dura wab Beer Lahai Roi an yabin tani on, BADA Yayawasin On yau eiteu on an dogu Sareu.

^f 17.1 Hebrew dura El-Shaddai an yabin min, Yau on God Faiwariu Bag. ^g 17.5 Hebrew dura wab Abraham an yabin on atonio nanaba, sabu babaisonis tamas.

⁷Yau arimon aumatan om aurim a wawam agirim gibui sinrarat auris on anbokikin dura bo baibasit mes wantoan inen. Yau on arimon om am God a wawam agirim asi God. ⁸Om ari ato Canaan tafanamai emama on sabu fani asi tafanam. Ato Yau arimon om a wawam agirim atonio tafanam tutufin engon anitem nan wonama au wantoan, ato Yau on arimon om wawam agirim asi God.”

⁹God on Abraham aurin iyau, “Om a wawam agirim gibui serarat mat on wonifonabo au dura bo baibasit wonbokikin: ¹⁰Om a wawam agirim on engon wonibasit ato orot engon sanamui on woniaskibubues. ¹¹⁻¹²Ato ari ra on unbosuruf fifirig orot gugudis serarat ra nimoreban baitonin gibunai on engon woniaskibubues, on eb om am agirotis am goai sirarat a agirotis tafanam fani emon utotobonis on engon woniaskibubues. Onai iniyoboet om a Yau rut on basuti dura bo baibasit on yen. ¹³Orot kakaita kakaita engon woniaskibubues. Atonio usis an matair nan baiyoboen iniyamai on Yau au dura bo baibasit om Yau rut basuti on wantoan inen. ¹⁴Orot iyafan men woniaskibubuai on arimon men an sabu mat sinama mes. Yabin on orot min Yau au dura bo baibasit iyastob ato on mabinai bag inama.

¹⁵Mat God on Abraham aurin iyau, “Om awam wabin Sarai on men gibui unyorai men Sarai. On ari on wabin Sarah. ¹⁶Yau arimon Sarah animomoginai ato on dura bag natum fifi orot inituai weinem. Yau arimon animomoginai ato on innat sabu engon tutufin ayos inmatar. Ato arimon wawan agirin sanasi on fani on arimon aiwab sinmatar.

¹⁷Abraham sindan irou ikwafir isur magin motob iruyein iserer ato toun aurin iyau, “Orot an kwanda orot wat nim min fofonin arimon fifi orot inarat i? Ato Sarah an kwanda orot wat bat, orot ta aurin auyotoat min fofonin arimon fifi inituai i?” ¹⁸Abraham on God aurin iyau, “Abifefeyanim, fofonin aumatan yau auriu ubiyamai on Ishmael on buder on itboai i?”

¹⁹Baise God iyau, “Ambin bag! Om awam Sarah on arimon natun fifi orot inituai ato wabin unyorai Isaac.^h Yau au dura bo baibasit on fifi orot a wawan agirin auris aniyamai. On dura bo baibasit on arimon inen wantoan au wantoan. ²⁰Om Ishmael aurin ubifefeyaniu on atatam nono. Yau arimon animomoginai a nanatun a wawan agirin sigaraba anitai. On arimon aiwabis auyotoat an yayatan ruam tamas inmatar a Yau arimon anfourai wawan agirin sinnat sabu faiwaris bag sinmatar. ²¹Baise Yau arimon au dura bo baibasit on natum Isaac aurin anbokikin. On fifi orot min arimon Sarah inituai atonio wera nanaba inan kwanda tani.” ²²On an werai God on Abraham aurin dura ikakafun isawar ato On ikirir inai.

²³On ra kaitamomai Abraham on God aurin ifonabo ato natun Ishmael a orot fani an goai simama on engon iaskibubues, on eb Abraham an

^h 17.19 Hebrew dura wab Isaac an yabin min, on iserer.

agirotis on an goai sirarat a agirotis fani tafanam fani emon itotobonis, osi engon iaskibubues. ²⁴⁻²⁵ Abraham an kwanda on orot wat bat, orot ta aurin auyotoat an yayatan nimtereban bat (99), ato on natun Ishmael an kwanda on auyotoat an yayatan ton, ato rus engon siaskibubues. ²⁶ Osi rus on ra kaitamomai nan siaskibubues. ²⁷ Abraham an agirotis mat engon siaskibubues.

BADA Abraham IyauMatanai Natun Orot Inarat Aurin

18 ¹ BADA on Abraham aurin irobotet menan Mamre wengar gagamis sitatawar nan. Abraham on aiyet nanaba an guwi metewan awanai nan imair imama, yabin wera ifoforab kwakwan on mes. ² Abraham matan iyeit inai orot ton nan sitatawar ites. On ites mom on ra kaita imisir iyayai igat inai itnefotes mes. On sindan irou ikwafir isur magin motob iruyein, ³ ato iyawures iyau, “Au kavian, abifefeyanim wotawar men wonikirireu wonan mes, yau on atonio, omi aurim anabo. ⁴ Omi nin wengar babanai wonbiyarir ato yau sareu anboai annat amm wonsouen. ⁵ Yau arimon ami bayu kafakai anbotitiwag onai omi faiwar wonboai weie ami etai wonabib wonan. Omi wonat yau au goai on mes yau omi aurim anabo.” Osi orot ton siyafotai siyau, “Basit, dura ato uyau on nanaba tanafour.”

⁶ Abraham sasasan wat imatabir men an guwi amonai irui ato Sarah aurin iyau, “Gariwat! Rafi obin ato baik amonai yen on ebo egamatabir sarar eteren.” ⁷ Namon Abraham iyayai inai an bobaitu sigaraba sitatawar on nan ato sanasi tona boboun momon on ibo ato an agirotin itai, on sasasan wat iyasubun itab. ⁸ Abraham rura momon turin, cow an sus a cow bios iboen ato orot ton nasi nan iya. Osi orot ton bayu siyam ato Abraham on wengar babanai nan bisisi itatawar.

⁹ Namon orot ton Abraham sitetemi siyau, “Om awam Sarah on menan?” Ato on iyafotes iyau, “Sarah on guwi amonai emama.”

¹⁰ Osi sanasi orot tani on iyau, “Ari ra inan roke nimtereban bat insawar gibunai, yau arimon anmatabir men ato om awam Sarah on arimon fifi orot inituai.” Sarah on ato orot dura ibikakafun on kounai bag guwi metewan awanai imair imama itatam. ¹¹ Abraham Sarah rus on siorokwar sijenekwar bag, ato Sarah on fifirig baitu an wera on isawarai. ¹² On mes Sarah on toun aurin iserer ato iyau, “Yau ari on ai jenekwar a atumusur, mat awau on eb iorokwar ato men fofonin rui wanen waniyasisir on.”

¹³ Namon BADA on Abraham itetemi iyau, “Aibo mes Sarah iserer ato iyau, ‘Yau on ai jenekwar bag ato men fofonin fifi anituai on?’ ¹⁴ Atonio on men bobo aifan tani wawanin BADA aurin on. Yau awurem au, ari ra inan roke nimtereban bat insawar weie yau anmatabir men ato Sarah arimon fifi orot inituai.”

¹⁵ Ato Sarah on iber ato isosouf iyau, “Yau men aserer on.” Baise BADA iyafotai iyau, “Ambin, om dura bag userer.”

Abraham Sodom Aurin Wawaninai Ifefeyan

¹⁶ Namon orot ton simisir ato sinai efan menan Sodom mafam gagamin sitinateteai mes. Ato Abraham on osi mat sinai eta nenennai itikirires sitan mes. ¹⁷ Ato BADA on Toun aurin ikakafun iyau, “Yau atonio bobo anfofour on men Abraham anibuniai mes. ¹⁸ Abraham wawan agirin arimon sabu gagamis a faiwaris bag sinmatar. Ato on orot fasinai, Yau arimon sabu tutufin engon animomogines. ¹⁹ Yau on arubinai onai on nanatun, wawan agirin dura wawaninai inawures Yau auriu sinifonabo a bobo obis a totoris wat sinafour. Osi on bobo sinfofour on Yau arimon bobo tutufin engon aurin anafour mamaba aumatana ba.”

²⁰ Namon BADA on Abraham aurin iyau, “Yau dura atatam Sodom a Gomorrah sabu on yawas ta ta komasis sigaraba sefofour ato asi bokomas on irat kwakwan. ²¹ On mes Yau an sur anan sabu anites ansagob dura aifan atatam on dura bag ai ambin.”

²² Namon orot ruam simisir sinai au Sodom, baise BADA on Abraham rus nan sima. ²³ Abraham on BADA aurin itawadudun ato itetamai iyau, “Om on dura bag arimon sabu obis a sabu komasis mat unikomasis? ²⁴ Ato sabu obis orot ruam, orot ta aurin auyotoat (50) nan mafam gagamin amonai sinmama on, Om arimon osi mat engon unikomasis? Om fofonin sabu orot ruam, orot ta aurin auyotoat utnosis ato utiyawasis? ²⁵ Dura bag men sabu obis on sabu komasis mat unirabobis on. On men yawas obin on. Om men nanaba uniyamai. Om bobo nanaba unfoufour on sabu obis a sabu komasis mat engon baimaki sinboai. On men yawas obin on. Om tafanam tutufin engon an baigurubaban orot on mes bobo totorin wat unafour.”

²⁶ BADA iyafotai iyau, “Yau sabu obis orot ruam, orot ta aurin auyotoat Sodom mafam amonai angagatures on yau arimon osi fasi on mafam gagamin tutufin an kabera.” ²⁷ Abraham ikakafun men iyau, “BADA, yau on isar fofou wat baise yau on uniu ererekab aurim dura anikakafun men. ²⁸ Baise tait sabu obis on men orot ruam, orot ta aurin auyotoat on, arimon sabu orot ruam an yayatan nim wat. Ato sabu nim ambin min, Om arimon mafam gagamin unikomasai?”

BADA iyafotai iyau, “Yau sabu obis orot ruam an yayatan nim angagatures on, Yau arimon men mafam gagamin anikomasai on.”

²⁹ Abraham ikakafun men iyau, “Ato sabu arimon orot ruam wat nan sinmama on mamaba.”

BADA iyafotai iyau, “Sabu obis orot ruam wat nan on, men arimon mafam gagamin anikomasai on.”

³⁰ Abraham iyau, “BADA abifefeyanim men auriu uniyatatab mes, baise yau anikakafun men. Ato sabu obis orot kaitamom, orot ta aurin auyotoat on arimon mamaba?”

BADA iyau, “Yau sabu obis orot kaitamom, orot ta aurin auyotoat angagatures on, yau arimon men mafam gagamin anikomasai on.”

³¹Abraham iyau, “BADA abifefeyanim yau uniu ererekab aurim nana an bikakafun on einotbureu. Ato sabu obis orot kaitamom wat un-gagatures on arimon mamaba?” BADA iyau, “Yau sabu obis orot kaitamom wat angagatures on, arimon men mafam gagamin anikomasai on.”

³²Abraham iyau, “BADA abifefeyanim, auriu men uniyatatab mes. Yau agogoi dura kaitamom wat ba aurim anikakafun. Ato sabu auyotoat un-gagatures on arimon mamaba?” BADA iyau, “Yau sabu obis auyotoat wat angagatures on, Yau arimon men mafam gagamin anikomasai on.”

³³BADA on Abraham aurin ikakafun isawar ato inai. Ato Abraham on imatabir men inai an au go.

BADA Sodom A Gomorrah Ikomasai

19 ¹On an rai anea ruam on rabirabi sinat au Sodom ato Lot on mafam gagamin an furi awanai nan imair imama. On iyeit osi ites mom on, on imisir ato inai itnefotes mes. On nasi sindan irou ikwafir isur magin motob iruyein, ²ato iyau, “Kavian, yau on atonio, omi aurim anabo ato abifefeyanim, omi wonat au goai. Omi amm wonsouen ato fom mat nin tanen weie raso fomenei fomenei wonmisir ato ami etai wonabib wonan.”

Baise osi siyafotai siyau, “Ambin, wei fom on arimon nin mafam gagamin an furi amonai efan farabai nan wanen.”

³On nana idodois on mes mat sinai an goai. Lot an bobo orot ifores rafi sarar fani siteren a siu obis sibotitiwag nanawan sabu auris. Osi sibotitiwag isawar ato sites siyam.

⁴Nanawan sabu ruam on sibotitiwagis sitar siten bubur mes ato Sodom mafam gagamin an orot engon tutufin, orot bobous a oroti engon sinat Lot an goa sireben fifin. ⁵Osi Lot aurin siyor ato sitetemai iyau, “Ato orot sinat ari fom om mat en mes on menan? Om wei auri eboes egat.” Sodom orot sigogoi on osi mat sitiyyar mes.

⁶Lot igat au koun ato metewan koun emon irufot. ⁷On auris iyau, “Tuturau, abifefeyanim, omi men bobo komasin on nanaba woniyamai mes! ⁸Woit, yau nanatu jeverig ruam, osi on matafis semama. Yau osi anboes angkat omi aurim ato aifan wogogoi nanaba auris wonafour. Baise atonio orot auris on men aifan tani wonafour mes; osi on nanawanotis sinat au goa rufafarin amonai semama.”

⁹Baise osi siyau, “Om on orot toumanim, wei ai eta erereb. Om iyafan on wei unawurei nanaba wanafour? Om men wai eta unrereb on, wei arimon komasin bag om aurim wanafour men osi orot ruam ba.” Ato osi Lot augib na sirukou ato sigai metewan sitaseb sitar mes. ¹⁰Baise orot

ruam goa amon emon on imas siyotet igat Lot sitein men irui ato metewan sirufot. ¹¹Namon osi orot ruam on sabu engon tutufin ato kounai sitatawar on sirou matas siwouman, men fofonin metewan sititai on.

Lot Sodom Ikirir

¹²Orot ruam Lot siyawur siyau, “Om abaim tani wat nin emama; nanatum orot, nanatum jeverig, rarawam orot ai dam warar fani nin mafam gagaminai semama on unboes wongat, ¹³yabin wei atonio efan wanikomasai. BADA atonio osi sabu asi dura komasis gagamis on itatam nono, ato wei iyafarei wanat Sodom wanikomasai mes.”

¹⁴Namon Lot inai orot iyabon nanatun jeverig sitiawanis mes on iyawures iyau, “Omi gariwat atonio efan woikirir wogat; BADA efan inikomasai.” Baise osi sinos on ibikobo.

¹⁵Ra iyabaseb nan ato anea sifourtobon Lot sitiyaigiginai mes. Osi siyau, “Om awam a nanatum jeverig ruam eboes ato gariwat wogat. Omi on nanaba wonfofour on arimon men ami yawas wonisiwanen on, an rai BADA mafam gagamin inbikomasai nan.” ¹⁶Baise Lot on inonot sisit on mes men gariwat iyayob on. On fasinai orot ruam on Lot a on awan a nanatun jeverig ruam imasi siboen ato sibonanawaiis mafam gagamin emon sigat. Yabin BADA on Lot an dam wara mat ikaberes. ¹⁷Namon anea tani iyau, “Omi ami yawas wonnos woniyai! Men au gib won rutabir a men roubabanai wontawar mes. Omi au oyau woniyai onai omi men wonarab.”

¹⁸Baise Lot iyafotes iyau, “Ambin! au kavian, abifefeyanim men woniyamai on nanaba eta weromin wanan mes. ¹⁹Om on am moa obin yau auriu a ukabereu, mat Om yau uyawasiu. Baise yau men fofonin anayai anan oyauai angat on. Komasin arimon innat inboeu anarab. ²⁰Ato om mafam kafakakai uit i? On on akwafui. Eiyameu nan aniyai anan, eit on asir mafam kafakakai wat ato yau arimon inrufafareu.”

²¹Anea iyafotai iyau, “Engon basit wat, abibasitem. On mafam arimon men anikomasai. ²²Baise om gariwat uniyai, Yau men bobo aifan tani aniyamai ab om ainau unan on efanai ungtat weie.

Lot on mafam aurin iyor kafakakai, on mes on mafam wabin min seyoyorai Zoar.

BADA Sodom A Gomorrah Ikomasai

²³Wera igegeg an rai on Lot inat Zoar igat. ²⁴Ra kaita BADA agim forabis wairaf auman safam emon iyafarai usan ba iyar isur mafam gagamis Sodom a Gomorrah tefasi, ²⁵ato roubabanai sabu simama engon tutufin a nan wengar a wayo sigegeg on engon ikomasen. ²⁶Baise Lot awan on au gib irutabir men ato on ra kaita ikitabirai inat agim kamitin imatar nan itawar.

²⁷On ra kaitamomai Abraham fomenei fomenei imisir sasasan wat inai efan menan ainau BADA nanai itatawar on nan. ²⁸On iyeit isur Sodom a Gomorrah iten a roubaban tutufin engon on bakur it motob emon igeg. On bakur igegeg an itin on momo fofotar yaras bakur gugugurin egeg ba on igeg. ²⁹God mafam gagamis ato roubabanai siyen on engon ikomasen menan Lot imama nan, baise On Abraham an baifefeyan on inonotai on mes Lot komasin itgagaturai emon on irufafarai ibo igat iyawas.

Moab Sabu A Ammon Sabu Asi Bosurufin

³⁰Lot on Zoar nan ma on iber, on mes on a nanatun jeverig ruam mat sigai oyauai nan agim dogu amonai sima. ³¹Ra kaitamom ainau jeverei on tain aurin iyau, “Ot tamat on ebiorokwar ato nin tafanamai on orot ambin iyafan arimon iniawanit fifirig tanitu, ato tafanamai sabu sefour ba. ³²Om enat ot tamat taniyamai intoman inikokok, onai ot mat tanen ato on emon on ot fifirig tanitu.” ³³On fom osi jeverig ruam on tamas sareu wine sitai itoman ato ainau jeverei on rus siyen. Baise tamas on itoman kwakwan ikokok on mes men isagob jeverei mamaba bisinai iyen imimisir on.

³⁴Ra bairuinai ainau jeverei on tain giya jever iyawur iyau, “Yau fom tamat rui waien; ato ari fom on taniyamai intoman inikokok men ato om ba rum wonen. Namon ot tamat emon on arimon fifirig tanitu.” ³⁵On mes on fom tamas sibo sitomanai kwakwan ikokok ato giya jeverei ba taman rus siyen. On bobo min on nanaba imatar men, tamas itoman kwakwan ikokok ato men isagob jeverei mamaba bisinai iyen imimisir on. ³⁶Atonio on etai Lot nanatun jeverig ruam tous tamas emon on sinafot. ³⁷Ainai jeverei fifi orot ituai, on iwabai Moab. On fifi wawan agirin min ari seyoyores Moab yangan. ³⁸Giya jeverei on eb fifi orot ituai, on iwabai Ben-Ammi. On fifi wawan agirin min ari seyoyores Ammon yangan.

Abraham A Abimelech

20 ¹Abraham Mamre emon au baban na isur inai Canaan tafanam turinai ato Kadesh a Shur basusi nan ima. On gibunai on inai Gerar nan imama, ²Abraham on Gerar sabu ikasones awan Sarah on on robun. On mes Gerar an aiwab orot Abimelech on an bobo orot iyawures sinai Sarah sibo sinat aurin. ³Fom tani God bomomoutai nan Abimelech iyawur iyau, “Om on arimon unarab, yabin ato jever on toutabinin on ubo.”

⁴Baise Abimelech on men jever usin iruyein ato iyau, “BADA, yau on au komasin ambin! Ato Om min yau au sabu mat unikomasi i? ⁵Abraham toun iyau on robun Sarah ato Sarah on eb nanaba iyau. Yau atonio afour on au not rubunaginai wat a mat yau men komasin ta aiyamai on.”

⁶God on bomomoutai iyafotai iyau, “Dura bag, yau asagob om ufour on am not rubunaginai wat on mes, osi emon arufafarem Yau auriu men utbokomas a men aibasitem jever usin utbotobon.” ⁷Baise ari on jever ebo awan orot eitai men. Abraham on aubairuruotin, on arimon om aurim inbayoi ato om men unarab. Baise om jever men unbibitai men on, Yau tainam ayeeyenin on om arimon unarab, om a am sabu mat engon.

⁸Ra itom fomenei Abimelech an bobo babadis engon iyores sinat ato bobo aifan imamatar on ikasones, ato osi men sunub siber. ⁹Namon Abimelech on Abraham iyor inat ato itetemai iyau, “Om wei auri aifan ufour? Yau aifan komasin om aurim afour mes on atonio komasin gagamin ubo unat yau au baiaiwab amonai? Men iyafan tani itafour on om yau auriu ufour. ¹⁰Om aibo mes atonio bobo nanaba ufour?”

¹¹Abraham iyafotai iyau, “Yau atonio bobo afour yabin yau men ainonot omi on God wokakafai. On fasinai yau aidura bag omi arimon wotasubunueu ato awau wotboai. ¹²Dura bag on yau robu. On on yau tamau natun, baise men ayau emon on ato abo ai awan. ¹³On mes on an rai tamau an goa emon God iyafareu anai tafanam toumanai, yau Sarah aurin au, ‘Om unfaskikin yau auriu on baiyoboan unbiyamai sabu unkakasones yau on om robum.”

¹⁴Namon Abimelech on Sarah ibo Abraham itai men a sheep, cow a agirotis mat itai. ¹⁵Abimelech on Abraham aurin iyau, “Au motob tutufin atonio ato om am gogoi ai efan menan unrubin on nan unama.” ¹⁶Ato on irutabir Sarah aurin iyau, “Yau on robum agim silver 1,000 nanaba abitai, onai sabu iyabon om mat womama inkasones om on am komasin ambin, sabu engon arimon sinsagob om on men aifan komasin ufour.”

¹⁷⁻¹⁸Bobo aifan Abraham awan Sarah aurin imatar on mes, BADA iyamai Abimelech an aiwab goa amonai jever men fofonin fifirig sititu on. On mes Abraham ibayoi Abimelech aurin ato God iyawasai. Abimelech awan a an agirotis jeverig mat siyawas ato fofonin arimon fifirig sinitu.

Isaac Irat

21 ¹BADA on Sarah imomoginai ato mamaba iyau matanai on nanaba ifour, ²Abraham iorokwar tefanai weie Sarah inafot ato fifi orot ituai. Fifi irarat on God wera iyau i yen on nan irat. ³Abraham fifi orot iwabai Isaac. ⁴Ato Isaac irat ra nimtereban ton an werai on Abraham natun iaskibubuai, mamaba God iyau i yen on nanaba. ⁵Abraham an kwanda on orot wat nim (100) an werai on Isaac irat. ⁶Sarah iyau, “God on yasisir a serer ibo inat auriu. Sabu engon durau sintatam arimon yau mat wanserer.” ⁷Namon on dura ibotein men iyau, “Iyafan wat Abraham itetemai, Sarah min arimon fifi inituai i? Ato baise woit! orokwar tefanai yau natun orot aituai.”

⁸Fifi orot irat gagamin ato sibtasiarai an werai nan Abraham forag gagamin iyamai.

Hagar Natun Ishmael Rus Siyafares Sinai

⁹Ra tani Abraham natun Ishmael, Egypt jever Hagar ibituai on, on Sarah natun Isaac rus sikwakwarer. ¹⁰Sarah osi ites ato Abraham aurin iyau, “Atonio agir jeverei natun fifi orot rus on eiyafares senai. Atonio jever natun on men yau natu Isaac an buder turin inboai mes. ¹¹On dura emon on Abraham men sunub iyababan, yabin Ishmael mat on eb on natun. ¹²Baise God on Abraham iyawur iyau, “Om fifi a am agir jever Hagar auris men uniyababan mes. Aifan Sarah yawurem on nananba eiyamai, yabin Isaac emon on arimon wawam agirim sinarat, on min aumatanim nono. ¹³Yau arimon agir jeverei natun on eb nanatun sigaraba anitai, onai osi arimon sinat tafanam tutufin an sabu sinmatar. On mat min om natum orot.”

¹⁴Ra itom fomenei fomenei Abraham bayu fani iboen a kibub foro korofinai siyamai on sareu ibonuai ato Hagar itai. Abraham fifi orot Hagar kounai iyagai ato iyafares sinai. Hagar natun rus sidadanam sinai Beersheba efan koiteterinai nan sigat. ¹⁵Sareu engon isawar an werai, Hagar on fifi wengar babasi nan ikirir, ¹⁶ato on kafakai wat inai mabinai nan imair. On toun aurin ikakafun iyau, “Yau men fofonin natu anitai inarab on.” On nan imair imama ato ibosuruf itotou.

¹⁷God on fifi itotou on itatam ato an anea safam emon Hagar aurin ikakafun iyau, “Hagar, om aifan ebiyababanim? Men unaber mes. God on fifi an tou itatam. ¹⁸Om emisir enai fifi ebogai ato ekubainunubai. Yau arimon on wawan agirin an fouris sinnat sabu sigaraba bag sinmatar.” ¹⁹Namon God Hagar matan iruseren ato sareu dogu it. On inai ato kibub sareu ibonuai ato turin fifi orot itomanai. ²⁰God on fifi bisinai imama ato fifi on irat gagamin imatar. Ishamel on efan koiteterinai nan ima ato inat bo am an orot gagamin bag imatar. ²¹Fifi orot on nan Paran efan koiteterinai imama ato ayon on inai Egypt nan jeverei igatuai wein on itiawan mes.

Abraham Abimelech Rus Basusi Dura Bo Baibasit Siyamai

²²On an werai Abimelech a baigagam an baintewar orot gagamin wabin Phicol rus sinai Abraham aurin. Namon Abimelech on Abraham iyawur iyau, “Yau asagob, God on bisimui emama on mes bobo engon tutufin ebiyamen. ²³On mes om God matanai unaumataniu on om men baisigogo yawas yau auriu, nanatu auris a wawau agiriu auris unafour mes. Yau on bobo obin wat aurim afour on mes om unau mataniu angaramin bobo obin wat auriu unafour a atonio tafanam amonai emama aurin mat.”

²⁴Abraham iyau, “Engon basit wat, yau aumatanim.”

²⁵Namon Abraham mat iyawarib Abimelech aurin ato an agirotis simisir waniai nan sareu dogu tani siyabaruai aurin on. ²⁶Basie Abimelech iyau, “Yau men asagob atonio bobo on iyafan iyamai. On aurin on men dura tani ukasoneu on, yau ato ari weie atam.” ²⁷Namon Abraham sheep a cow fani iboen Abimelech itai ato rus dura bo baibasit siyamai. ²⁸Abraham on an sheep unis sigaraba amon emon on sheep bobous nimtereban ruam iboseseren mabisi iya, ²⁹ato Abimelech on itetamai iyau, “Om aibo mes on bobo nanaba ufour?” ³⁰Abraham iyafotai iyau, “Yau agogoi om atonio sheep bobous nimtereban ruam on unabo ininoanim. Ato om bobo nanaba unbiyamai on, ebi dura bag dogu sareu on yau asar.” ³¹On mes on efan siyor Beersheba, yabin on nan on orot ruam siyaumatan bonen.

³²Osi dura bo baibasit Beersheba nan siyamai isawar gibunai, Abimelech a Phicol rus simatabir men sinai au Philistia. ³³Namon Abraham wengar tamarisk ibo Beersheba nan itanum ato BADA God Mama Wantoanin on ikwafirai. ³⁴Abraham wera weromin bag Philistia nan ima.

God Abraham An Baitutum Irutobonai

22 ¹Kwanda fani sisawar gibunai, God on Abraham an baitutum irutobonai ato iyawur iyau, “Abraham!” Ato Abraham iyafotai iyau, “Men, yau nio!”

²Namon God iyawur iyau, “Om natum kaitamom wat Isaac, om am nuabo bag on unboai unan Moriah tafanamai nan. Yau arimon oyau tani aniyoboem on tefanai nan natum unasubun ato unterai sirifu mes auriu unkutetai.”

³Ra itom fomenei, Abraham imisir an donkey tefanai sifumama iyous ibotitiwag, weie sirifu terin an wegar fani iyasutuenen donkey tafanai iyagai. On natun orot Isaac a an bobo orot ruam iboes mat sinai tafanam menan God iyawur on nan. ⁴Ra baitoninai Abraham matan iyeit inai efan nanenei nan it. ⁵Ato on an bobo orot ruam iyawures, “Omi nin donkey mat wonmama ato yau on fifi orot rui wanan nan God wankwafirai ato wanmatabir men wannat.”

⁶Abraham sirifu terin an wengar ikafurir ibo natun Isaac itai iyabar ato on toun on wairaf aiduf a nikok iboen. Osi kaitenei sibib sinan, ⁷ato Isaac awan itagai taman itetamai iyau, “Bab!” Abraham iyafotai iyau, “Men, yau natu?” Isaac iyau, “Wairaf a nikok on atonio ato sheep boboun sirifu terin aurin on menan?”

⁸Abraham iyafotai iyau, “Yau natu, God Toun on arimon sheep boboun inbononoat sirifu terin aurin,” ato rus kaitenei sibib sinai.

⁹Namon osi sinai efan menan God iyawur on nan sigat, Abraham sirifu agim kema iyon ato wengar tefanai iruyabar, weie on natun Isaac ann,

iman ifatumen ato sirifu agim kema tefanai iyenuai. ¹⁰ Abraham iman iyof an nikok ibo, asun itagai natun itasubun mes. ¹¹ Ra kaita BADA an anea safam emon aurin iyorir iyau, “Abraham, Abraham!” On iyafotai iyau, “Men, yau nio.”

¹² Anea iyawur iyau, “Om imam men fifi orot usinai unyein a men aifan tani aurin uniyamai mes. Ari weie asagob om on God e kakafai yabin om natum orot kaitamom wat on God aurin men urugagarai on.”

¹³ Namon Abraham au koun na irutabir ato iyeit rega fofotanai sheep tona an geg ai nan wengar famenai itarun itatawar it. Abraham inai sheep tona ibo iyasubun ato natun orot an efan igaraminai sirifu iter God aurin ikutetai. ¹⁴ On fasinai Abraham on efan iwabai iyau, “BADA Arimon Inbononoat” on mes sabu ari ra nana seyoyorai sau, “BADA An Oyauai Nan Arimon Inbononoat.”

¹⁵ BADA an anea wera bairuin ba safam emon Abraham aurin iyorir ato iyawur iyau, ¹⁶ “BADA ato nanaba iyau, ‘Yau Tou Wabiui abifaro yabin om Yau auriu uifonabo ato natum orot kaitamom wat men urugagarai on, ¹⁷ yau arimon dura bag animomoginem ato aniyamai wawam agirim on sinison safamai siribod a tore an gasa ba. Om wawam agirim on arimon sinsowar asi ragit sinbomerubes ato asi mafam gagamis on osi sininoanis. ¹⁸ Om am fesi faisisi on sabu tafanam au engon arimon baimomogin sinboai, yabin om yau auriu uifonabo on mes.’” ¹⁹ Namon Abraham natun Isaac rus simatabir men sinai an bobo orot ruam auris ato engonei simisir sinai au Beersheba. Ato Abraham on Beersheba nan ima.

Nahor Nanatun Wawan Agirin

²⁰ Wera fani sisawar gibunai, Abraham on tain Nahor awan Milcah duran itatam on fifirig nimtereban ton itu. ²¹ Fifi ainau orot wabin on Uz, fifi orot bairuin wabin on Buz, fifi orot baitonin wabin on Kemuel, (on min Aram taman) ²² Namon fifirig nim ba wabis on Chesed, Hazo, Pildash, Jidlaph a Bethuel. ²³ Bethuel min Rebecca taman. Osi fifirig orot nimtereban ton on Abraham tain awan Milcah itu. ²⁴ Mat Nahor awan ufuigeg wabin Reumah on eb nanatun wabis on Tebah, Gaham, Tahash a Maacah on itu.

Sarah Irabob Ato Abraham Budi Efan Itobon

23 ¹ Sarah ima inai an kwanda 127 ibo. ² On Hebron nan irabob Canaan tafanam amonai ato Abraham on Sarah aurin iyababan ato irous ibotouousai.

³ On efan menan awan rabobin i yen on ikirir ato inai Hitt yangan auris; ato iyawures iyau, ⁴ “Yau on nanawan orot nin amomui amama; motob turin auriu wonkutetai antobon on nan yau awau angarobai.”

⁵Osi siyafotai siyau, ⁶“Wai kavian, om wei wai dura untatami. Wei waitem om on bainetewar orot faiwarim bag, on mes om garob an efan obin wat erubin ato nan awam egarobai. Wei engon wabiyasisir garob efan wanitem, on nan awam ungarob.”

⁷Namon Abraham auris uson itur ⁸ato iyawures iyau, “Omi wonbibasiteu awau nin angagarob on, abifefeyanim Zohar natun Ephron on wotawur weineu. ⁹Yau abifefeyanai fofonin on an Mechpelah agim dogu ato motob matanai yen on yau ititeu. Yau abifefeyanai on an baiyan tutufin initeu ato omi matamui ani baiyan ato on garob efan min innat yau ininoaniu.”

¹⁰Ephron toun on an sabu Hitt yangan mat on mafam gagamin an furi awan sesebinai simair simama, on nan emon ibiyafot on osi sabu engon sitatam. ¹¹Ephron iyau, “Au kavian, om au dura etatam. Om atonio agim dogu on men untobon mes. Yau au agim dogu a motob tutufin mat engon on asir anitem mom. Yau au sabu matasi au motob asir abitem mom ato on nan awam ungarob.”

¹²Namon Abraham Hitt yangan nasi uson itur, ¹³ato osi tainan tainan sitatam Abraham Ephron aurin iyau, “Yau abifefeyanim tainam ereben untatamui, yau motob an baiyan tutufin anibaiyanim on unboai ato yau awau nan angarob.”

¹⁴Ephron Abraham iyafotai iyau, ¹⁵“Yau au kavian, motob an baiyan an fofon on agim silver 400 ato baise ot men ato baiyan an fofon aurin taniyamai rut basuti ma inkomas. Om motob asir ebo mom ato awam nan egarob.” ¹⁶Ephron motob an baiyan ibaton ato Abraham ibasit, on mes Hitt yangan matasi baitotobonotis sefour ba on agim silver iyab inai ifofonin ato Ephron itai.

¹⁷On mes Ephron an motob Mechpelah amonai Mamre nan au wera matan na, on motob agim dogu mat a wengar engon on amonai on Abraham inoanai. ¹⁸Hitt yangan ato mafam gagamin an furi awan sesebinai sikuayo sibiridudur on engon sisagob Abraham noan.

¹⁹Namon Abraham awan Sarah on on agim dogu amonai igarob Canaan tafanamai nan. ²⁰On mes motob a agim dogu ato Hitt yangan ibinoanis on inat Abraham an rasi dogu mes imatar.

Isaac Awan Jever Aurin

24 ¹Abraham ari on iorokwar isawar. Ato on bobo aifan engon tutufin ifofour on BADA imomoginai. ²Ra kaitamom, Abaraham an bobo orot atamanin on goa amonai sawar engon tutufin ikakaifaren on aurin iyau, “Om imam sasanawui eiwan ato unau matan. ³Yau agogoi Om safam a tafanam an BADA God Wabinai unifaro on, om men arimon nin Canaan sabu sanasi yau natu orot awan unrubinai mes. ⁴Om totor unmatabir unan tafanam menan yau au rat barenai nan ato yau au dam warar amosi emon, yau natu orot Isaac awan jeverei unboai.”

⁵Baise bobo orot itetamai iyau, “Ato jeverei intinan men anboai annanat mes on mamaba? Enonosin arimon fofonin natum orot anboai anmatabir men om am tafanamai?”

⁶Abraham iyafotai iyau, “Ambin! Om natu men unboai unmatabir au tafanamai mes. ⁷BADA, safam an God on tamau an goa a yau au rat baren tafanam emon iboeu agat ato ifaro on arimon atonio motob on wawau agiriu inites. On an anea arimon iniyafarai onai ininetewarim unan natu orot awan unboai ato unmatabir. ⁸Ato jeverei intinan men ingogoi rum wonnanat mes on, yau au baifaro emon irufanim. Baise bobo kaitamom wat on, yau natu on men unboai unmatabir unan men yau au tafanamai.” ⁹On mes bobo orot iman an bada Abraham sasanantai iwanen ato ifaro mamaba Abraham yawur on itafour mes.

¹⁰Namon bobo orot an bada Abraham an camel engon auyotoat iboen a siwar obis fani iboen ato inai Abraham tain Nahor an mafam gagamin aurin Mesopotamia tafanamai nan. ¹¹On an werai on inai dogu sareu mafam gagamin kounai igat mom on camel iyames sindas sirouen. On min irabirabi, on an werai jever sigat sareu sitasu mes. ¹²Namon bobo orot ibayoi ifefeyan iyau, “O BADA, yau au bada Abraham an God, ari ra eibaisiu au bobo innat obin inmatar ato am moa obin uniyamai au bada Abraham aurin. ¹³Eit! Yau atonio dogu sareu bisinai atatawar, ato mafam gagamin an jeverig on se gat sareu sinasu. ¹⁴Yau arimon jeverei tani anawur, ‘Karun, am kibub eyirai esur ato sareu eiteu atoman.’ Ato on jeverei am bobo orot Isaac aurin unrurubinai mes on, arimon auriu inau, ‘Basit, au bada, etoman.’ Namon on inbotein inau, ‘Yau arimon am camel mat asi sareu anboai sintoman. On bobo nanaba inmamatar on yau arimon ansagob Om am moa obin on au bada Abraham aurin ufour.’ ¹⁵Bobo orot on nana ibabayoi ato jeverei boboun wabin Rebecca on abaranai sareu kibub iyabar mat inat igat. On min Abraham tain Nahor awan Milchah rus natus Bethuel, on natun jeverei. ¹⁶On jeverei on mamarag ato matafin, men orot tani rus siyen on. On isur inai dogu sareuai nan kibub sareu ibonuai ato imatabir men inat. ¹⁷Bobo orot iyayai inai inefotai ato yawur iyau, “Karun, fofonin am kibub emon sareu utiteu attoman i.”

¹⁸Jeverei iyafotai iyau, “Au kavian, basit sareu untoman” on ra kaita kibub abaran emon iyeirai isur imanai ibotan ato itai itoman. ¹⁹Rebecca sareu itai itoman isawar gibunai ato iyau, “Yau anan sareu anboai annat am camel mat auris ato anites sintoman inan inifofonis.” ²⁰On ra kaita an kibub sareu bobaitu asi didiwagai irir isawar ato iyayai inai dogu sareuai nan sareu turin ba isun ibo inat auris, on bobo nanaba ifour i nan i nat sareu ibikayam mom asir camel engon sareu sitoman ifofonis. ²¹Ato orot on dura ambin asi matanai wat ibimateteai itsagob mamaba BADA on an bobo iyamai inat obin emamatar ai ambin. ²²On an werai jeverei

camel sareu ites sitoman isawar weie, orot agim gold aburus an urakof an baiyan gagamin ibo ato aburunai iyein a agim gold kwasi tayabaris ruam on asunai iganen. ²³Namon on itetemei iyou, “Om ekasoneu, om tamam on iyafan a an goai efan fofonin yau au orot mat ari fom wat nan waten?”

²⁴On iyafotei iyou, “Yau tamau on Bethuel a wawau orot jever on Nahor a Milcah. ²⁵Wei ai goai on wayo ison kwakwan sen fofonin camel bayu sinam a ai goa amonai on eb efan yen fofonin omi mat wonen.”

²⁶Namon orot sindan irou ato BADA ikwafirai. ²⁷On iyou, “Yau BADA anifain, yau au bada Abraham an God, on an kabere a faskikinai an aumatan au bada aurin ibokikin. Ato yau on BADA ibototoriu totor wat anat au bada Abraham an dam warar auris agat.” ²⁸Jeverei iyayai inai ayon an goai ato bobo engon tutufin simamatar auris on idudur. ²⁹⁻³⁰Rebecca robun wabin on Laban. On an werai on robun aburunai urakof a asunai kwasi iten a dura mamaba orot jeverei iyawur on idudur i tatam on, on iyayai inai ato orot igaturai dogu sareuai nan camel sesebisi itatawar, ³¹ato iyawur iyou, “Om enat rut tanan au go. Om orot on BADA imomoginem. Aibo mes nin kounai etatawar? Yau au goai on efan abotitiwig yen om aurim a am camel mat auris.” ³²On mes Abraham an bobo orot on Laban rus sinai au go. Ato Laban an bobo orot on camel tefasi emon sawar siyeiren ato asi bayu siboen sinat sites siyam. Namon sareu sibo sinat Abraham an bobo orot a on an orot mat ass sitsouen mes. ³³Namon bayu nanai siyein, baise on iyou, “Yau men gariwat bayu anam mes, ab ainau on dura an kasonem unsagob yau aibo mes anat nin.” Laban iyou, “Basit, ekasonei.”

³⁴On mes bobo orot on ibosuruf dura ikakafun iyou, “Yau on Abraham an bobo orot. ³⁵BADA on yau au bada Abraham gagaminai bag imomoginai ato sawarotin imatar. On bobaitu engon; sheep, goat, cow, agim silver, agim gold a orot jever agirotis on engon itai. ³⁶Yau au bada awan Sarah on ijenekwar an werai fifi orot ituai, ato yau au bada an buder engon natun itai. ³⁷Yau au bada iyameu aifaro on an dura atifonaboai mes. On iyawureu iyou, ‘Om men Canaan tafanam emon jeverei unrubin yau natu awan mes. ³⁸Baise om unan tamau an sabu, an dam warar amosi natu awan nan unrubin. ³⁹Ato yau au bada aitetemei au, ‘Ato jeverei men ingogoi yau rui wannanat on arimon mamaba? ⁴⁰On iyafoteu iyou, ‘BADA ato ra fufur abifonaboai On arimon an anea iniyafarai om rum wonan bainonot aifan on iniyamai weinem. Om arimon tou au sabu emon natu awan unboai, yau tamau an dam warar emon. ⁴¹Eta on kaitamom wat. Om unan yau au dam warar auris ato osi men sinibasitem jeverei unboai unnanat on arimon om baifaro emon on inrufanim.

⁴²Yau ari rabirabi anat dogu sareuai nan ato abayoi, ‘Yau au bada Abraham an BADA God, karun, eibaisiu au bobo innat obin inmatar. ⁴³Yau

atonio dogu sareuai. On an werai jeverei boboun sareu boin mes ingagat on, yau arimon anifefeyanai an kibub emon sareu initeu antoman. ⁴⁴Ato on jeverei inbibasit sareu initeu antotoman a toun ingogoi camel asi sareu inboai inites sintotoman on, yau asagob jeverei min on urubinau au bada natu awan mes.’ ⁴⁵Yau nana ababayoi ato Rebecca abaranai kibub auman inat ato isur dogu sareuai sareu itsun mes. Yau awur au, ‘Karun, sareu eiteu antoman.’ ⁴⁶On ra kaita an kibub abaran emon iyeirai isur ato iyau, ‘Etoman a mat am camel sareu anites sintoman.’ On mes yau sareu atoman ato on camel ba asi sareu ites sitoman. ⁴⁷Yau aitetemai au, ‘Om iyafan natun jeverei?’ Ato on iyafoteu iyau, ‘Yau on Bethuel natun jeverei, Bethuel on Nahor a Milcah rus natus.’ Namon yau urakof aburunai ayein a asunai kwasi aiganen. ⁴⁸Namon yau sindau arou ato BADA akwafirai. Yau BADA anifain, yau bada Abraham an God. On ibototoriu totor wat anat yau au bada an dam warar auris ato jeverei agaturai on natun awan mes. ⁴⁹Basit omi ari wongogoi ami moa obin a dura bagai wat au bada Abraham aurin wonbiyamai on basit rerebai wonkasoneu. O omi men wongogoi mes on eb rerebai wonkasoneu ato yau an sagob au bainonot aniyamai.”

⁵⁰Namon Laban a Bethuel rus siyafotai siyau, “Atonio bobo on BADA emon, on mes wei men eta tani yen aifan wanau on. ⁵¹Rebecca on atonio, om ebo ato enai am bada Abraham natun orot awan mes inmatar, mamaba BADA Toun iyau nanaba.” ⁵²On an rai Abraham an bobo orot atonio dura itatam on, on sindan irou ikwafir isur magin motob iruyein ato BADA ikwafirai. ⁵³Namon bobo orot on monag sawar agim silver a agim goldai sibiyaamen on a beber iyateten ato iboen Rebecca itai. Mat on siwar baiyas gagamis bag on robun a ayon ites.

⁵⁴Namon Abraham an bobo orot an orot mat sinat on bayu siyam sitom ato fom nan mat siyen. Osi fomenei simisir ato Abraham an bobo orot on iyau, “Yau agogoi anmatabir men anan au bada aurin.”

⁵⁵Baise Rebecca robun orot a ayon rus siyafotai siyau, “Jeverei on eikirir tafaror kaitamom o ra auyotoat nanaba mat wanama weie on gibui inan.”

⁵⁶Baise Abraham an bobo orot on iyawures iyau, “Men wonbotaniu mes. BADA on ibaisiu au bib iyamai inat obin imatar; on mes woniyafareu anan au bada Abraham aurin.”

⁵⁷Osi siyafotai siyau, “Basit ot jeverei tayor enat ato taitetemai tait.”

⁵⁸On mes osi Rebecca siyor inat ato sitetemai siyau, “Om egogoi atonio orot rum wonan i?” On iyafotes iyau, “Eee! yau rui anan.”

⁵⁹On mes osi Rebecca a an fio kaifar jever on sikirires ato Abraham an bobo orot a on an orot fani mat sinai. ⁶⁰Ato osi atonio dura ai on Rebecca simomoginai ato siyawur siyau:

“Wei robui. Om arimon sabu babaisonis ayos unmatar! Om wawam agirim arimon asi ragit sinbomerubes ato asi mafam gagamis sinboai!”

⁶¹Namon Rebecca a an bobo jeverei rus sibotitiwag ato asi camel tefasi sigai simair. Abraham an bobo orot Rebecca ibo ato tafanam sikirir sinai.

⁶²Isaac on Dogu Sareu BADA Yayawasin Yau Eiteu On An Dogu Sareu emon inat Canaan tafanam turinai nan imama. ⁶³Rabirabi tani Isaac igat igat inai masauai ibibib ato matan ireben inai on camel si nat on ites. ⁶⁴On an werai Rebecca iyeit Isaac it on an camel emon isur ⁶⁵ato Abraham an bobo orot itetamai iyau, “Orot ato masau ai ibib aurit enat on iyafan?”

Bobo orot iyafotai iyau, “On min yau au bada Isaac.” On mes Rebecca beber ibo ato magin ikukum.

⁶⁶Namon bobo orot ato bobo engon tutufin ifofour on Isaac ikasonai. ⁶⁷Isaac on Rebecca ibo sinai ayon Sarah an guwi ai sirui ato nan iawan sima. Isaac on Rebecca inuaboai ato on emon kubainunub ibo, on an rai ayon irabob gibunai.

Abraham An Dam Warar Fani

(1 Chronicles 1.32-33)

25 ¹Abraham jever tani ba iawan, on wabin min Keturah. ²On jever nanatun sirarat wabis on Zimran, Jokshan, Medan, Midian, Ishbak a Shuah. ³Sheba a Dedan rus tamas on Jokshan a Dedan wawan agirin on Asshur yangan, Letush yangan a Leumm yangan. ⁴Midian nanatun on Ephah, Ephher, Hanoah, Abida a Eldaah. Atonio osi engon on Keturah wawan agirin.

⁵Abraham an buder engon on Isaac aurin ikirir; ⁶baise Abraham on nana yawasin imama an werai on siwar awawan ufuigeg nanatun sibitu on ites. Namon osi fifirig gigiawan on iyafares sinai au wera matan tafanam nan sitama mes, yabin Abraham on men igogoi osi fifirig on Isaac mat sitama.

Abraham An Rabob A An Garob

⁷⁻⁸Abraham iorokwar bag weie irarabob an kwanda on 175. ⁹On nanatun Isaac a Ishmael, Machpelah agim doguai nan sigarob, Mamre bisinai au wera matan na, on min Ephron an motobai, Ephron min Zohar Hitt orot natun. ¹⁰Motob ato Abraham Hitt yangan auris itotobon on, on nan Abraham a awan Sarah rus sigarobis. ¹¹Abraham irabob gibunai, God on Isaac imomoginai. Isaac on Dogu Sareu wabin BADA Yayawasin Yau Eiteu On An Dogu Sareu bisinai nan ima.

Ishmael An Dam Warar

(1 Chronicles 1.28-31)

¹²Atonio on Ishmael nanatun wawan agirin an dudur, Ishmael on Abraham natun, Sarah an agir jeverei Egypt emon wabin Hagar on ituai. ¹³Ishmael nanatun mamaba sirat inan, osi wabis on atonio: Nebaiioth,

Kedar, Adbeel Mibsam, ¹⁴Mishma, Dumah, Massa, ¹⁵Hadad, Tema, Jetur, Naphish a Kedemah. ¹⁶Osi on dam auyotoat an yayatan ruam nanatun wawas agiris, ato osi wabis min asi goa mafam siwab seiris. ¹⁷Ishmael an kwanda on 137 weie irabob. ¹⁸Ishmael an dam warar on Havilah a Shur tafanam basunai nan sima, Egypt au wera matan na, eta au Assyria inan on nan. Abraham nanatun wawan agirin fani on ma komasis fasisi on mes osi mabisi nan sima.

Esau A Jacob Rus Sirat

¹⁹Atonio on Abraham natun Isaac an dudur. ²⁰Isaac an kwanda orot ruam an rai on Rebecca iawan, on min Bethuel natun jeverei a Laban robun, osi min Aram emon sinat Mesopotamia nan. ²¹Rebecca on arin on mes Isaac on BADA aurin ibayoi awan Rebecca aurin fifi itituai mes. BADA on Isaac an bayoi iyafotai ato on awan Rebecca on inafot. ²²Fifirig orot sisiru on Rebecca yanai simama ato osi rus on sibiyyerat. On mes Rebecca iyau, “Aibo mes atonio bobo on nanaba emamatar yau auriu?” On mes on inai BADA ititetemai an baiyafot itboai mes.

²³BADA on aurin iyau, “Tafanam ruam om yam amonai; om arimon sabu ruam unitu, osi sinkuseb ato tani on arimon infaiwar

kwakwan men tani ba. Ainau orot on arimon giya orot iniagirai.”

²⁴Rebecca an wera inat itotoub on fifirig orot sisiru sirat. ²⁵Fifi orot ainau irarat on usin mururin, ato usin engon on bubunin youbin wat on sitau, on beber usinai itakwakwarai bait, on mes on wabin siyor Esau.ⁱ ²⁶On gibunai fifi giya bairuin ba irarat on imanai Esau ann etun on aumiet bag ibokikin auman irat, on mes on siyor Jacob.^j Isaac on an kwanda orot wat ton, on an rai Rebecca on osi fifirig sisiru itu.

Jacob On Esau An Abou Buder Iyabaruai

²⁷Fifirig sirat orot simatar, ato Esau on bo am an orot imatar ato on an gogoi on regai inabib, baise Jacob on orot rutanobin ato an gogoi on goai wat imama. ²⁸Isaac an nuabo on Esau, yabin Isaac an gogoi on rega masono Esau ibobo wain on iyam, baise Rebecca an nuabo on Jacob.

²⁹Ra tani Jacob bayu ibitab ato Esau regai nan ibibib on bitanan igi kwakwan auman imatabir men inat. ³⁰Esau on Jacob aurin iyau, “Yau bayu mes bag ararabob. Gariwat, om bayu a sosof mururin ato ebitab on turin eiteu.” (On fasinai Esau wabin tani min siyor Edom.) ³¹Jacob

ⁱ 25.25 Hebrew dura wab Esau an yabin tani bisini bag on sau, Usin bubunin youbin, mat on wab on seyoyorai Edom, ato on an yabin min Mururin. ^j 25.26 Hebrew dura wab Jacob an yabin tani bisinai bag on sau, on ann etun ibokikin (Ato dura kawenai on sau, on baisigogootin.)

iyafotai iyau, “Om ainau on am abou an buder on yau uniteu, weie yau bayu anitem.”

³²Esau iyau, “Engon basit wat! Yau on kafakakai mom anarab, ato abou an buder on arimon men aifan obin tani iniyamai yau auriu on.”

³³On mes Jacob iyafotai iyau, “Basit, om ainau on yau auriu unifaro ato am abou an buder on uniteu. On mes Esau baifaro an aumatan Jacob aurin iyamai ato an abou an buder on ibo itai.”

³⁴Namon Jacob sarar fani a sosof turin itai. Esau on bayu iyam itom isawar weie imisir inai. Esau atonio bobo nanaba ifour an itinai on abou an buder on aurin on asir yabin wagan wat.

Isaac Gerar Nan Imama

26 ¹Gomar tani on tafanamai imatar, men ainau Abraham an werai imamatar ba. On mes Isaac inai Gerar nan Philistia asi aiwab orot Abimelech aurin. ²BADA on Isaac aurin irobotet ato iyawur iyau, “Om men unan au Egypt mes, om nin tafanamai ema mamaba awurem on nanaba. ³Om atonio tafanamai on kafakakai unama ato Yau arimon om bisimui anama ato animomoginem. Yau arimon tafanam engon tutufin on om a nanatum wawam agirim aurim anitem. Yau aumatan tamam Abraham aurin abiyamai on arimon anbokikin. ⁴Yau arimon aniyamai nanatum wawam agirim sinison ato siribod safamai sen ba a atonio tafanam engon mat anites. Om am fesi fasisi on sabu tafanam au engon arimon animomogines. ⁵Yau arimon animomoginem yabin Abraham fonau ibo au baifafaro a au baifofor engon ikaifaren.”

⁶On mes Isaac on Gerar nan ima. ⁷On an werai Gerar tafanam an orot Isaac sitetamai awan aurin. On iyawures iyau, “On on yau robu.” Men fofonin itau on awan, yabin on iber on tafanam matuanis arimon sitasubun ato Rebecca sitboai, yabin on jever on momogin fafa. ⁸Isaac wera weromin nan ima, namon ra tani aiwab orot Abimelech an gigo emon isirir isur ato Isaac a Rebecca rus on sirorout sibiyayan on ites. ⁹On mes Abimelech Isaac iyor inat aurin ato iyawur iyau, “Ari weie asagob ato jever on om awam! Om aibo mes uyau on om robum?” Isaac iyafotai iyau, “Yabin yau ainonot on ari atau nin on yau awau ato omi arimon wotasubunueu.”

¹⁰Abimelech iyau, “Om aifan wei auri ufour? Om am komasin emon on fofonin yau au orot tani on awam rus siten ato bit gagamin bag watabar.”

¹¹Abimelech sabu engon auris isosoan iyau, “Iyai iyafan atonio orot awan rus auris bobo komasis infofour on arimon inarab.”

¹²Isaac on motobai fesi ibofefes ato on kwanda kaitamom amonai on bayu gagamin bag ikuwain men ato fesi itatanum ba, yabin BADA imomoginai on mes. ¹³Isaac on sawarotin imatar ato an sawar on nana irat igai asir on inat sawar an aiwab orot imatar. ¹⁴On an sheep, cow a

an bobo orot jever on ison kwakwan on mes Philistia sabu sibiboboarai. ¹⁵On fasinai osi Philistia yangan simisir dogu sareu ainau Isaac taman Abraham an bobo orot sisasar on engon sitounen men sigai.

¹⁶Namon Abimelech Isaac iyawur iyau, “Om wei ai tafanam on eikirir egat. Om ari unat orot faiwarim bag umatar men wei ba.” ¹⁷On mes Isaac igat inai Gerar roubabanai nan an guwi iyon ato nan ima.

¹⁸Ainau bag Abraham an werai, on dogu sareu on sigaraba isaren ato on irabob gibunai, Philistia sabu motob sibo sitounen men igai. On mes Isaac an bobo orot mat on dogu sareu sisaren men. Isaac taman Abraham dogu sareu wabis ibites on wab kaitamom min Isaac ites men. ¹⁹Isaac an bobo orot roubabanai nan dogu sareu sisar ato kibubur sareu sigaturai. ²⁰Gerar an sheep kaifarotis on Isaac an sheep kaifarotis mat sigam ato siyawures siyau, “Atonio dogu sareu on wei noai.” On mes Isaac dogu sareu on iwabai, “Gamo.”

²¹Namon Isaac an bobo orot dogu sareu tani ba sisar, baise osi on mat aurin sigamo, on mes Isaac on iwabai, “Gigit.” ²²On efan ikirir inai mabinai nan ato dogu sareu tani ba sisar, on nan motob on an dura ambin. On mes iwabai, “Rurufanin,” ato iyau, “Ari weie BADA atonio motobai efan itet a arimon an obin gagamin tanboai.

²³Isaac tafanam Gerar ikirir inai au Beersheba. ²⁴On fom BADA on Isaac aurin irobotet ato iyawur iyau, “Yau om tamam Abraham an God. Om men unaber mes, Yau on om bisimui. Yau arimon animomoginem a nanatum wawam agirim babaisonis anitem, yabin Yau au agir orot Abraham aurin aumatan.” ²⁵Isaac sirifu agim kema nan iyon ato BADA ikwafirai. Namon an guwi nan iyon ato an bobo sabu dogu sareu sisar.

Dura Bo Baibasit Isaac Abimelech Rus Siyamai

²⁶Abimelech an aubaiyaten orot wabin Ahuzzath a baigagam an bainetewar orot wabin Phicol mat on Gerar tafanam emon sinat Isaac sititai mes. ²⁷On mes Isaac itetemis iyau, “Omi on ari aibo mes wonat woniteu mes? Omi ainau on yau woiragiteu ato woiteteriu ami tafanam aikirir agat?”

²⁸Osi siyafotai siyau, “Ari weie wei wait bunag BADA on om bisimui, on mes wei wainonot wau on dura bag wat dura bo baibasit basuti taniyamai. Wei wagogoi unaumatan, ²⁹on om wei auri men bobo komasis uniyamen, mamaba wei om aurim waiyamai tufai waikirirem unai ba. Ari weie irubunag BADA on om imomoginem. ³⁰Namon Isaac osi auris forag ibotitiwag ato osi siyam sitom. ³¹Ra itom fomenei, Isaac Abimelech rus aumatan siyamai ato sifaro bonen. Isaac iyau baitotoris ato tufai ikirires sinai.

³²On wera kaitamomai Isaac an bobo sabu dogu sareu sisasarai aurin on sinat ato siyawur siyau, “Wei sareu wagaturai.” ³³On mes Isaac dogu

sareu iwabai, “Shibah.” Ato ari on mafam gagamin min wabin seyoyorai Beersheba— “On an yabin min Baifaro an dogu sareu.”

Esau Awawan Ruam Wabis

³⁴Esau an kwanda orot ruam weie Hitt jeverig ruam iawanis, Beeri natun jeverei Judith a Elon natun jeverei Basemath. ³⁵Baise Esau awawan ruam asi yawas sibiymai on yababan gagamin sibo sinat Isaac a Rebecca rus auris.

Isaac On Jacob Imomoginai

27 ¹Isaac ari on iorokwar ato matan sifot. On natun orot abou iyor inat ato iyawur iyau, “Yau natu!” Esau iyafotai iyau, “Men bab, yau nio.”

²Isaac iyau, “Yau on aiorokwar ato men asagob meyan arimon anarab. ³Om am fidu an iyo mat eboen ato egat enai regai masono tani unyoai ato unboai unnat weineu. ⁴Yau au gogoi bayu momonin on nanaba eitab ato ebo enat auriu. Yau on bayu anam insawar gibunai arimon au baimomogin kanfoun anitem weie anarab.”

⁵On an rai Isaac on Esau aurin dura ibikakafun on Rebecca itatam. On mes on an werai Esau igat inai regai bib mes, ⁶Rebecca natun Jacob iyawur iyau, “Yau ato arimon atatam tamam on Esau iyawur iyau, ⁷Om masono tani ebo enat ato eitab weineu. Yau anam insawar gibunai ato yau arimon BADA matanai au baimomogin anitem weie anarab.’ ” ⁸Rebecca an dura ibotein iyau, “Ari weie natu, om fonau etatam ato aifan anau on nanaba uniyamai. ⁹Om enai goat unis sigaraba setatawar amosi on goat bobous momos ruam eboen enat anitaben ato on emon tamam an gogoi bayu momonin anbotitiwag. ¹⁰Om unboai unan tamam unitai inam ato arimon an baimomogin initem weie inarab.” ¹¹Baise Jacob ayon iyawur iyau, “Om usagob Esau on bubunin youbin ato yau on usiu rumomoyin.

¹²Tamau usiu inbototobon mes on ingatureu yau abisigoai on, arimon yau tou an audabiu ato arimon men baimomogin anboai on.”

¹³Fifi ayon iyafotai iyau, “Yau natu, aifan audab on eikirir yau anboai, yau dura aifan au on bobo nanaba eiyamai, om enai goat ruam eboen enat auriu.” ¹⁴On mes on inai ato goat ruam on iboen inat ayon itai, ato Rebecca bayu momonis itaben ibotitiwagen mamaba Isaac an gogoi iyau nanaba. ¹⁵Namon Rebecca on Esau usin an baitakwakwaren obis bag goai iya siyen on iboen Jacob itakwakwarai. ¹⁶Rebecca goat korofis iboen Jacob imanai a anyonai menan usin rumomois on nan ibo babaren. ¹⁷Namon on bayu momonis a rafi sarar teteren mat on natun Jacob itai.

¹⁸Namon Jacob inai taman aurin ato iyau, “Bab.” Isaac iyafotai iyau, “Men, yau natu, om iyafan.”

¹⁹Jacob iyafotai iyau, “Yau on natum ainau orot Esau. Om dura mamaba uyawureu on aiyamai. Karun, emisir emair ato bayu momonis abotitiwag abo anat on unam weie ato am baimomogin uniteu.”

²⁰Isaac itetemai iyau, “Yau natu, om mamaba gariwat bag ugaturai? Jacob iyafotai iyau, “BADA am God ibaisiu agaturai.”

²¹Isaac on Jacob iyawur iyau, “Om auriu auriu enat usim anbotobon ansagob. Om on dura bag Esau ai ambin?” ²²Jacob irui taman Isaac bisinai bag ato Isaac on natun usin ibotobon ato iyau, “Om fonam on Jacob fonan, baise imam abotobon on Esau iman.” ²³Isaac men irubunagai on Jacob, baise on iman on er bubunin tuan Esau iman ba. Isaac on an baimomogin ititai mes, ²⁴baise itetemai men iyau, “Om min dura bag yau natu Esau i?” Jacob iyafotai iyau, “Dura bag, yau on Esau.”

²⁵Isaac iyau, “Yau natu, au gogoi bayu momonis ubotitiwag on ebo enat anam, on gibunai weie au yau baimomogin anitem.” Jacob bayu iboen inat ato itai iyam a sareu wine mat ibo inat itai itoman. ²⁶Namon on taman Isaac iyau, “Yau natu, om auriu auriu enat ato eyaniu.” ²⁷On mes on inat bisinai ato iyaan. On an werai Isaac on Esau an baitakwakwaren yanden itatam on imomoginai ato iyau, “Aee, yau natu yanden on motob ato BADA imomoginai on yanden ba. ²⁸Yau God abifefeyanai on safam an turub initem a tafanam an mour ungaturai. On sawareg a sareu wine bobous gagaminai initem. ²⁹Mat On iniyamai arimon sabu tafanam engon tutufinai on om siniagirem a sabu engon tutufin arimon om sinkakafem. Om arimon taitaim tutuam engon uninetewaris, a ayom nanatun wawan agirin arimon om sinkakafem. Osi sabu iyabon saudabim on God arimon inaudabis a osi sabu iyabon sevimomoginem on God arimon arimon inimomomogines.

Esau Ifefeyan Isaac Itimomoginai Mes

³⁰Isaac on Jacob imomoginai isawar ato Jacob on sasasan wat taman ikirir inai mom on, tuan Esau ba regai ibibib on imatabir inat igat. ³¹On mat bayu momonis itaben ato iboen inai taman aurin. Ato iyau, “Karun tamau, om emisir emair bayu momonis ato aurim abotitiwag abo anat on unam weie am baimomogin uniteu.”

³²Isaac itetemai iyau, “Om iyafan?” Esau iyafotai iyau, “Yau om natum ainau orot, Esau.” ³³Isaac on men sunub iror ato ibosuruf usin engon sibiror ato iyau, “Ato nan on iyafan bobaitu iyasubun ibo inat auriu i? Yau ato arimon aam isawar mom ato om unat. Yau au baimomogin kanfoun on engon tutufin on aitai, ato dura bag arimon on ininoanai au wantoan.”

³⁴On an werai Esau taman an dura itatam mom on, fonan gagaminai iyoku itou fufuan ato ifefeyan iyau, “Tamau, yau mat am baimomogin eiteu.”

³⁵ Isaac iyafotai iyau, “Om taim inat isigoweu. Ato om am baimomogin on, on ibo.

³⁶ Esau iyau, “Atonio on wera bairuin ba yau isigoweu. Men taniyoi on, on mes wabin min Jacob. Yau au abou an buder on, on ibo ato ari on au baimomogin ba ibo.” Namon Esau on taman itetemei iyau, “Om men buder tani ubotan yau auriu i?”

³⁷ Isaac iyafotai iyau, “Yau on aiyamai inat om am bada mes imatar a mat dam warar on sinnat on an bobo sabu mes simatar, a sawareg a sareu wine boboun gagaminai aitari. Yau natu, men aifan tani yen arimon aurim aniyamai.”

³⁸ Esau on nana taman idodoai ibifefeyanai i yau “Tamau om am baimomogin min on wat i? Yau mat eimomogineu.” On ibosuruf itou.

³⁹ Namon on taman Isaac iyafotai iyau, “Om am ma on tafanam an mour emon mabimui unama unibitanangi a safam an turub emon mat mabimui unama.

⁴⁰ Om arimon baiyo baigagamai nan bayu unaturai unamair unama, ato taim uniagirai. Baise on an werai unbifonaseir on, om arimon on an an baibad emon on toum unkusebim mabimui unama.”

⁴¹ Esau tain Jacob aurin on gigit nana iyen yabin taman on Jacob imomoginai on mes. Esau inonot iyau, “Tamau an rabob an ra on inat iufin nono ato tou yababan insawar gibunai on yau Jacob anasubun.”

⁴² Baise on an werai Rebecca itatam Esau aifan iyau. On mes dura iyafar Jacob inat ato iyawur iyau, “Untatam, om tuam Esau on ebinonotai inasubunuem mes. ⁴³ On mes natu, yau dura aifan au on nanaba unafour. Om ari bag unan tafanam Haran nan robu Laban aurin. ⁴⁴ Ato om nan rum kafakakai wonama weie tuam an yatatab on insibu insur. ⁴⁵ On an rai om tuam an yatatab insawar a ato bobo aifan aurin ubiyamai on mat ininosfotai weie, yau dura aniyafar ato unmatagir men unnat. Yau men agogoi ra kaitamom amonai on nanatu ruam engon anisiwanim.”

Isaac Jacob Iyafarai Laban Aurin

⁴⁶ Namon Rebecca on Isaac iyawur iyau, “Yau Hitt jever mat ma on abi suweigan. Ato Jacob ba awan on tafanam emon inbiawan mes on, yau arimon men anama on.”

28 ¹ Isaac on Jacob iyor irui ato imomoginai weie baisosoan dura iyawur iyau, “Om men Canaan jever uniawan mes. ² Ab om rouser unan Mesopotamia tafanamai nan wawam Bethuel aurin, nan on om ayom taman. Ato om on abum Laban natun jeverei tani uniawan. ³ Yau God Faiwarin Bag abifefeyanai On arimon am tabin inimomoginai a nanatum babaisonis initem onai om unnat tafanamai on sabu engon tutufin tamas mes unmatar. ⁴ Yau God abifefeyanai inimomoginem nanatum wawam agirim mat ato Abraham ibimomoginai ba, ato motob

touman mat om inoanim ato menan emama on min God ibo Abraham itai. ⁵Isaac on Jacob iyafarai inai Mesopotamia tafanam nan Laban aurin, on min Bethuel natun orot Aram emon. Laban on Rebecca robun orot ato Rebecca on Jacob a Esau rus ayos.

Esau Jever Tani Ba Iawan

⁶Esau isagob Isaac on Jacob imomoginai ato iyafarai inai Mesopotamia tafanamai nan jever inboai iniawan mes. Mat on eb isagob on an werai Isaac on Jacob ibimomoginai on dura wawaninai iyawur men Canaan jever iniawan mes. ⁷Ato on eb isagob Jacob on ayon taman fonas ibo inai au Mesopotamia. ⁸Esau ari weie isagob taman Isaac on Canaan jever on men ebibasites. ⁹Esau min awawan mat ato on inai Abraham natun Ishmael aurin ato natun jeveri Mahalath on iawan, on min Nebaioth robun.

Jacob Bethel Nan Ibomomout

¹⁰Jacob on Beersheba ikirir ato ibosuruf ibib inai au Haran tafanam. ¹¹Wera isofafir ato on inat efan kakafaiinai nan igat ato nan iten mes. On iyeinir unin agimai irubogai iten bubur mes. ¹²On ibomomout on wewen it motob emon itaseb igai inai au safam, on nan anea sigegeg a sisusur. ¹³Ato Jacob on BADA it nan sesebinai itatawar ato iyawur iyau, “Yau on BADA, Abraham a Isaac rus asi God, Yau arimon atonio tafanam menan uyeinir yen on om a om nanatum wawam agirim mat anites. ¹⁴Om nanatum wawam agirim on sinison ato tafanamai motob an fofou ba, ato osi arimon motob ato semama on sinkutuwe siniratai ingat bag inan au wera matan, au wera sifun, au tanam, au gorof ato om a nanatum wawam agirim fasimui on Yau tafanamai sabu engon tutufin on animomogines. ¹⁵Om unsagob on, Yau on arimon om bisimui anama ato anrufafarem menan menan unnanan nan, ato arimon anboem unmatagir men unnat atonio tafanamai. Yau arimon nana bisimui anama ato bobo aifan aumatanim on engon aniyamen.”

¹⁶Namon Jacob enbubur emon imisir an bomomout inonotai ato iyau, “Dura bag! BADA on nin, On on atonio efanai ato yau men asagob.” ¹⁷On iber ato iyau, “Atonio on kakaf gogom an efan! Nin on God an goa a safam an metewan awan.”

¹⁸Jacob on ra itom fomenei bag imisir, agim unin irubogai i yen on ibo ato matair mes irou. Namon olive an momon kerin tefanai idebur isur God Wabinai imutai. ¹⁹On efan wabin iyor Bethel.^k (On mafam gagamin min ainau wabin siyoyorai Luz.) ²⁰Namon Jacob baifaro dura iyamai BADA aurin ato iyau: Om yau bisiwui unmama a unrufafareu atonio au

^k 28.19 Hebrew dura wab Bethel an yabin min, God an goa.

eta an bibib amonai a au bayu a usiu an baitakwakwaren uniteu, ²¹ ato yau obinai wat anmatabir men anan tamau an tafanam aurin on, Om on arimon yau au God mes unama. ²² Atonio matair agim arou on arimon God an kwafir goa mes, ato yau arimon sawar engon unbibiteu on yau matas auyotoat anaya ato on amonai matan kaitamom on om anitem men.

Jacob Inat Laban An Go Mafamai Igat

29 ¹ Jacob nana ibib inai ato inat sabu au wera matan tafanamai nan simama on auris igat. ² On matan iyeit on dogu sareu it, ato sheep kuayo matas engon ton on nan sikibubuai siyen. Osi sheep min on dogu sareu emon sareu sitotoman, ato agim gagamin on dogu sareu awan siyafotai. ³ On an rai sheep engon si nat sibikaita weie sheep kaifarotis dogu awan emon agim sirurukou i gat ato sareu sibites sitotoman isasawar weie agim sirurukou irur men an efanai.

⁴ Jacob sheep kaifarotis itetemis iyau, “Yau tuturau, omi on men emon?” Osi siyafotai siyau, “Wei on Haran yangan.”

⁵ On itetemis iyau, “Omi Nahor wawan Laban min wosagobai i?” Osi siyafotai siyau, “Aee, wei wasagobai.”

⁶ Jacob on itetemis iyau, “On min basit emama i?” Osi siyafotai siyau, “On basit emama, ato eit, on natun jeverei Rachel on ato an sheep mat sibib senat.”

⁷ Jacob iyau, “Ari on aiyet ato wera men ibo on sheep unboes unar asi goai, om sareu eites setoman ato eboes ematabir men wayo sinam.”

⁸ Osi siyafotai siyau, “Wei men fofonin nanaba waniyamai, ainau on sheep engon sinat nin sinikaita weie dogu awan emon agim wanrukou inan ato sheep sareu wanites sintoman.”

⁹ Jacob on nana sheep kaifarotis auris ibikakafun ato Rachel taman Laban an sheep mat sinat. ¹⁰ On an werai Jacob on Rachel a abun Laban an sheep mat ites on, on totor inai dogu sareu awan agim irukou ato sheep sareu ites sitoman. ¹¹ Namon Jacob on Rachel iboyayanin ato aumiet itou. ¹² On iyawur iyau, “Yau on om tamam an tara, Rebecca natun orot.”

Ato jeverei iyayai inai taman ikasonai. ¹³ On an werai Laban abun Jacob duran itatam, on iyayai inat inefotai, irous iboyayanin ato ibo inat goa amonai sirui. Jacob bobo aifan simamatar on engon abun Laban aurin idudur. ¹⁴ Laban iyau, “Ai, dura bag, om on yau biou au tara turin.” Ato Jacob nan roke kaitamom ima.

Jacob On Rachel Leah Rus Auris On Laban Iagirai

¹⁵ Laban imisir Jacob iyawur iyau, “Om men yau au dam warar on mes bobo asir unabo on. Om ekasoneu am baiyan biyam egogoi unboai?”

¹⁶Laban nanatun jeverig ruam; ainau jeverei on wabin Leah, ato giya jeverei wabin on Rachel. ¹⁷Leah on matan obis, ato baise Rachel on mamarag.

¹⁸Jacob on Rachel inuaboai kwakwan, on mes iyau, “Yau arimon kwanda nimtereban ruam aurim anabo ato angaramin on natum giya jeverei Rachel on uniteu aniawan.”

¹⁹Laban iyafotai iyau, “Iyobin bag, yau om anitem uniawan ato men orot tani abinonotai on, on mes nana bisiwui ema.” ²⁰Jacob on kwanda nimtereban ruam bobo iboen onai Rachel itboai. Ato Jacob ibobo an nanianai on sitau on ra ton o bat nanaba iboen bait, yabin on Rachel inuaboai kwakwan on mes.

²¹Namon Jacob on Laban iyawur iyau, “Wera ato abobo on aisawarai nono, om natum jeverei eiteu aniawan.” ²²On mes Laban tabin an forag ibotitiwag ato sabu engon ibebegis sinat. ²³Baise on fom Laban on rouser Leah on ibo inai Jacob itai rus siyen. ²⁴Laban an agir jeverei Zilpah on natun Leah itai an bobo jeverei mes. ²⁵Ra itom fomenei weie Jacob it isagob on Leah ato Laban iyawur iyau, “Om aibo mes on nanaba aurim ufour? Yau Rachel aurin on aboen ato aibo mes uisigoweu?”

²⁶Laban iyau, “Wei nin ai kik on men nanaba yen gigiawan ainau setatabin weie ainauan on gibui. ²⁷Om emousin atonio tabin forag tafaror kaitamom on insawar weie giya jeverei Rachel ba wanitem, on an garamin on kwanda nimtereban ruam ba auriu unabo.”

²⁸Jacob ibasit ato tabin an forag yasisir tafaror kaitamom isawar gibunai Laban natun jeverei Rachel ba itai awan mes. ²⁹Laban an agir jeverei Bilhah on natun jeverei Rachel itai on an bobo jeverei mes. ³⁰Jacob on Rachel ba rus siyen a on inuaboai kwakwan bag men Leah ba. Namon Laban aurin kwanda nimtereban ruam ba iboen.

Jacob Nanatun Sirat

³¹On an werai BADA it on Jacob an nuabo Leah aurin on kafakakai wat ato Rachel on ibinuaboai kwakwan, on mes iyamai Leah on fofonin fifirig initu, baise Rachel on fifirig ambin. ³²Leah inafot ato natun orot irat. On iyau, “BADA au yababan it ato ari weie yau awau arimon ininuaboai.” On mes iwabai Reuben. ³³On inafot men ato natun orot tani ba irat. On iyau, “BADA natu orot iteu men, yabin On itatam Jacob on yau men ebinuaboai.” On mes iwabai Simeon. ³⁴On min on inafot men ato natun orot tani ba irat. On iyau, “Ari weie awau arimon yau bisiwui wat, yabin nanatun orot ton aitu.” On mes iwabai Levi. ³⁵Namon Leah inafot men ato natun orot tani ba irat. On iyau, “Ari weie yau BADA anifain aniduduranai.” On mes iwabai Judah. Namon on fifirig baitu ibotan.

30 ¹On an rai Rachel isagob on Jacob natun men tani ituai, on mes on tuan Leah on ibinatutumurai ato Jacob iyawur iyau, “Fifirig uniteu ai yau anarab.”

²Jacob iyatatab Rachel aurin ato iyau, “Yau men fofonin God an efan anboai. On Toun iyafotem men fifirig ebitu.”

³Namon Rachel iyau, “Au bobo jeverei Bilhah on atonio; om rum wonen ato on fifi inituai weineu, on nanaba on yau annat fifirig ayos anmatar.” ⁴On mes Rachel an bobo jeverei Bilhah on awan Jacob itai ato rus siyen. ⁵Ato Bilhah inafot ato Jacob natun orot ituai. ⁶Namon Rachel iyau, “God yau au gogoi fofonin on irubin, au bayoi itatam ato fifi orot iteu,” on mes iwabai Dan. ⁷Bilhah inafot men ato Jacob natun orot bairuin ba ituai. ⁸Rachel iyau, “Yau tuau Leah rui ai yawasai on waiyerarat inat, baise yau asowar.” On mes iwabai Naphtali.

⁹On an rai Leah toun isagobai on an toub iyastin on mes an bobo jeverei Zilpah on Jacob itai awan mes. ¹⁰Namon Zilpah on Jacob natun orot ituai. ¹¹Leah iyau, “Yau au obin agaturai,” on mes iwabai Gad. ¹²Zilpah on Jacob natun orot tani ba ituai. ¹³Namon Leah iyau, “Yau on men sunub abiyasisir! Ari weie jever engon tutufin sinyoreu, Yasisir,” on mes iwabai Asher. ¹⁴Sawareg kuwain an werai Reuben regai irui ato jor an wengar igaturai ibo inat ayon Leah aurin. Rachel imisir Leah iyawur iyau, “Karun, abifefeyanim, natum an jor turin eiteu.”

¹⁵Leah iyafotai iyau, “Awau ubo on men ifofonim i? Ari on egogoi natu an jor turin ba unboai.”

Rachel iyawur iyau, “Om natum an jor turin uniteu on arimon fom Jacob rum wonen.”

¹⁶On an werai Jacob rabirabi bobo emon imatabir inat, Leah igat inefotai ato iyawur iyau, “Om ari fom on rut tanen, yabin min natu an jor ai on atobonim.” On mes fom rus siyen.

¹⁷God on Leah an bayoi iyafotai ato inafot ato Jacob natun bainimin ba ituai. ¹⁸Leah iyau, “God au baiyan iteu, yabin au agir jever awau aitai,” on mes iwabai Issachar. ¹⁹Leah inafot men ato Jacob natun orot nimoreban kaitamom ba ituai. ²⁰On iyau, “God au siwar momogin iteu, ari weie awau inkakafeu, yabin nanatun orot wat nimoreban kaitamom aitu.” On mes iwabai Zebulun. ²¹Gibui bag on natun jeverei irat ato iwabai Dinah.

²²Namon God on ari weie Rachel inos an bayoi iyafotai, ato yan ikitabirai men fifirig initu. ²³On inafot ato natun orot ituai. On iyau, “God natu orot ibiteu on au mamai engon iboseir. ²⁴Rachel fifi iwabai Joseph.¹ On iyau, “Yau ababayoi, BADA on arimon fifi tani ba initeu.”

Jacob A Laban Rus Dura Sitotorai Asi Sheep Auris

²⁵On an werai Joseph irat gibunai, Jacob imisir Laban iyawur iyau, “Yau agogoi anmatabir men anan au go au tafanamai. ²⁶Om awawau

¹ 30.24 Hebrew dura wab Joseph an yabin tani bisinai on sau, fifi tani ba eiteu o ibo inai.

nanatu mat engon eiteu, yabin osi auris on yau om aurim aboen ato yau anan. Om usagob yau mamaba wawaninai bag aiagirem on.”

²⁷Laban iyawur iyau, “Om emon obin angagaturai mes on, karun, abifefeyanim, ema. Yau au itinai asagob on, om fasimui on BADA yau imomogineu.” ²⁸Laban dura ibotein iyau, “Ekasoneu! om baiyan biyam egogoi ato yau anibaiyanim.”

²⁹Jacob iyafotai iyau, “Om usagob yau au bobo obin bag ai yamai am sheep akaifares tiwag on mes om am sheep irat inai sison kwakwan bag. ³⁰Om ainau am bobaitu on ruamom mom ubotan ato yau anan weie irat gagamin a ison kwakwan bag ato yau au bobo emon on BADA imomoginem. Baise ari on yau tou awau nanatu asi obin aurin anabo.”

³¹Laban itetamai iyau, “Ato aifan anibaiyanim?”

Jacob iyafotai iyau, “Yau men agogoi baiyan tani, om atonio dura unbibasitai on yau arimon nana am sheep ankaifares: ³²Yau ari on am sheep engon aneit anrubin sheep bobous fufufum a goat usis farem mat on anboseseiren. Osi on yau au baiyan. ³³Namon om ra gibui unanat mes on om sasasan wat uniten unsagob yau on ai dura bag ai ambin. On an werai ato sheep aubaiyan mes aboen on uninateteyen goat tani men faremin a fufufum a sheep tani men gugugurin ungagaturen on, om arimon unsagob yau on om bisimui emon abainauen.”

³⁴Laban iyafotai iyau, “Yau abibasitai, aifan uyau on nanaba taniyamai.” ³⁵Baise on ra kaitamomai Laban goat tona usis gigirumis a faremis a toub engon usis fufufum a faremis engon iboseseren, sheep guguguris mat engon iboseseiren. On nanatun orot iyeinis sikaifares, ³⁶Namon Laban atonio sheep mat iboes ato inai ra ton an bib an weromin fofonin nan. Baise Jacob on Laban an sheep fani on ikakaifares.

³⁷Jacob wengar ta ta fafames on iboen ato korofis sanan sanan iseseren a isukakairen ato wengar fous kakakaiis sigat. ³⁸Atonio wengar fafames on sheep menan sareu totom asi didiwag yen on nan nasi iya. On nan iya yabin bobaitu sareu toman mes senat ato on nan sebiyayar. ³⁹Ato goat wengar fafames nanai siniyayar ato nanatus arimon usis faremis sinarat.

⁴⁰Jacob an sheep a an goat ikusebis mabis mabis iya weie magis engon Laban an sheep a goat gigirumis a fufufum auris na iya. On eta ai on toun an sheep a goat on sison ato mabisi ikaifaren ato Laban an sheep a goat on eb mabisi.

⁴¹On an rai sheep usis obis wawanis sibiyyayar, Jacob on wengar fames nasi iyaya ato sareu an didiwag efanai ato wengar fafames bisisi nan sibiyyayar. ⁴²Baise on wengar fames on men sheep usis teinis samisamis nasi iyaya on. On mes Laban an sheep on usis teinis samisamis ato Jacob an sheep on usis obis wawanis wat. ⁴³On eta ai Jacob on inat sawarotin orot gagamin imatar, an bobaitu on irat bag, an agir orot, jever a an camel a donkey mat.

Jacob Laban Emon Iyayai

31 ¹Jacob itatam on Laban nanatun siyau, “Jacob on ot tamat an sawar ibinoanai on engon tutufin iboen. Ato ot tamat aifan ibinoanai on emon on sawar an aiwab orot imatar. ²A mat Jacob it isagob on Laban an yawas aurin ifofour on men ainau ba. ³Namon BADA on Jacob iyawur iyau, “Om ematabir men enai tatamam a am dam warar asi tafanamai. Yau arimon om bisimui anama.”

⁴On mes Jacob dura iyafar Rachel a Leah rus auris sitnat menan an bobaitu ikakaifares on nan. ⁵On iyawures iyau, “Ari aitari on, omi tamam an yawas yau auriu on men ainau ifofour ba; baise tamau an God on yau bisiwui emama. ⁶Omi rum wosagob yau tamam aurin on au faiwar tutufinai aboen. ⁷Baise on isigoeu au baiyan on wera auyotoat nanaba men fofon kaitamomai iteu on. Baise God on yau irufafareu. ⁸On an werai Laban inau, ‘Goat ato usis faremis on om am baiyan,’ bobaitu engon sintotoub on faremis. Ato on an werai inau, ‘Tisasamaris on om am baiyan,’ bobaitu engon sintotoub on nanatus bobous on tisasamaris wat. ⁹On mes God on tamam an bobaitu engon iyabaruai ato yau iteu.

¹⁰Bobaitu si baiyyar an werai on yau abomomout goat tona usis tisasamaris, faremis a gigurimis on goat toub mat sibiyayar on aites. ¹¹God an anea bomomoutai iyawureu iyau, ‘Jacob!’ Yau ai yafotai au, ‘Men, yau nio.’ ¹²Ato God an anea iyau, ‘Eit! goat tona usis tisasamaris, faremis a gigurimis on goat toub mat sebiyyar. Yau atonio bobo anafour inatar, yabin Laban abi abi engon aurim ibiyamen on aiten.’ ¹³Yau God min on Bethel nan aurim arobotet, menan matair agim Yau auriu ukutetai ato rura momon kerin umutai ato auriu aumatan dura uiyamai. Om ari bag atonio tafanam eikirir ato unmatabir men unan am rat baren tafanamai nan.”

¹⁴Namon Rachel a Leah rus Jacob siyafotai siyau, “Wei tamai an buder on men tani yen wanboai on.” ¹⁵On wei eboei on nanawan jeverig ba. Om wei utobonei, ato men on wat on, baise on wei ai baiyan an agim on engon ireben isawar. ¹⁶Sawar a agim an baiyaiwab engon ato God wei tamai emon iyabaruai on wei noai a nanatui noas. On mes God mamaba iyawurem on eiyamai.

¹⁷On mes Jacob ibotitiwag ato imisir awan ruam a nanatun iboes camel tefasi iyagagaiis. ¹⁸Ato an bobaitu engon iboes ainau iyafares sinan a mat on an sawar engon tutufin ato tafanam Mesopotamia imama ibinoanai on engon iboen imatabir men taman Isaac an tafanam Canaan aurin. ¹⁹On an werai Laban on inai an sheep bubunis ityaragen mes ato Rachel on ufutai taman an goai irui an baiyuyur god on ibotawaseiren. ²⁰Jacob on Laban isigoai men ikasonai isagob on yai kirir. ²¹On mes on an sawar engon tutufin iboen mat iyayai. On Euphrates sareu irabon weie on ibosuruf inai Gilead oyau oyau tafanam aurin.

Laban Jacob Gibunai Ifaitan Inai

²²Ra ton isawar gibunai weie sabu Laban sikasonai on Jacob iyayai. ²³Laban an dam warar orot iboes Jacob gibunai sifaitan sinai wera nimtereban ruam weie Gilead oyau oyau tafanamai nan sibotan. ²⁴On fom God bomomoutai Laban iyawur iyau, “Om unkaifarai tiwag Jacob men dura ai unau beberuai mes.” ²⁵Jacob an guwi on Gilead oyauai iyon imama. Ato Laban an dam warar mat sinat sibotanai ato osi on eb asi guwi on nan Gilead oyauai siyonen.

²⁶Ra itom weie rus osi sinofoten ato Laban imisir Jacob iyawur iyau, “Om aibo mes usigoweu ato nanatu jeverig uboes uyayai, an itin on sitau ragitai sebigagam sefatumes sai ba? ²⁷Om aibo mes usigoweu ato bubuniai uyayai kirireu? Om yau utkasoneu ato yau arimon dour tatafai, yasisirai a kwarerai nan atiyafarem utan. ²⁸Om men wera uteu ato wawau atboyayanis a nanatu jeverig ataubaitotoris, om on ojis asi bobo on uiyamai. ²⁹Yau on faiwar yen fofonin ati komasim, baise on fom on tamam an God iyawureu men eta tani ai nan dura ai anaubeberuem mes. ³⁰Yau asagob om am gogoi bag on unmatabir men unan am tafanam aurin on mes ukirireu, baise aibo mes au baiyuyur god on ubo tawaseiren?”

³¹Jacob on Laban iyafotai iyau, “Yau aber, yabin yau ainonot on om arimon nanatum wani ai nan utabarueu on mes. ³²Baise om nin iyafan ungaturai on om am baiyuyur god ibo tawaseiren, on min unasubun. Nin ati dam warar matasi, nan toum erunanag eiten aifan om noam on eboen.” Jacob on men isagob Rachel on Laban an baiyuyur god ibo tawaseiren.

³³Laban irui Jacob an guwi ai inuen, weie inai Leah an guwi ai ba, a bobo jever ruam asi guwi ai ba, baise an baiyuyur god men igaturen. Namon on inai Rachel an guwi ai ba irui. ³⁴Rachel on goa asi baiyuyur god on iboen camel an sifumama amonai iwanen ato tefanai imair imama. Laban guwi amos engon irunanagen baise osi baiyuyur god men igaturen. ³⁵Rachel taman iyawur iyau, “Au bada, auriu abi ebiyatatab, yau men fofonin namui anmisir antawar; yabin yau ari on au roke abo amama.” On mes Laban guwi amonai irunanag wat ato an baiyuyur god men igaturen.

³⁶On mes Jacob iyatatab kwakwan ato yatatabai nan Laban iyawur iyau, “Yau abifan komasin wat aurim aiyamai i? Abi sofafar astob on fasinai om faiwar ubo kouwui ufaitaniu unat nin ugat? ³⁷Ari on au sawar engon tutufin urunanagen ato am goa sawar aifan wat ugaturai on om noam i? Om nin basunai eyatet egat om am dam warar a yau au dam warar engon matasi sinitai, weie osi sinau iyafan on dura bag. ³⁸Yau om rut tamama ari on kwanda orot kaitamom isawar ato am sheep a

am goat usis engon obis wat sitotoub sirarat, a mat yau men am bobaitu boboun tani aan on. ³⁹On an rai rega kuke tutuenis sheep tani siyasubun on, yau men aboai anat abiyoboem on, baise yau tou sheep tani aboai abigaraminai. Ato om fom ai rai sheep tani kuke tutuenis siyasubun aurin on dura wawaninai uyawureu ato tani aboai anat abigaraminai. ⁴⁰Ra sigaraba wera forabin itabiu a fom an nuba sibuin imotobiu, men fofonin atenbubur. ⁴¹Ato kwanda orot kaitamom bisimui amama on atonio nanaba wat. Kwanda auyotoat an yayatan bat on nanatum jeverig ruam auris aboen, a kwanda nimtereban kaitamom on am bobaitu akaifares. Ato om nana au baiyan on wera auyotoat nanaba men fofon kaitamomai uiteu on. ⁴²Ato baise tatamau Abraham a Isaac asi God men yau bisiwui itmama mes on, om arimon erimau bag utiyafareu atan. Baise God au yababan a bobo aifan abiyamai on it, ato on fasinai On rarab fom dura wawaninai iyawurem on om bobo fetag ufour.”

Jacob A Laban Rus Sanasi Bo Baibasit Imatar

⁴³Laban on Jacob iyafotai iyau, “Atonio jeverig on yau nanatu, nanatus min yau nanatu a sawar engon tutufin ato eiten on yau noau a mat atonio bobaitu on yau au bobaitu. Baise men fofonin ari aifan aniyamai nanatu jeverig nanatus mat auris. ⁴⁴Om enat yau rut dura bo baibasit taniyamai, nin agim tanyon inag ato on tanitai on atinot inrurar on om yau rut dura tabibasitai on.

⁴⁵On mes Jacob agim gagamin kaitamom ibo tefanai irou matair mes. ⁴⁶On an dam warar orot iyawures agim siruayo ato siyadodog igai. Namon osi agim ato sibiyadodog on sesebinai simair bayu siyam. ⁴⁷Laban on agim-yadodog iyor Jegar-Sahadutha ato Jacob on iyor Galeed. ⁴⁸Laban imisir Jacob iyawur iyau, “Atonio agim-yadodog on om yau rut ati not inrurar.” On mes on efan wabin iyor Galeed. ⁴⁹Laban on eb iyau, “Om yau rut on mabit mabit tanama, baise BADA on arimon inbimateteit.” On mes on efan wabin iyor Mizpah. ⁵⁰Laban dura ibotein iyau, “Om nanatu jeverig men unkaifares tiwag ai jever tani unbiawan on men ansagob, baise unsagob on God on ebimateteit.” ⁵¹Laban Jacob aurin mat iyau, “Agim atonio yau ayadodog igai, om yau rut sanati a atonio on matair agim. ⁵²Atonio agim-yadodog a atonio matair agim on not erurar. Yau on men anigiserai an rabon om an yowim an rabim mes a om eb men unigiseirai unrabon yau unyowiu unrabiu mes. ⁵³Abraham an God a Nahor an God, osi tatamas asi God arimon sanati inigurubabanit.” On mes Jacob taman Isaac an God ikwakwafirai on Wabinai ifaro. ⁵⁴Namon Jacob bobaitu tani iyasubun ato oyau tefanai sirifu ikutetai, an dam warar ibebegis sinat ato mat bayu siyam sitom isawar weie osi nan oyauai siyen. ⁵⁵Ra itom fomenei fomenei Laban imisir nanatun jeverig a wawan fifirig iboyayanis a iyau baitotoris weie ikirires imatabir men inai an au go.

Jacob Ibotitiwag Esau Itnefotai Mes

32 ¹Jacob an dam warar mat asi etai sibib sinan men ato God an anea fani sinat sinefotai. ²On an werai Jacob on anea ites mom on iyau, “Nin on God an guwi efan,” on mes on efan iwabai Mahanaim. ³Jacob dura bo bibotis ainau iyafares sinai Edom tafanamai tuan Esau aurin. ⁴On iyaubaiyates iyau, “Omi atoio dura nanaba au bada Esau wonawur: ‘Am agirotin Jacob iyau,’ ‘Yau Laban rui weromin maiau wama inat ari weie amatabir men anat. ⁵Yau on er au cow, donkey, sheep, goat a au agir jever a agir orot. Au bada, yau dura aurim abiyafar, onai om yau auriu on am ya obin utboai.”

⁶On an werai dura bo bibotis sinat Jacob aurin ato siyawur siyau, “Wei wanai tuam Esau aurin ato ari bag on igat enat nono om innefotim mes. On an orot on 400 iboes mat senat.” ⁷Jacob atonio dura itatam on iber kwakwan an not engon ifeu. On an sabu mat simama on ikusebis kuayo matas ruam simatar. On an sheep, goat, cow a camel on eb nanaba ikusebis ruam simatar. ⁸On atonio nanaba inonot, “Esau innat kuayo matan ainauin auris inbiragit on, kuayo matan bairuin on sinayai sinan.”

⁹Namon Jacob ibayoi iyau, “O yau wawau Abraham an God, a tamau Isaac an God. O BADA Om yau untatamiu, Om uyawureu uyau, ‘Yau anmatabir men au tafanamai a au dam warar auris ato Om uyau mataniu arimon bobo obis uniyamen auriu. ¹⁰Yau on agirotiu a yau men orot obiu, baise om am kabere a am moa obin auriu ebiyamai. Ainau bag yau Jordan sareu arabon on men aifan tani abo auman arabon on ab au tutuk wat on abo arabon ato ari amamatabir on au kuayo matas ruam mat a nat. ¹¹Yau aurim ababayoi tuau Esau iman emon uniyawasiu. Yau abeber, yabin on enat on yau a jever fifi mat engon iniragitei.’ ¹²Baise om uyawureu uyau, ‘Om arimon unkaifareu tiwag a arimon uniyamai wawau agiri sinison tore an gasa ba ato men fofonin siniyab.’ ”

¹³Jacob fom kaitamom nan iyen gibunai on an bobaitu sanasi on tuan Esau an siwar irubinen. ¹⁴goat toub on 200, goat tona on orot kaitamom, sheep toub on 200, sheep tona on orot kaitamom. ¹⁵Camel toub nanatus auman on orot kaitamom, orot ta aurin auyotoat, cow toub on orot ruam, cow tona on auyotoat, donkey toub on orot kaitamom a donkey tona on auyotoat. ¹⁶On an bobo sabu on bobaitu matas ta ta nan iyeinis sinkaifaren, ato an bobo sabu iyawures iyau, “Yau aunau wotawar ato wonitai bobaitu matas ta ta basusi on sanas sinen.” ¹⁷On an bobo orot ainau intatawar on iyaubaiyatai iyau, “On an werai tuau Esau innefotem ato initetemim inau, ‘Om am bada iyafan? Om aumen enan? Atonio bobaitu engon namui on iyafan ebinoanai?’ ¹⁸Om uniyafotai unau, ‘Om am bobo orot Jacob noan. Osi on siwar an bada Esau aurin ebiyafar. Jacob toun on gibui bag enat.’ ” ¹⁹Jacob on dura kaitamom min iyabonai

bobaitu kaifarotis bairuin, baitonin a matas ta ta engon iyawures: “On an werai Esau wonnefotai, omi on dura kaitamom on nanaba wonawur.’²⁰Omi wonsagob wonau, ‘Aee, am bobo orot Jacob on gibui enat,’ ” Jacob inonot, “Siwar ato ainau ai yafar enan onai arimon nunuan anboai, weie on an werai magin anitai on abitutum on arimon ininotbureu. ²¹Jacob an siwar on engon iyafaren sinai, ato on ekesin on fom an guwi ai iyen.

Jacob Peniel Nan Orot Tani Rus Siyen Sifirur

²²On fom kaitamom Jacob imisir awawan ruam, bobo jever ruam a nanatun auyotoat an yayatan kaitamom iboes ato Jabbok sareu menan tefa on nan sirabon. ²³On iyafares sirabon gibunai on an sawar engon mat iyafaren sirabon. ²⁴Ato Jacob on ekesin nan sikirir.

Namon orot tani inat iforousai rus siyen sifirur mom inai ra iyabaseb. ²⁵On an werai orot it on men fofonin Jacob itbomerubai on mes On Jacob gesagesanai irab ikuseren. ²⁶Namon orot iyau, “Ra etotom, om eikirireu Yau anai.”

Jacob iyafotai iyau, “Om baimomogin unitai weie yau anikirirem unan.”

²⁷Orot Jacob itetemai iyau, “Om wabim mamaba?”

On iyafotai iyau, “Yau wabiu Jacob.” ²⁸Namon orot iyau, “Om wabim on men arimon sinyorem Jacob baise sinyorem Israel,^m yabin om God rum a orot fani mat woiyerarat ato tefasi ukayam.”

²⁹Jacob iyau, “Karun, abifefeyanim, om wabim ekasoneu.”

Baise on iyafotai iyau, “Om aibo mes egogoi wabiu unsagob?” Namon on Jacob imomoginai.

³⁰On mes Jacob on efan wabin iyor Peniel,ⁿ on an yabin min yau God rui magi wairuruai ato yau nana yawasiu amama. ³¹Jacob Peniel ibikirir auman auman wera igai, ato ibisait auman, yabin on an fui ikuseiren.

³²On fasinai inat ari Israel yangan foro touyan an fui matan karukar on men sam on, yabin Jacob min on rarikai nan sirab.

Jacob Esau Inefotai

33 ¹Jacob on iyeit inai Esau an orot 400 mat si nat ites, on mes fifirig ikusebis Leah, Rachel a bobo jever ruam amosi. ²Bobo jever ruam nanatus mat ainau iyeinis sitawar weie Leah nanatun mat osi gibusi sitawar ato Rachel Joseph rus on gibui bag sitawar. ³Ato Jacob toun on ainau an dam warar nasi itawar inai. Namon on ra nimtereban ruam nanaba uson itur ikwafir isur magin motob iruyein mom inai tuan orot aurin igat. ⁴Baise Esau iyayai Jacob inefotai ato iman anjonai ireben

^m 32.28 Hebrew dura wab Israel an yabin min, on God rus siyerarat. ⁿ 32.30 Hebrew dura wab Paniel an yabin min, God magin.

bonai irous iboyayanin ato rus sibotouousis. ⁵Namon Esau iyeit jever a fifirig ites ato itetem, “Atonio sabu on iyabon om mat wonat?”

Jacob iyafotai iyau, “Osi on yau nanatu God an kabere emon yau am agirotiu iteu.” ⁶Namon bobo jever ruam nanatus mat sinat Esau nanai sindas sirouen usos situr sikwafirai. ⁷Namon Leah nanatun mat sinat sindas sirouen usos situr sikwafirai ato gibui bag on Rachel natun Joseph rus sinat sindas sirouen usos situr sikwafirai.

⁸Esau on Jacob itetema iyau, “Ato bobaitu mat ainau abinofoten on an yabin aifan?”

Jacob iyafotai iyau, “Au bada nan on om am ya obin aurin.”

⁹Baise Esau iyau, “Yau taiu, yau au bobaitu on sigaraba, aifan noam on ebotan.”

¹⁰Jacob iyau, “Ambin, om am ya obin inidura bag mes on au siwar eibasitai ato ebo. Om magim aitai on God magin aitai ba, on emon om ari uboeu tiwag. ¹¹Karun, abifefeyanim, fofonin atonio siwar om aurim aboen anat on eibasitai eboen; God on yau ikabereu aifan au gogoi on engon iteu.” Jacob nana idodoai ato Esau ibasitai iboen.

¹²Namon Esau iyau, “Ot tanbotitiwag ato tanmisir tanan, yau arimon aninau anan.”

¹³Baise Jacob iyawur iyau, “Au bada, om usagob fifirig on usis sisam a yau on sheep a bobaitu fani nanatus mat abinonotis. Men fofonin ari ra kaitamom baiyagiginai nan tanan on, arimon bobaitu engon sinarab.

¹⁴Karun, abifefeyanim, om einau enai, ato yau arimon sunub sunub anigibubunuem annat, fofoninai anabib bobaitu a fifirig mat weie arimon Edom nan taninefoten.”

¹⁵Esau iyau, “Basit au orot fani on om bisimui anikirires.” Baise Jacob iyafotai iyau, “Au bada, aibo mes on nanaba ebiyamai, baise on on om am ya obin aurin.” ¹⁶On mes on rai Esau ibosuruf imatabir men inai au Edom. ¹⁷Baise Jacob on au Sukkoth inai nan an goa iyon, a bobaitu asi guwi mat iyonen. On mes efan min wabin iyor Sukkoth.

¹⁸On kounai Jacob Mesopotamia emon imatabir on obinai inat Shechem mafam gagamin Canaan tafanamai igat, ato on an guwi on motob ato mafam gagamin bisinai, on nan iyon. ¹⁹On Hamor wawan agirin Shechem taman emon on motob turin agim silver orot wat nim, onai itobon. ²⁰On nan sirifu agim kema iyon ato iwabai El Elohe^o Israel asi God.

Dinah Aurin Bobo Komasin Sifour

34 ¹Ra tani Jacob a Leah rus natus jeverei wabin Dinah on inai Canaan jever itfasiues mes. ²On an werai orot wabin Hamor on

^o 33.20 Hebrew dura wab El Elohe Israel an yabin tani min God, On Israel an God o Israel an God Faiwarin Bag.

Hivi dam emon ato on min tafanam an aiwab orot imama. On natun orot wabin on Shechem on Dinah it igogoi ato irous aurin bobo komasin ifour ikafotai. ³Shechem on Dinah it on momogin fafa. On mes on nunuan tutufinai inuaboai a on ifourtobon dura obis wat on jeverei aurin ibikakafun nunuan itboai mes. ⁴On mes Shechem on taman Hamor iyawur yau, “Bab yau agogoi atonio jeverei Dinah unboai ato yau on aniawan.”

⁵On gibunai Jacob isagob Shechem on natun jeverei aurin bobo komasin ifour. Baise on nanatun orot engon sigat sinai asi bobaitu sikakaifares on mes Jacob on men dura aifan tani ikakafun ato imousin sitmatabir sitnat au go weie dura itikakafun. ⁶Shechem taman Hamor on igat inai Jacob rus sitikakafun mes. ⁷On werai Jacob nanatun bobo isawar simatabir men sinat on dura sitatam Shechem on osi robus Dinah aurin bobo komasin ifour ikafotai. Osi nunuas iyababan ato siyatatab kwakwan yabin Shechem ato Jacob natun jeverei aurin yawas komasin ifofour on Israel amonai on mamai gagamin ato on bobo nanaba on men itmatar. ⁸Baise Hamor on Jacob nanatun mat iyawures yau, “Yau natu orot Shechem on nunuan tutufinai Dinah egogoi, karun, abifefeyanim, jeverei woitai iniawan. ⁹Ot dura bo baibasit taniyamai ato wei on omi ami jeverei waniawanis ato omi on eb wei ai jeverig woniawanis. ¹⁰Ato omi wei ai tafanamai mat tanamair tanama ato tafanam on ruruseren omi aurim nan wonama, wonabib a motob wonabo sininoanim.”

¹¹Namon Shechem on Dinah taman a rorobun auris yau, “Omi ami ya obin on woiteu ato yau arimon aifan ami gogoi on aniyamai. ¹²Omi jeverei woniteu aniawan on ato wonawureu aifan siwar wogogoi on anitem. Mat kekes an rat menan fofonin on wonawureu; yau arimon an baiyan mamaba woyeyeinin on nanaba anibaiyan.”

¹³Ato Jacob nanatun on Hamor natun Shechem rus auris on men dura bagai siyafotes on. Osi sisosoufis yabin Shechem on osi robus Dinah aurin bobo komasin ifour ikafotai. ¹⁴Osi siyawur siyau, “Wei orot ato men siaskibubuai on men robui wanitai iniawan on. On arimon wei auri on mamai gagamin bag. ¹⁵Wei eta kaitamomai wat nan baibasit wanitem. Omi ami orot engon woniaskibubues wonnat wei ba wonmatar. ¹⁶Namon wei arimon wanibasitem wei omi ami jeverei waniawanis ato omi on eb wei ai jeverig woniawanis a mat omi amomui wanamair wanama ato mat dam kaitamom tanmatar. ¹⁷Baise dura ato askibubu aurin wau on men wonbibasitai on, wei arimon jeverei wanboai wanan.”

¹⁸Hamor natun Shechem rus atonio dura sitatam on sibasitai. ¹⁹Shechem on ra kaita inai ato siaskibubuai, yabin on Jacob natun jeverei on inuaboai kwakwan. Shechem min wabin on gagamin an dam warar amosi.

²⁰On mes Hamor natun Shechem rus sinai asi mafam gagamin an furi awanai nan on sabu engon auris sikakafun. ²¹Osi siyawures siyau,

“Atonio osi orot on sabu obis tanikirires nin tafanamai mat tanama ato amonai sinama sinitotobon. Tafanam on irat kwakwan fofonin osi mat auris. Ot osi nanatus jeverig taniawanis ato osi mat ot nanatut jeverig siniawanis. ²²Baise atonio bobo kaitamom aurin on tanibasit on arimon atonio sabu mat engon kaitenei tanama. On min ot orot engon tutufin siniaskibubuet tannat osi ba tanmatar. ²³Ot ati baibasit wat on tanites ato asi bobaitu a asi sawar engon on ot sininoanit ato sanati sinamair sinama.” ²⁴Sabu engon tutufin sinat Hamor natun Shechem rus asi dura sitatan on engon sibasit, ato orot engon on mafam gagamin amonai on siaskibubues.

²⁵Ra ton isawar gibunai, orot engon sibiaskibubues on gawud auman simama, Jacob nanatun orot ruam, Simeon a Levi, osi min Dinah rorobun bag, asi seri siboen ato sinai mafam gagaminai sunub sirui sisafures mom ato orot engon siyasubunues. ²⁶Osi Hamor natun Shechem rus mat seriai siyasubunues. Namon osi Dinah Shechem an goa emon sibo ato sigat sinai. ²⁷On an rai Simeon a Levi sabu siyasubunues isawar gibunai, Jacob nanatun orot fani on engon sinat mafam gagamin amonai gugu engon siboen yabin robus Dinah aurin bobo komasin sibiynamai sikakafotai aurin on an soi sibo. ²⁸On mes osi ainauan gigiawan on ato mafam gagamin amonai a kounai nan sheep, cow a donkey nan simama on engon siboen. ²⁹Osi on sawar asi baiyas gagamis, jever fifi engon sifatumes, asi buder a asi goa amonai sawar siyen on engon siboen mat sinai.

³⁰Namon Jacob on Simeon a Levi rus iyawures iyau, “Omi on bit gagamin bag on wobo wonat auriu yau wabiu woikomasai. Omi on bobo wobiyamai on Canaan sabu a Perizz sabu engon nin tafanamai semama on arimon yau sinisisiweiiu. Ot sabu men sigaraba on ato osi fofonin engon sinikaita sinnat siniragiteu on, yau au dam warar mat fofonin engon sinasubunuet insawar.

³¹Baise osi ainauan gigiawan on siyafotai siyau, “Wei men fofonin robui wanikirir on nanaba aurin sinafour eta eta an jever ba.”

Jacob An Dam Warar Mat Sinai Au Bethel

35 ¹Namon God on Jacob aurin iyau, “Om egai au Bethel ato nan unama. Om sirifu agim kema Yau am God auriu unyon. Yau min on efanai nan aurim arobotet, on an rai tuam Esau uyai kirir nan.”

²On mes Jacob an dam warar, awawan, nanatun a sabu iyabon nan mat simama on iyawures iyau, “Omi sabu touman asi god ta ta ato bisimui sen on wonrebenen. Omi toum wonyamuyarim ato beber gumidaris wonoten. ³Namon ot taniwabunag ato tanmisir tanag au Bethel, on nan yau arimon God aurin sirifu agim kema anyon. On God min yau au yababan an rai on ibaisiu a menan menan anan on yau bisiwui ima.” ⁴On mes osi sabu touman asi god ta ta a tainas buwor

siyoten on engon tutufin Jacob sitai. Ato on Shechem nan wengar Dunar gagamin babanai isar itounen.

⁵On an werai Jacob nanatun mat sibosuruf sibib, God an beruber gagamin on ato mafam gagamis bisisi siyen on engon itaragabues, on mes osi mafam sabu on men fofonis gibusi sitfaitanis sitan on. ⁶Jacob an sabu engon mat sinat mafam Luz nan sigat, on min ari seyoyorai Bethel, Canaan tafanam amonai nan. ⁷On sirifu agim kema iyon ato efan wabin iyor, “Bethel an God”,^p yabin on an werai Jacob on tuan orot iyayai kirir inan ato God Toun on nan aurin irobotet. ⁸Rebecca an fio jever Deborah on nan irabob ato wengar Dunar gagamin babanai sigarob, Bethel bisinai. On mes wabin siyor, “Tou an Dunar’.

⁹On an werai Jacob Mesopotamia emon imatabir inat men, ato God on nan aurin iroboet men ato imomoginai. ¹⁰God iyawur iyau, “Om wabim on Jacob ato men gibui sinyorem men Jacob, ab om wabim on sinyorai Israel.” Om mes God iwabai Israel. ¹¹Ato God iyawur iyau, “Yau on God Faiwariu Bag! Om fifirig sigaraba unitu ato tafanamai sabu on arimon inison kwakwan, ato om nanatum wawam agirim fani on arimon aiwab sinmatar. ¹²Yau tafanam ato Abraham a Isaac abites on arimon anitem, ato on motob min nanatum wawam agirim mat anites.” ¹³Namon God on efan menan Jacob aurin ibikakafun on ikirir ato igai. ¹⁴On nan Jacob matair agim menan God aurin ibikakafun nan irou ato sareu wine a rura momon an kerin on tefanai ideburen ikutetai God aurin. ¹⁵On mes Jacob on efan iyor Bethel menan God on aurin ibikakafun nan.

Rachel Itoub Rabob

¹⁶Namon Jacob an dam warar mat Bethel sikirir sinai. On an werai osi sinat Ephrath mafam aurin sibiufin ato Rachel on fifi itarat aurin on koun igigiaai ato usibaban gagamin iboai. ¹⁷On usibaban gagamin bag iboai an werai, on an baitotoubis jever iyawur iyau, “Rachel, om men unaber mes, om fifi orot tani ba unituai.” ¹⁸Baise Rachel on irarabob, ato an aratein kanfoun ibisawarai on fifi iwabai Ben-Oni.^q Baise taman on iwabai Benjamin.^r

¹⁹Ato Rachel irabob ato Ephrath eta rewanai nan sigarobai, on min Bethlehem. ²⁰Jacob matair agim nan Rachel an budi tefanai irou, ato ari ra agim min nan nana yen. ²¹Jacob inanawan inai Midgal Eder ikirir inai rebanai nan an guwi iyon. (Midgal Eder an yabin min kaifarotin bobaitu ekakaifares an goa ann weromin.)

^p 35.7 Hebrew dura wab El Bethel an yabin min, Bethel an God. ^q 35.18 Hebrew dura wab Ben-Oni on atonio dura an yabin tani bisinai on, yau fifi orot on usibaban auman ai tuai. ^r 35.18 Hebrew dura wab Benjiman an yabin on, fifi arimon wabin duran gagamin.

Jacob Nanatun
(1 Chronicles 2.1, 2)

²²Jacob on nana on tafanamai imama ato natun Reuben on inai taman awan ufuigeg jever wabin Bilhah on rus siyen; Jacob on dura itatam on iyatab kwakwan.

Jacob nanatun orot wat engon auyotoat an yayatan ruam. ²³Leah nanatun orot, osi wabis min Reuben, (Jacob natun ainau orot), Simeon, Levi, Judah, Issachar a Zebulun. ²⁴Rachel nanatun orot, osi wabis min Joseph a Benjamin. ²⁵Rachel an bobo jever Bilhah nanatun orot, osi wabis min Dan a Naphtali. ²⁶Leah an bobo jever Zilpah nanatun orot, osi wabis min Gad a Asher. Atonio osi fifirig orot engon on Jacob nanatun ato osi Mesopotamia nan sirat.

Isaac An Rabob

²⁷Jacob inat au go taman Isaac aurin Mamre mafamai nan, Hebron bisinai menan Abraham a Isaac rus simama nan. ²⁸Isaac ima an kwanda 180 ²⁹ato on iorokwar bag weie irabob, ato nanatun Esau a Jacob rus sigarobai.

Esau Nanatun Wawan Agirin
(1 Chronicles 1.34-37)

36 ¹Atonio osi on Esau nanatun wawan agirin, on min wabin tani seyoyorai Edom. ²Esau on Canaan jever iawanis. Jever ainaiun wabin on Adah, on min Hitt orot wabin Elon on natun jeverei. Jever bairuin wabin on Oholibamah, on min Anah natun jeverei ato on Zibeon Hivi orot on wawan jeverei. ³ato jever baitonin wabin on Basemath, on min Ishmael natun jeverei a Nebaioth robun. ⁴Ato Adah natun orot Eliphaz ituai; Basemath natun orot Reuel ituai ⁵ato Oholibamah on nanatun orot Jeush, Jalam a Korah itues. Osi fifirig orot engon on Esau nanatun Canaan nan sirat.

⁶Namon Esau awawan, nanatun orot, nanatun jeverig a dam warar engon, an bobaitu a sawar gugu ato Canaan tafanamai imama ibinoanai on engon iboen ato tain Jacob ikirir igat inai tafanam taniai nan ima. ⁷Esau tain Jacob ikirir inai yabin osi rus asi sawar gugu on irat kwakwan bag a asi bobaitu on sison kwakwan, on mes men fofonin rus efan kaitamomai sitama on. ⁸On mes Esau on oyau tafanam wabin Seir, on nan ima. Esau wabin tani min seyoyorai Edom.

⁹Atonio on Esau nanatun wawan agirin asi dudur. Osi min Edom yangan nan oyau Seir nan simama. ¹⁰Esau nanatun orot wabis on: Eliphaz, Esau awan Adah on ituai a Reuel on Esau awan Basemath on ituai. ¹¹Eliphaz nanatun orot, osi wabis on Teman, Omar, Zepho, Gatam a Kenaz. ¹²Esau natun Eliphaz mat awan tani wabin Timna, on natun

Amalek. Atonio fifi orot on Esau awan Adah, on wawan. ¹³Reuel nanatun orot, osi wabis on Nahath, Zerah, Shammah a Mizzah. Atonio fifirig orot on Esau awan Basemath on wawan. ¹⁴Esau awan Oholibamah on nanatun engon ton itu: Osi min Jeush, Jalem a Korah. Oholibamah min Anah natun jeverei a Zibeon wawan jeverei. ¹⁵⁻¹⁶Atonio on dam ta ta Esau emon. On natun ainau orot wabin Eliphaz on nanatun wabis on: Teman, Omar, Zepho, Kezaz, Korah, Gatam a Amalek, osi engon on Esau awan Adah on wawan orot.

¹⁷Esau natun Reuel on nanatun, osi amosi on dam ta ta on ato nanaba: Nahath, Zerah, Shammah a Mizzah. Osi min Esau awan Basemath on wawan orot.

¹⁸Atonio osi dam ta ta on Esau awan Oholibamah, Anah natun jeverei nanatun orot, osi wabis min Jeush, Jalam a Korah. ¹⁹Atonio dam ta ta on Esau, on min Edom on nanatun wawan agirin.

Seir Nanatun Wawan Agirin

(1 Chronicles 1.38-42)

²⁰Atonio on Seir nanatun orot osi min Hor yangan, ainau Edom nan simama, osi wabis min Lotan, Shobal, Zibeon a Anah, ²¹Dishon, Ezer a Disham, osi min Seir nanatun, Hor dam unis Edom nan simama.

²²Lotan nanatun orot, osi wabis min Hori a Homam ato Lotan robun on Timna.

²³Atonio on Shobal nanatun orot, osi wabis min Alvan, Menahath, Ebal, Shepho a Onam.

²⁴Zibeon nanatun orot, osi wabis min Aiah a Anah. Atonio Anah min on efan koiteterinai nan taman an donkey ikakaifares ato kibubur sareu forabin igaturai. ²⁵Anah nanatun, osi wabis min Dishon a Oholibamah, on min Anah natun jeverei. ²⁶Dishon nanatun orot, osi wabis min Hemdan, Eshban, Ithran a Cheran. ²⁷Atonio osi on Ezer nanatun orot, osi wabis min Bilhan, Zaavan a Akan.

²⁸Atonio on Dishan nanatun orot, osi wabis min Uz a Aran.

²⁹⁻³⁰Atonio on Hor sabu asi dam unis Seir tafanamai simama, osi wabis min Lotan, Shobal, Zibeon, Anah, Dishon, Ezer a Dishan.

Aiwabis Iyabon Edom Sibinetewar

(1 Chronicles 1.43-54)

³¹Atonio on aiwabis ainau Edom tafanamai sibiaiwab weie Israel aiwab imatar. ³²Boar natun Bela on Edom tafanamai ibiaiwab, an mafam gagamin wabin Dinhabah. ³³Bela irabob gibunai Zerah natun Jobab, Bozrah emon on Bela an efan ibo iaiwab. ³⁴Jobab irabob gibunai, Husham, Teman tafanam emon on an efan ibo iaiwab. ³⁵Husham irabob gibunai Bedad natun Hadad on an efan ibo i aiwab. Hadad inai Moab

tafanamai nan Midian sabu mat sibigagam ato Hadad isowar ibomerubes. Hadad an mafam gagamin wabin min Avith. ³⁶Hadad irabob gibunai Samlah, Masrekah emon on an efan ibo iaiwab. ³⁷Samalah irabob gibunai Shaul, Rehoboth emon Euphrates sareu bisinai on an efan ibo i aiwab. ³⁸Shaul irabob gibunai Achbor natun Baal-hanan on an efan ibo iaiwab. ³⁹Achbor natun Baal-hanan irabob gibunai Hadar on an efan ibo iaiwab. An mafam gagamin wabin Pau ato awan wabin Mehetabel, Matred natun jeverei a Me-zahab wawan jeverei.

⁴⁰⁻⁴³Atonio osi on Edom yangan asi dam unis wabis: Timna, Alvah, Jetheth, Oholibamah, Elah, Pinon, Kenaz, Teman, Mibzar, Magdiel a Iram. Osi dam kakaita kakaita on mafam mabis mabis on tafanamai nan simair sima, ato osi dam unis wabis on mafam siwabis. On min Esau Edom yangan wawas agiris.

Joseph Tutuan A Tain Mat

37 ¹Jacob nana Canaan tafanamai ima, menan taman imama nan, ²ato atonio on Jacob an dam warar asi dudur.

Joseph on jorei boboun an kwanda auyotoat an yayatan nimtereban ruam on taitain tutuan mat sheep a goat sikakaifares. Osi fifrig min taman awawan ufuigeg ruam, Bilhah a Zilpah nanatus. Ato taitain tutuan aifan bobo komasis sibiyaamen on inat tamas ikakasonai.

³Jacob wabin tani min Israel, on Joseph inuaboai kwakwan bag men nanatun fani ba, yabin on iorokwar bag weie Joseph irat. On Joseph an baitakwakwaren obin weromin a imas mat weromis iyamai wein. ⁴On an werai taitain tutuan sit on osi tamas on Joseph inuaboai kwakwan men osi ba, on mes tais tuas sisusuneai kwakwan ato men moa obinai aurin sibikakafun.

⁵Fom tani Joseph ibomomout ato taitain tutuan on bomomout ikakasones on, osi aumiet bag sisusuneai. ⁶Joseph on iyawures iyau, “Eii! Omi au bomomout anau wontatam. ⁷Ot engon masauai sawareg tagegedauen ato ra kaita yau au kafurir on imisir totor itawar. Ato omi ami kafurir on yau au kafurir sikibubuai ato aurin usos situr sisur.” ⁸Baise Joseph taitain tutuan on dura sitatam ato siyawur siyau, “Om enonosin om aiwab orot unmatar ato wei auri unibad i?” On mes osi nana aumiet bag sibisusuneai yabin on an bomomout a an dura aifan osi auris ibikakafun on fasinai.

⁹Namon Joseph bomomout tani ba it ato taitain tutuan ikasones iyau, “Yau bomomout tani ba ait, on nan ait on wera, roke a siribod auyotoat an yayatan kaitamom on yau auriu usos situtur.”

¹⁰Joseph an bomomout mat on taman iyawur, ato taman imisir igam iyawur iyau, “On bomomout on aifan? Om enonosin on ayom, taitaim tutuam a yau on wannat om aurim usoi wantur i?” ¹¹Joseph

taitain tutuan on sibiboboarai baise taman on bomomout aurin on nana ibinonotai.

Joseph Sitobonai Ato Sibo Sinai Au Egypt

¹²Ra kaitamom Joseph taitain tutuan sinai Shechem nan tamas an bobaitu sitkaifares mes. ¹³Jacob on Joseph iyawur iyau, “Yau agogoi unan au Shechem, menan taitaim tutuam bobaitu sekakaifares nan.”

Joseph iyafotai iyau, “Basit tamau, yau anan.”

¹⁴Jacob on natun iyawur iyau, “Om enai unites, taitaim tutuam a bobaitu mat engon basit wat ai ambin, ato unmatabir unkasoneu.” On mes on taman Hebron roubaban emon iyafarai inai Shechem igat,

¹⁵ato on efanai taitain tutuan inunuenis, ato orot tani Joseph aurin igat ato itetemei iyau, “Om abifan enunuen?”

¹⁶On iyafotai iyau, “Yau taitaiu tutuau anunuenis, osi nin asi bobaitu sikakaifares, fofonin utkasoneu osi on menan?”

¹⁷Orot iyawur iyau, “Osi sinai nono, atatamis siyau on au Dothan senan.” On mes Joseph taitain tutuan gibusi inai Dothan nan igatures.

¹⁸Joseph taitain tutuan on nanenei nan sit i nat, ato weie on auris itnat itiufin, osi siyanu sitasubun mes. ¹⁹Osi tous sanasi siyau bonen, “Woit! Bomomoutotin atonio enat. ²⁰Omi ne wonat, ari weie tanasubun ato dogu sareu simamutinis sen on tani amonai tanribirirai insur; namon ot tanau on rega an bobaitu tutuenis siyan. Ato tanitai on an bomomout emon arimon aifan inmatar.”

²¹Reuben on taitain asi dura itatamis ato ifourtobon Joseph itiyawasai mes. On iyau, “Ot men tanasubun mes. ²²Ot asir efan koiteterinai atonio dogu sareu rarraninai tanribirirai insur ato men usibaban tanitai.” On dura nanaba iyawures yabin on inonot taitain tutuan emon on itiyawasai ato itiyafarai men itmatabir taman aurin. ²³On an werai Joseph inat taitain tutuan auris igat mom, osi an baitakwakwaren weromin imas weromis mat on sisafef siboseir. ²⁴Namon osi Joseph sibo ato dogu sareu rarranin amonai siribirirai isur.

²⁵Namon osi simair bayu sitam mes ato matas siyeit on Ishmael yangan Gilead emon sinan au Egypt on sites. Osi asi camel tefasi on asi fio yandes ninibis asi baiyas gagamis ta ta on siyagagaien siboen sinat. ²⁶Judah taitain tutuan auris iyau, “Ot tait tanasubun tanibuniai weie on amon emon min arimon aifan wat tanboai?” ²⁷Ot on Ishmael yangan auris tantobonai. On nanaba taniyamai on men arimon fifi usin taniruyein on. Yabin fifi on ot tait tuat a ot ati tara biot turin.” On taitain tutuan engon sibasit. ²⁸On an werai Midian baitotobonotis sinat sigat, Joseph taitain tutuan on Joseph dogu emon sitibogai igai, ato Ishmael yangan auris agim silver orot kaitamomai sitobonai ato sibo sinai au Egypt.

²⁹On gibunai Reuben imatabir men inat dogu sareuai ato it on Joseph nan ambin ato on iyababan kwakwan an beber isafef. ³⁰On taitain auris imatabir inai ato iyau, “Fifi on nan ambin! Yau arimon abifan aniyamai?”

³¹Namon osi goat tani siyasubun ato Joseph an baitakwakwaren sibo tara ai sitamumun. ³²Osi an baitakwakwaren sibo simatabir men sinat tamas aurin ato siyawur siyau, “Wei atonio baitakwakwaren on nan iyen waturai. Om eit tait, atonio baitakwakwaren min om natum noan i?”

³³Jacob on natun an baitakwakwaren it tiwag isagob ato iyau, “Dura bag! Nin on yau natu Joseph an baitakwakwaren. Rega an kuke tutuenis fani siyasubun. Yau natu Joseph on sisafefai gugud imatar ato siyan.”

³⁴Jacob iyababan ato beber gadur iyoten ato natun aurin ra weromin itou iroro. ³⁵On nanatun fifirig jeverig sinat sitkubainunubai mes, baise on men igogoi sitkubainunubai ato iyau, “Yau nana natu an roro auman anmama anarab. On mes on natun Joseph aurin on nana itou roro auman ima.

³⁶On werai Egypt nan on eb Midian yangan Joseph Potiphar aurin sitobonai. Potiphar min Egypt aiwab orot an goa kaifarotin gagamin a on toum min kaifarotis asi bainetewar orot gagamin.

Judah Tamar Rus

38 ¹Wera fani sisawar gibunai Judah taitain tutuan ikirires ato inai orot wabin Hirah on rus sitama mes, on min Adullam mafam emon. ²On nan Judah on Canaan orot wabin Shua natun jeverei igaturai. On iawan ato rus siyen; ³on jeverei inafot ato natun orot ituai wabin iyor Er. ⁴Gibui on inafot men ato natun orot ituai wabin iyor Onan. ⁵On min on fifi orot tani ba ituai wabin iyor Shelah. Ato Judah min Achzib nan imama nan fifi orot irat.

⁶Judah on natun ainau orot wabin Er on awan irubin. On jeverei min wabin Tamar. ⁷Baise Judah natun ainau orot Er on bobo komasis BADA matanai ifofour; on mes BADA on Er iyasubun irabob. ⁸Namon Judah on Er tain orot Onan iyawur iyau, “Om enai tuam rabobin an kena rum wonen. Ot ati baifafaro iyau nanaba on tuam nanatun ambin inarab inan on tain giya orot on jever iniawan ato fifirig sinarat on tuan orot rabobin nanatun mes.” ⁹Baise Onan isagob fifirig sinrarat on men arimon on nanatun on. On fasinai on tuan kena rus si yen on, an sareu motobai idedebur isusur onai on men fifi tani itarat tuan orot aurin on. ¹⁰Onan bobo aifan ibiyamai on komasin BADA matanai, on mes BADA on Onan mat iyasubun irabob. ¹¹Namon Judah rawan jever Tamar iyawur iyau, “Om unatabir men unan tamam an goai nana kena unmama ato yau natu orot Shelah inarat gagamin inmatar.” On nanaba iyau yabin on iber, ari Shelah ba inarab ato tutuan sirarabob ba. On mes Tamar imatabir men inai taman an goai imama.

¹²Kwanda fani sisawar gibunai Judah awan, Shua natun jeverei on irabob. Judah on an roro wera isawar gibunai, on turan Hirah on min Adullam emon on rus sinai efan Timnah nan sabu on an sheep bubunis siyayaragen on itites mes. ¹³Sabu fani Tamar siyawur on rawan orot Judah on enan au efan Timnah nan an sheep bubunis inyaragen mes. ¹⁴Tamar on isagob nono Judah natun giyamomos Shelah on irat orot imatar ato men sitai iawan on. On mes on kena an baitakwakwaren usinai siyen on iboseseren ato beber ibo magin ikukum toun ibuniai. Ato on inai Enaim mafam an eta awanai nan imair imama. On eta kaitamom min on inai Timnah mafamai igat.

¹⁵On an rai Judah ibib inat it on men isagob on yabin on magin ikukum on mes. On inos on eta eta an jever. ¹⁶On aurin Judah irabon inai eta rebanai ato iyau, “Yau agogoi rut tanen.” Judah on men isagob on rawan jever.

Tamar iyau, “Om rut tanen aurin on aifan wat arimon uniteu?”

¹⁷On iyafotai iyau, “Yau au goat boboun etatar on aurim aniyafar.”

Ato jever iyau, “Basit wat, ato om sawar tani uniteu on aumatan ba bisiwui an kakaifarai weie gibui goat uniyafar.”

¹⁸Judah itetemi iyau, “Ato aifan egogoi anitem on aumatan ba bisimui inen?”

Jever iyafotai iyau, “Om anjomui damud er wabim auman on a am tutuk on uniteu.” On mes Judah sawar iboen jever itai. Namon on rus siyen ato jever inafot. ¹⁹Tamar inai au go, on magin beber iboseir ato an kena baitakwakwaren on iyoten men.

²⁰On gibunai Judah on turan Hirah iyafarai goat boboun ibo inai jever ititai ato an gamin aumatan sawar ato bisinai siyen on itabo mes. Baise on jever men igaturai on. ²¹Hirah on Enaim an orot fani nan on itetemis iyau, “Eta eta an jever nin eta rewanai imama on menan?”

Osi siyafotai siyau, “Nin men eta eta an jever tani emama on.”

²²On mes Hirah imatabir men inai Judah aurin ato iyau, “Yau eta eta an jever men agaturai on. Ato orot on mafam emon on eb siyau, ‘Nin men eta eta an jever tani emama on.’ ”

²³Namon Judah iyau, “Na eikirir, sawar aifan bisinai sen on bagun on ininoanai. Ot men tagogoi sabu sinikoboit sinsererit. Yau afourtobon atibaiyanai, baise om jever men ugaturai on.”

²⁴Roke ton isawar gibunai, sabu fani on Judah siyawur siyau, “Om rawam jever Tamar on eta eta an jever ba fetag fetag orot mat siyen simimisir ato ari on inafot.”

Judah dura wawaninai iyau, “Omi wobo wogat ato wairafai woter inaras inarab.”

²⁵Osi Tamar sibo sigat ato dura iyafar rawan orot aurin iyau, “Yau on orot iyafan atonio osi sawar ebinoanai on emon on ai nafot. Omi woinateteyen tait, iyafan an sawar, damud wab auman a tutuk.”

²⁶Judah sawar iten isagob ato iyau, “On on bobo obin iyamai, yabin yau dura aifan au on men aiyamai, natu orot Shelah men aitai iawan, ato Judah men gibui rus siyen.

²⁷On an wera inat Tamar itatoub mes on osi sigaturai on arimon fifirig orot sisiru sinarat. ²⁸On koun igigiyai usibaban gagamin iboai an werai on fifi tani iman ainau iyotet igat ato baitotoubis an jever on fifi iman ibo uram mururinai iyous ato iyau, “Atonio on ainau irat.” ²⁹Baise on iman itein irui men ato tain giya orot on inau irat, on mes baitotoubis an jever iyau, “Om ato nanaba toun am eta uwawar ugat!” ato on iwabai Perez. ³⁰Gibui on tuan imanai uram mururin auman irat ato iwabai Zerah.

Joseph Potiphar An Goai Imama

39 ¹Ishmael yangan Joseph sibo sisur sinai Egypt nan ato Potiphar itobon inat an bobo orot mes imatar. Potiphar min Egypt aiwab orot an goa amonai an bobo an orot gagamin a on toun min aiwab orot an goa kaifarotis asi bainetewar orot. ²BADA on Joseph bisinai imama on mes iyamai an bobo on engon obis totoris wat ifofour. On an bada Egypt orot an goai imama, ³ato Potiphar it isagob BADA on Joseph bisinai imama on mes an bobo aifan ibiyamen on engon tutufin obis wat. ⁴Potiphar on Joseph aurin iyasisir kwakwan bag, on mes iyamai inat an bobo orot mes imatar. On Joseph baibad itai bobo orot engon Potiphar an goa amonai sibobo on asi orot gagamin imatar a an sawar engon on Joseph imanai iyagai. ⁵On an werai nan Joseph fasinai on BADA Egypt orot an goa amonai sawar engon tutufin on ibinoanai a an masau mat engon imomoginen. ⁶On mes Potiphar on Joseph itutumai ato an sawar engon on ibinoanai on iyabonai Joseph an baibad babanai on ikakaifaren ato on men aifain tani ibinonotai on. Baise on toun on bayu mamaba inam inatom an eta wat on ikakaifarai.

Joseph an itin on obin a ann iman irou irat. ⁷Ato wera men weromin gibunai, on an bada awan jever ibosuruf Joseph igogoi ai ato iyawur rus siten mes. ⁸Baise Joseph men igogoi ato an bada awan jever iyawur iyau, “Etei. Om unsagob on yau au bada orot itutumeu go amonai sawar engon tutufin yau au baibad babanai iyein akakaifaren, on mes goa amon an bobo on men tani ebinonotai on, yabin yau on nin. ⁹Yau au baibad atonio goa amonai on, on rui fofon, mat on men aifan sofafar tani auriu iyein on. Ab bobo kaitamom wat men ibiteu on om, yabin om on au bada orot awan. Yau men fofonin on bobo komasin nanaba aniyamai ato God matanai arimon anbokomas. ¹⁰Jever on ra fufur Joseph irurutobonai, baise on men i gogoi rus siten.

¹¹Baise ra kaitamom Joseph irui goa amonai an bobo itabo mes. On werai nan bobo orot on men iyafan tani on bobo efanai. ¹²Potiphar awan on Joseph an beberai ibo ato iyau, “Om enat rut tanen.” Baise Joseph on

jever iman iyaskou ato goa emon iyayai igat ato jever on Joseph an beber wat on ibotan. ¹³On an werai jever it on Joseph an beber on imanai ikirir ato goa emon iyayai igat, ¹⁴jever on an goa bobo orot auris iyor ato iyawures iyau, “Omi atonio beber woit! Yau awau on atonio Hebrew orot ibo inat ot ati goai on mamai gagamin itet. On yau auriu irui ato igogoi rui waten mes, baise yau aumiet bag aiyoku. ¹⁵Ato on an werai itatam yau aumiet bag aiyoku, on mes on an beber yau bisiwui ikirir ato iyayai igat.”

¹⁶Jever on Joseph an beber iyein i yen ato awan orot inat au go. ¹⁷Namon on dudur kaitamom min awan aurin idudur iyau, “Atonio Hebrew agir orot om ubo u nat on auriu irui ato bobo komasin itiyamai itimamaui mes. ¹⁸Baise on an werai yau aumiet bag aiyoku on mes, on an beber bisiwui ikirir ato iyayai igat.”

¹⁹On an werai Joseph an bada orot on awan jever an dudur itatam aifan Joseph ibiyamai on iyatatab kwakwan. ²⁰Ato on an orot iyafares Joseph sifatumai ato fafatum goai siwan, menan aiwab orot an fafatum sabu simama nan. Ato Joseph min on nan ima.

²¹Baise BADA on Joseph bisinai imama a ibimomoginai on mes fafatum goa an bainetewar orot Joseph itai on nunuan iboai. ²²On mes fafatum goa an bainetewar orot on Joseph irubinai ato baibad itai fafatum yangan fani a bobo engon ato fafatum goa amonai on ikakaifaren. ²³Fafatum goa an bainetewar orot on bobo aifan Joseph ibitai on men ibinonotai on, yabin BADA on Joseph bisinai imama ato iyamai bobo aifan engon ibiyamen on obis wat.

Joseph Fafatum Orot Ruam Asi Bomomout Yabis Irubounen

40 ¹Wera fani sisawar gibunai, Egypt an aiwab orot an sareu wine kaifarotin a rafi teren an orot gagamin rus on asi aiwab orot aurin bobo komasin tani siyamai.

²Aiwab orot on ato osi babad ruam auris iyatatab, ³ato ifatumes fafatum goai iwanis menan Joseph imama nan. On min kaifarotis asi bainetewar orot an goa. ⁴Osi wera weromin fafatum goai sima ato kaifarotis asi bainetewar orot on Joseph irubinai osi asi bobo orot mes imatar.

⁵Fom tani fafatum goai nan sareu wine kaifarotin a rafi teren orot gagamin rus sibomomout ato asi bomomout asi yabis on ta ta. ⁶Ra itom fomenei Joseph inat auris ato asi itis iten on men sibiyasisir on. ⁷On mes on itetemis iyau, “Omi aibo mes wobiyababan?”

⁸Osi siyafotai siyau, “Wei rui fom wabomomout, baise men iyafan tani nin arimon waibomomout asi yabis inaububunag tiwag wantatam on.

Namon Joseph iyawures iyau, “God Toun on sagob ebites ato bomomout yabis saububunag, omi ami bomomout wokasoneu antatam.”

⁹On mes sareu wine kaifarotin iyau, “Yau au bomomout ait on wengar wine on yau nawui i yen. ¹⁰Ato on wengar wine on fafamen ton. On famen emon isisig igat roroun iyein ato sasasan wat uwan an beran iyein ato uwas sibosuruf simumurur. ¹¹Yau on aiwab orot an viga abotan. Yau uwan aboen abirowen ato kerin on an vigai isur namon aiwab orot aitali.”

¹²Namon Joseph iyau bunagai iyau, “Fafamen ton an yabin on ra ton. ¹³Ra ton amonai aiwab orot arimon fafatum goa emon inboseirim ungat ato ainau am bobo ubobo nan inyeinim men. Om arimon ainau ufour ba, an sareu wine kaifarotin unmatar on bobo unabo. ¹⁴Baise on an rai om am eta engon obin wat inan on karun, abifefeyanim, yau men uninosfoteu mes a am moa obin auriu uniyamai. Om aiwab orot aurin eidudur ato eibaisiu atonio fafatum goa emon on angat. ¹⁵Yau on Hebrew tafanam emon sibainuii mom siboeu anat nin, ato nin Egypt amonai on eb yau men bobo aifan tani aikomasai on fafatum goai siwaniu amama.”

¹⁶On an rai rafi teren an orot gagamin dura itatam on sareu wine kaifarotin an bomomout on obin bag on mes on ba Joseph iyawur iyau, “Yau mat abomomout, yau on rafi kaifet engon ton on uniwui amteren. ¹⁷Kaifet tefanai bag on rafi teteran ta ta; on min rafi banag, affair a sarar aiwab orot aurin, baise kiwiu on, on kaifet amonai rafi si yam.”

¹⁸Joseph iyafotai iyau, “On an yabin on atonio, kaifet ton on ra ton. ¹⁹Ra ton amonai aiwab orot arimon fafatum goa emon inboseirim ungat ato anjom inasutin weie wengarai insikonim ato kiwiu biom sinan.”

²⁰Ra baitoninai, on min aiwab orot an rat ra on forag gagamin an babadis engon auris ibotitiwag. On sareu wine kaifarotin a rafi teren an orot gagamin rus fafatum goa emon iboseiris sigat an babadis nasi sitawar. ²¹Aiwab orot on sareu wine kaifarotin an bobo ainau ibobo on itai men, ²²baise aiwab orot on an bobo orot iyawures rafi teren an orot gagamin on sibo wengarai sisikonai. Joseph dura aifan iyau on bobo nanaba imatar. ²³Baise sareu wine kaifarotin on men meyan Joseph inonotai, on asir inosfotai mom.

Joseph Aiwab Orot An Bomomout Yabin Iyaubunag

41 ¹Kwanda ruam inai isawar gibunai, Egypt an aiwab orot ibomomout on Nile sareu rewanai itatawar. ²Ato cow engon nimtereban ruam usis obis kadidis on sareu emon sigai sinai tefai ato sibosuruf wayo si yam. ³Namon cow engon nimtereban ruam ba sigai; osi on usis teinis rarikis. Osi sinat ato cow ato sareu rewanai wayo si yam on bisisi sitawar. ⁴Ato cow usis teinis rarikis on simisir cow usis obis kadidis on siyam isawar. Namon aiwab orot on bomomout i tai on iror imisir. ⁵On iyeinir men iyen bubur ato bomomout tani ba it. On ibomomout on sawareg ann kaitamomai yabis engon nimtereban ruam siya gagamis tutufis obis ato simari. ⁶Namon sawareg nimtereban ruam ba sisisisig

sigat. Osi sawareg on men obis a gagaf rabis yabin kwanda an yabat forabin irabis on mes. ⁷Namon sawareg gagaf rabis on simisir ato sawareg gagamis tutufis obis on sitonanis. Aiwab orot en bubur emon imisir weie, isagob on i bomomout. ⁸On mes aiwab orot fomenei imisir ato magin an itin on men yasisir. Ato on dura iyafar Eyypt amonai orot gigiboanotis, kwakwairotis a baromotis engon siruayo ato an bomomout ikasones, baise men iyafan tani iyou bunag aurin.

⁹Namon sareu wine kaifarotin on aiwab orot iyawur iyou, “Yau ari aurim anirufan, yau on bobo komasin aiyamai. ¹⁰Ra kaitamom om yau a rafi teren an orot gagamin rui auri uyatatab ufatumai ato fafatum goa an bainetewar orot an goai nan ureberuei. ¹¹Fom kaitamom rafi teren an orot gagamin rui wabomomout ato waibomomout asi yabis on ta ta. ¹²Hebrew jorei boboun on mat nan wamama, on min fafatum kaifarotis asi bainetewar orot an bobo orot. Wei wai bomomout wakasonai ato asi yabis on mabi mabi iyou bunagen weinei mamaba wabomomout on fofonisi. ¹³On dura aifan iyou bubunagei on bobo engon nanaba simatar. Yau au bobo an efanai uyeiniu men, baise om rafi teren an orot gagamin on wengarai usikon.”

¹⁴Namon aiwab orot on sasasan wat an bobo orot iyafares sinai Joseph aurin ato fafatum goa emon on sibo sigat. On sareu iyeib, iyaragai ato sawar obis iyoten weie inat aiwab orot nanai itawar. ¹⁵Aiwab orot on Joseph iyawur iyou, “Yau abomomout ato men iyafan tani arimon itau bunag on. Baise yau sikasoneu on om fofonin bomomout asi yabis unau bubunagen.”

¹⁶Joseph iyafotai iyou, “Aiwab gagamim, yau on men fofoniu, baise God on arimon inau bubunagim tiwag ato iniyasisirem.”

¹⁷Aiwab orot iyou, “Yau abomomout on yau Nile sareu rewanai atatawar. ¹⁸Ato cow engon nimtereban ruam usis obis kadidis on sareu emon sigai sinai tefai ato sibosuruf wayo si yam. ¹⁹Namon cow nimtereban ruam ba sigai. Osi on usis teinis a rarikis ato asi itis on komasis bag. Yau Eyypt amonai men meyan on nanaba aiten on. ²⁰Namon cow usis teinis rarikis on simisir cow obis kadidis on siyam isawar. ²¹Baise men iyafan tani it isagob osi on tuturas siyam isawar, yabin osi itis on nana komasis. Namon yau en bubur emon amisir. ²²A mat au bomomout tani ait on sawareg ann kaitamomai on yabis nimtereban ruam gagamis tutufis obis iya ato simari. ²³Namon sawareg nimtereban ruam ba sisisigis sigat, osi on men obis gagaf rabis, yabin kwanda an yabat forabin irabis on mes. ²⁴Ato sawareg gagaf rabis on simisir sawareg obis gagamis simari on sitonanis. Yau au bomomout on gigiboanotis, kwakwairotis a baromotis akasones, baise men iyafan tani arimon auriu itau bunag on.”

²⁵Namon Joseph on aiwab orot iyawur iyau, “Atonio bomomout ruam on asi yabis on kaitamom. God iyoboem nono bobo aifan arimon iniyamai. ²⁶Cow nintereban ruam usis obis kadidis min kwanda nintereban ruam, a sawareg nintereban ruam obis gagamis simari on eb kwanda nintereban ruam. Osi ruam asi yabis on kaitamom. ²⁷Cow nintereban ruam usis teinis rarikis gibui sigeg on a sawareg nintereban ruam gagaf rabis kwanda an yabat forabin irabis. On an yabin min kwanda nintereban ruam arimon gomar gagamin inmatar. ²⁸Dura ato mamaba awurem on nanaba God iyoboem nono bobo aifan arimon iniyamai. ²⁹Kwanda nintereban ruam amonai Egypt tafanam engon on arimon mour gagamin inmatar. ³⁰On gibunai kwanda nintereban ruam amonai on arimon gomar gagamin inmatar, mour an kwanda obis on taninosfoten yabin ato gomar innanat on tafanam engon inikomasai. ³¹Mour an wera tutufin on asir bainosfot inmatar yabin gomar kounai e nat on inkomas kwakwan bag. ³²God bomomout ruam ibiyoboem asi yabis on kaitamom wat. On iyau nono yen ra gibui arimon iniyamen sinmatar. Ato on min arimon sasasan wat inmatar.

³³On mes aiwab orot, om ari bag not sagob gigiboan an orot on unrubin ato Egypt tafanam inkaifarai. ³⁴Om am bainetewar orot fani unrubines Egypt tafanam sinkaifarai. Ato mour an kwanda nintereban amonai, osi orot jever sinawures asi bayu sinkukuwain on bayu matas engon nim sinyaya ato matan tani on sinboai mabinai sinyeyeinin. ³⁵Om unawures ato kwanda obis se nat nan on bayu engon tutufin sinboai sintubabarai. Mat om faiwar unites mafam gagamis amosi goa gagamis sinyonen ato sawareg engon tutufin nan siniwan ato an kaifar yangan nan sinkaifarai. ³⁶On bayu on sinigosusur i nen sabu auris ato kwanda nintereban ruam Egypt amonai gomar inmamatar aurin. On eta ai sabu Egypt amonai on men arimon sinibitanangi.”

Joseph On Egypt An Gawan imatar

³⁷Aiwab orot an babadis mat atonio bainonot eta on sibasitai. ³⁸Ato iyawures iyau, “Ot arimon men meyan orot tani Joseph ba tangaturai, on orot on God an ayu bisinai emama.” ³⁹Aiwab orot Joseph iyawur iyau, “God ato osi engon iyoboem, men iyafan tani ansagob a gigiboan gagamin om ba. ⁴⁰Yau arimon anyeinim unnat au tafanam engon tutufin unkaifarai ato om dura aifan unau on au sabu engon fonam sinboai. Om am baibad on yau ekesiu wat babawui. ⁴¹Yau ari arurubinem unnat unigawan Egypt tafanam engon tutufin unkaifarai.” ⁴²Aiwab orot imakokoanai urakof, aiwab asi baifafaro a kukufot er an fot auman on iboseir ato Joseph imakokoanai iwan. Usis baitakwakwaren obin fafa on iyotai a anyonai agim gold damud auman on igidomanai. ⁴³Ato an baigagam wa bairuin on itai nan inabib, ato an baigagam orot aunan

sitawar ato siyoku siyau, “Eta worereb! Eta worereb!” Ato Joseph on irubinau baibad itai Egypt tafanam engon an Gawan imatar. ⁴⁴Aiwab orot on Joseph iyawur iyau, “Yau on aiwab orot baise men iyafan tani Egypt tafanamai on an gogoi ai aifan iniyamai ab ainau om unibasit weie.” ⁴⁵⁻⁴⁶Aiwab orot Egypt yangan wabis Zephenath Paneah on Joseph itai, a Heliopolis mafam gagamin an tafaror bainetewar orot Potiphera natun jeverei, Asenath on Joseph itai iawan.

Joseph an kwanda on orot kaitamom, orot ta aurin auyotoat an werai on ibosuruf Egypt aiwab orot aurin ibobo. Aiwab orot an goa ikirir ato Egypt tafanam engon ibibib. ⁴⁷Kwanda nimateban ruam amonai bayu an mour on gagamin bag imatar. ⁴⁸Osi bayu engon Joseph an bobo yangan iyawures siboen mafam gagamisi nan goai situbabaren a mafam gugudis ta ta mat asi goa nan siyonen, ato bayu osi mafam masau emon i gat on asi goai bag situbabaren. ⁴⁹Sawareg on irat kwakwan bag Joseph men fofonin itifofon, anitin on tore an gasa ba.

⁵⁰Weie gomar an kwanda itinat itgat, Joseph nanatun fifirig orot ruam on awan Asenath itu. ⁵¹On iyau, “God iyameu au baikokosar engon ainosfoten a tamau an dam warar mat.” On mes natun ainau orot wabin iyor Manasseh. ⁵²On eb iyau, “God nanatu iteu au yababan emon nin tafanamai.” On mes natun gia orot wabin iyor Ephraim.”

⁵³Kwanda nimateban ruam mour an wera Egypt tafanam ibiyasisir on inat an kanfoun igat. ⁵⁴Ato gomar an kwanda nimateban ruam on ibosuruf, mamaba Joseph i yau on nanaba. Ato gomar min tafanam fani mat iboes, baise Egypt amonai on bayu i yen. ⁵⁵On an rai Egypt sabu sibosuruf sibibitanangi ato aiwab orot aurin bayu mes sibifefeyan. On mes on iyawures iyau, “Omi wonai Joseph woit, ato aifan inau on nanaba woniyamai.” ⁵⁶On gomar on irat kwakwan Egypt tafanam engon ibo, on mes Joseph bayu sawareg goa gagamis engon iruserenen ato Egypt sabu sawareg sitotobon. ⁵⁷Sabu tafanam ta ta emon engon sinat Joseph bisinai sawareg sitotobon. Yabin gomar irat kwakwan tafanam ta ta engon ibo.

Joseph Taitain Tutuan Sinai Au Egypt Sawareg Tobon Mes

42 ¹On an werai Jacob isagob Egypt nan on sawareg i yen, on mes on nanatun iyawures iyau, “Omi aibo mes womair toum wobiruruai bonen womama i? ²Yau dura atatam Egypt nan on sawareg sen, omi wosur wonai nan sawareg wontobon ato tanam yawasit tanama” ³On mes Joseph taitain tutuan auyotoat on sisur sinai Egypt nan sawareg sittobon mes. ⁴Baise Jacob on Joseph tain bag Benjamin on men iyafarai mat sinai on, yabin on iber fetag aifan tani aurin inatar.

⁵Sabu fani si nan on, Jacob nanatun min mat sinai sawareg sittobon mes, yabin Canaan tafanam mat gomar gagamin imatar. ⁶Joseph on gawan gagamin Egypt tafanamai imama ato sabu fafanam au engon

min sinat on aurin sawareg sitotobon. Ato Joseph taitain tutuan sinat on nanai sindas sirou sikwafir sisur magis motob iruyein. ⁷Joseph taitain tutuan ites on isagob nono baise on ibiyamai an itin on men isagobis ba. On dura wawaninai itetemis iyau, “Omi men emon wonat?”

Osi siyafotai siyau, “Wei Canaan emon wanat bayu wantobon mes.’

⁸Joseph taitain tutuan on ites isagob baise osi sit on men sisagob on. ⁹On an bomomout ainau i bomomout on inonoten ato iyau, “Omi on tafanam bainateteotim, omi wonat wai tafanam an samisamis fani on woneit mes.”

¹⁰Osi siyafotai siyau, “Ambin bag! wei ai bada. Wei wanat on om am agir ba, bayu wantobon mes. ¹¹Wei ai bada, wei on ainauan gigiawan wat, wei men tafanam bainateteoti on, wei on sabu obi wat.”

¹²Joseph iyawures iyau, “Ambin! Omi wonat wei ai tafanam an samisamin on wonitai mes.”

¹³Osi siyau, “Wei ai bada, wei on ainauan gigiawan wat auyotoat an yayatan ruam. Wei fifirig orot engon on tamai orot kaitamom nan Canaan tafanamai emama. Ato wei tai tani on irabob ato ai giya momos bag on nan taman rus semama.”

¹⁴Baise Joseph iyafotes iyau, “Yau au dura on au nono, omi on tafanam bainateteotim. ¹⁵Baise yau eta atonio aniyamai ansagob omi dura bag wat wobikakafun: Yau on Egypt aiwab orot an faiwar babanai abifaro, omi ainau on ami giya momos wonboai innat nin nawau intawar weie omi wonan au go. ¹⁶Omi orot tani on inan giya momos inboai innat ato omi fani on nin fafatum goai wonama. Onai tanitai omi on dura bag wobikakafun. Baise omi wonbisigo on, yau on aiwab orot an faiwar babanai abifaro, omi on tafanam bainateteotim.” ¹⁷Joseph dura ikakafun isawar ato osi engon fafatum goai iwanis nan ra ton sima.

¹⁸Ra baitoninai Joseph iyawures iyau, “Yau on God akakafai. On mes yau dura aifan au on nanaba wonbiyamai on arimon yawasim wonama. ¹⁹Ot tani dura bag omi sabu obim wat on, omi orot tani on nin nana fafatum goai inama, menan womama nan. Omi fani on wonan bayu ato wototobonen on wonboen wonan awawam nanatum sebibitanangi auris. ²⁰Namon omi taim giya momos on wonboai wonnat auriu. Onai ini dura bag omi on dura bag wat wobikakafun ato yau men anasubunuem on.”

Osi engon sibasitai. ²¹Namon osi tous wat siyau bonen, “Dura bag ot tait giya aurin bobo komasin tafour on an garamin baikokosar gagamin ato taboai; on yababan gagamin amonai irui ato baibais mes ibifefeyan on men fonan tatatam on. On fasinai ari ot ba atonio yababan amonai tarui.”

²²Reuben iyawures iyau, “Yau awurem fifi kafakakai men wotikomasai, baise omi yau au dura men wotatam. On mes on an garamin on an rabob an baiyan on ato ta boai.” ²³Joseph isagob osi dura

aifan sibikakafun, baise osi on men sisagob, yabin min basun an orot on dura ibikitabir weines on fasinai. ²⁴Joseph ikirires igat mabinai nan itou. On yan ikwat weie imatabir men auris irui ikakafun ato an orot iyawures Simeon sibo ato taitain tutuan matasi sifatumai.

Joseph Taitain Tutuan Simatabir Au Canaan

²⁵Joseph bobo orot iyawures taitain tutuan asi baik on sawareg siwanen awas sibonuen ato eta an bayu mat siwanen, a asi agim kukufet siboen asi bayu baik tefasi siwanen men. Ato agir orot min on bobo nanaba sifour. ²⁶On taitain tutuan asi sawareg sitotobon on donkey tefasi siyagagaien ato simisir sinai. ²⁷Osi efan menan fom kaita siten mes, ato orot tani an baik iruseren an donkey itibayuai mes. Baise on agim kukufet on an baik tefanai bag i yen igaturai. ²⁸On taitain tutuan auris iyor iyau, “Yau au agim siteu men! Atonio au baik amonai yen.” Osi nunuas engon sifeu, berai nan tuturas mat sitetemis bonen siyau, “God aifan ot aurit iyamai?”

²⁹On an rai osi sinat tamas Jacob aurin Canaan nan ato osi bobo aifan auris imamatar on engon aurin sidudur: ³⁰Osi siyau, “Egypt an gawan on dura wawaninai wei auri ikakafun a iubarei iyau on wei on an tafanam an bainateteoti ³¹Ato wei waiyafotai wau, ‘Wei men tafanam bainateteoti on, wei on sabu obi. ³²Wei ainauan gigiawan engon auyotoat an yayatan ruam. Ato wei on orot kaitamom nanatun wat. wei tai tuai tani on irabob ato giya momos on nan Canaan tamai rus semama.’ ³³Ato gawan orot iyafotei iyau, ‘Eta atonio nanaba an sagob omi on dura bag sabu obim. Omi sanamui orot tani on rui wanama ato omi fani on sawareg wonboen wonan awawam nanatum sebibitanangi auris. ³⁴Omi taim giya momos on auriu wonboai wonnat. Namon onai ansagob omi men tafanam bainateteotim on, omi on sabu obim ato arimon Simeon anitem men, ato nin wonama wonitotobon.’ ”

³⁵Namon osi ainauan gigiawan asi baik sidedeburen on, osi engon asi agim kukufet sigaturen. Ato on an rai agim siten on, osi tamas Jacob mat on men sunub siber. ³⁶Osi tamas Jacob on iyawures iyau, “Omi wogogoi on woniyameu nanatu engon anisiwanis i? Joseph inai, Simeon ba inai ato ari on wogogoi Benjamin ba wonboai wonan. Yau tamam on osi yawas engon auris abikokosariu.

³⁷Reuben on taman aurin iyau, “Yau Benjamin men anboai anmatabir annat aurim on; basit om nanatu orot ruam on unasubunues. Om yau auriu eikirir ankaifarai anan ato arimon anboai anmatabir men annat aurim.”

³⁸Baise Jacob iyau, “Yau natu Benjiman men anikirir wonboai mat wonan. On tuan on irabob ato on tain ekesin wat emama. Yau abeber ari

fetag etai nan sawar tani aurin inmatar. Yau aiorokwar isawar ato aifan yababan wonbibiteu on arimon inasubunueu.”

Joseph Taitain Tutuan Benjamin Mat Simatabir Men Au Egypt

43 ¹Gomar Canaan amonai on ikomas kwakwan bag. ²Jacob nanatun Egypt emon sawareg sitobon sibo sinat on engon siyam isawar. On mes on nanatun iyawures iyau, “Omi wonmatabir men wonan ati bayu kafakai ba wontobon men.”

³Judah on taman iyawur iyau, “Egypt an gawan on dura wawaninai iyawurei iyau, ‘Omi men taim giya momos mat wonnanat on, men auriu wonnat magim aniten mes.’ ⁴Om tai Benjamin mat uniyafarei wanan on, wei fofonin wanan am bayu wantobon. ⁵Baise om fifi men unbiyafarai on, wei mat arimon men fofonin wanan, yabin gawan iyau, ‘Omi men taim giya momos mat wonnanat on, men auriu wonnat magim aniten mes.’”

⁶Jacob iyau, “Omi aibo mes atonio orot wokasonai omi taim aurin ato yau on yababan gagamin tani ba woiteu.”

⁷Osi siyafotai siyau, “Gawan on nana ibitetemi ot ati dam warar aurin. Omi tamam min nana yawasin emama i? Omi min taim tani mat i? Wei on asir an baitetem on wabiyafotai mom. Mamaba watsagob on arimon inawurei tai wanboai mat wanan.”

⁸Namon Judah on taman iyawur iyau, “Om fifi mat eiyafarei ato wei ari wat wanmisir wanan. Onai ot arimon men tanibitanangi a tanarab on. ⁹Yau tou aumataniu fifi on yau babawui ankaifarai. Ato men anboai anmatabir men aurim on, on bit engon on yau anboai. ¹⁰Om men nanaba weromin utbotani on, wei on ra bairuin ba watan nono ato ari on watmatabir men watnat.”

¹¹Osi tamas iyawures iyau, “On nanaba wonnonosin mes on atonio tafanam an bayu obis on wonabo gawan aurin. Omi on bayu an fio yanden ninibin kafakakain, manigeu kerin kafakakain, bayu an fio forabis, wengar pistachio uwas a wengar almond uwas on wonabo ami baik ai woniwanen an siwar mes. ¹²Mat agim silver turin ba wonboai tefan wonrab, yabin agim silver ato ami baik tefasi sibiwanen on wonboai wonmatabir men. Ot men tasagob osi fetag siyamai bait. ¹³Basit omi taim Benjiman wobo mat gariwat wonai gawan aurin. ¹⁴Yau ababayoi God Faiwarin Bag an kabere emon iniyamai ato gawan moa obin inboai tuam a taim tuam Benjiman initem men, wonboes wonnat auriu. God ingogoi yau nanatu anbisibanis mes on, basit anisiwanis.”

¹⁵On mes osi siwar siboen a agim silver sibo ato turin ba sibo tefan sirab, weie Benjamin mat simisir au Egypt sinai Joseph aurin sigat. ¹⁶On an rai Joseph ites osi on Benjamin mat sinat, on an bobo orot an goa ekakaifarai on iyawur iyau, “Om atonio orot on eboes enai au goai.

Osi yau mat aiyet an bayu wanam. On mes om sheep tani yasubun ato ebotitiwig eitab.”¹⁷ Bobo orot mamaba Joseph iyawur on nanaba iyamai, ato taitain tutuan iboes sinai Joseph an goai.

¹⁸ On an werai iboes sinai goai ato osi siber sinonot ato siyau, “Ot nin siboet tanat, yabin min ati agim ainau ato bayu ta totoyon on siboen siwanen men. Osi arimon sinborarabit ato ati donkey sinabo ato ot min on taniagirai.”¹⁹ On mes osi sinat goa an metewanai ato Joseph an goa an bobo orot aurin sikakafun. ²⁰ Osi siyawur siyau, “Kavian, wei ai dura untatam, wei ainau wanat nin bayu watobon. ²¹ Wei wamatabir au go wanan ato etai fom kaitamom waen. Wei aibaik waruserenen ato aibaik engon tefasi on agim matafis wagaturen men, on mes agim waboen men wanat aurim. ²² Wei agim silver fani ba mat waboen wanat bayu turin ba wantobon. Wei men wasagob iyafan on ai agim ibo aibaik amonai iwanen men.”

²³ Namon bobo orot iyau, “Omi men woniyababan a men wonaber. Omi ami God a tamam an God on agim silver ibo baik amonai omi aurim iwanen men. Omi agim wobibaiyan on abo nono.” Namon on Simeon ibo igat auris.

²⁴ Bobo orot on ainauan gigiawan iboes sirui Joseph an goai. On sareu ites ass sisouen ato on asi donkey ibayues. ²⁵ Osi siwar siboseseren sibotitiwigen ato Joseph aiyet innanat on sinitai mes, yabin osi siyawures arimon on mat aiyet an bayu sinam. ²⁶ On an werai Joseph inat goai, osi siwar siboen aurin sirui goa amonai ato nanai sindas sirouen usos situr sisur magis motob iruyein. ²⁷ On asi yawas ma aurin on itetemis iyau, “Omi tamam orokwar aurin on wokasoneu, on mamaba, usin basit a nana yawasin obin emama i?”

²⁸ Osi siyafotai siyau, “Wei tamai, om am bobo orot kitumin, on men irabob, on yawasin emama.” Ato osi engon nanai sindas sirouen usos situr sisur.

²⁹ Namon Joseph tain Benjamin it ato iyau, “On mes atonio on ami giya momos bag, on aurin on wo kasoneu.” Ato on Benjamin aurin iyau, “Yau natu, God inimomoginem.” ³⁰ Namon Joseph on tain Benjamin it on kafakakai mom itatou, on mes on ra kaita iyayai irui an en bubur efanai nan itou. ³¹ On gibunai Joseph on magin isou isawar ato igat. On yan ikwat weie iyawures siu siteb. ³² Joseph an sen on mabinai siyein ato taitain tutuan asi sen on mabisi siyein. Egypt bobo orot iyabon ato Joseph mat sena kaitamom si yam on ari on mabisi sites siyam, yabin osi asi kakaf a asi kik iyau nanaba men fofonin Hebrew yangan mat kaitanei siu sinam. ³³ Ainauan gigiawan Joseph nanai asi kwanda ai nan simairis, ainau orot isur inai giya momos igat. Osi sit mamaba simairirin on tuturas mat sina bonen ato siduduran. ³⁴ Siu on Joseph an kema emon siboen siraramis, ato Benjamin an siu on sabu nim asi sen fofonis on

siyein, men taitain tutuan engon asi sen ba. Osi Joseph mat nana siyam sitotom mom asir sikokok.

Viga Isiwan

44 ¹Joseph an goa bobo orot iforai iyau, “Osi orot asi baik ai bayu aumiet wat eiwanen sinabo sinan, a orot kakaita kakaita asi agim silver on eb baik tefasi nan eiwanen. ²Namon yau au viga bonanamarin agim silver ai siyamai a agim silver sawareg aurin sibo sinat tobon mes on, on mat engon eikaita tais giya momos an baik tefanai eiwan.” Ato Joseph dura mamaba bobo orot i yawur on nanaba iyamen. ³Ra itom fomenei fomenei bobo orot on taitain tutuan iyafares asi donkey siboen ato sinai. ⁴On an rai osi mafam gagamin sikirir men weromin sinai mom, ato Joseph an goa bobo orot iyawur iyau, “Om on gagariwat osi orot gibusi enai ato unboboes on unawures unau, ‘Omi aibo mes bobo komasin auriu woiyamai? ⁵Omi aibo mes au bada an viga agim silver ai siyamai on wobainau?’ Omi viga ato woboai on, yau au bada min on nan wat etotoman a on viga emon ebiyoboai sawar buburis gibui sinmamatar auris on eiten. Omi on bobo komasin gagamin bag woiyamai!”

⁶On an rai bobo orot inai ibotanis ato Joseph dura mamaba i yawur on dura bainon nanaba iyawures. ⁷Osi siyafotai siyau, “Wai kavian, om abi dura ebikakafun, wei men wasagob on. Wei dura bag wawurem on men bobo abifan tani on nanaba waiyamai on. ⁸Om usagob wei tafanam Canaan nan agim silver aibaik tefasi si yen wagaturen on waboen wamatabir men aurim. Ato mamaba uyau on am bada an goai agim silver ai agim gold on watbainau. ⁹Wai Kavian, wei sanayi iyafan tani ungaturai inboboai mes on, on inarab, ato wei engon on om am bada an airoti wanmatar.”

¹⁰On iyawures iyau, “Yau abibasit, baise orot iyafan omi sanamui on viga i boai on ekesin wat on iniagirotin, ato omi fani on ubar emon on inrufanim wonan.” ¹¹Namon osi sasasan wat asi baik au gabur siyeiren ato osi kakaita kakaita asi baik siruserenen. ¹²Joseph an bobo orot matanubai asi baik engon irunanagen tiwag, ainau orot farat ibosuruf isur inai giya momos bag igat, ato viga on Benjamin an baik amonai igaturai. ¹³On tutuan on siyababan kwakwan ato asi baitakwakwaren on sisafefen. Namon osi engon asi donkey tefasi asi sawar siya gagaiyen men ato simatabir sinai mafam gagamin aurin.

¹⁴On an rai Judah taitain tutuan mat simatabir sinai Joseph an goai sigat on sit Joseph on nan nana imama. Osi engon nanai nan sindas sirouen usos situr. ¹⁵Joseph iyawures iyau, “Omi abifan woiyamai? Omi men wosagob orot yau nanaba on au faiwar yen fofonin bobo buburis semamatar on arimon ansagob.”

¹⁶Judah iyafotai iyau, “Wai kavian, abifan arimon aurim wanau? Mamaba wanau wanrubunagi. God on waikomasin iyamai irerebai. On mes wei engon on om am agiroti, men ato iyafan bisinai viga sigagaturai ekesin wat on.”

¹⁷Joseph iyafotai iyau, “O, ambin bag! Yau men arimon nanaba aniyamai! On iyafan viga i boai wat on arimon yau auriu iniagir. Omi fani on wonmatabir men obinai wat wonan tamam aurin.”

Judah Benjamin Aurin Ifefeyan

¹⁸Namon Judah on Joseph aurin igai ato iyawur iyau, “Au kavian, karun, abifefeyanim, eibasiteu obinai aurim anakakafun. Men auriu uniyatatab mes, yabin om on aiwab orot rum fofon. ¹⁹Au kavian, om wei uitetemi uyau, ‘Omi tamam mat a taim tani mat i?’ ²⁰Wei waiyafotem wau, ‘Eee, wei tamai on iorokwar, ato on iorokwar bag weie fifi giya momos irat. On fifi tuan orot on min irabob ato fifi ekesin mom ayon ibituai on yawasin emama. Ato tamai min on fifi inuaboai kwakwan bag.’ ²¹Namon om uyawurei uyau, ‘omi wonboai wonnat nin ato tou mataui anitai, ²²ato wei waiyafotem wau on, fifi on arimon taman men inikirir, on taman inbikirir on arimon taman inarab.’ ²³Baise om uyawurei uyau, ‘Om taim giya momos men mat wonnanat on, omi men wonnat auriu.’

²⁴On an rai wamatabir men wanai tamai aurin, aifan uyawurei on wakasonai. ²⁵Namon on iyawurei watmatabir men bayu kafakakai ba wattobon mes. ²⁶Wei waiyafotai wau, ‘Wei men wanan on. Wei tai giya momos mat on wanan, ato ambin mes on, men wanan aurin. ²⁷Wei tamai ato nanaba iyawurei, ‘Omi wosagob yau awau Rachel on nanatu orot ruam mom itu. ²⁸Tani on ikireu nono. On rega an bobaitu tutuenis sisafefai, yabin on i nan nenei on men ait men. ²⁹Omi ari atonio ba yau emon wonboseir ato aifan komasin aurin inmamatar on, omi yau yababan wobiteu ato on yababan emon inasbuniu, yabin yau on aiorokwar bag.’ ”

³⁰⁻³¹Judah an dura ibotein iyau, “Au kavian, ato ari yau men fifi mat anmatabir men anan tamau aurin ato on an rai yau magiu initai ato fifi magin ininayou on arimon inarab. On taman on fifi inuaboai kwakwan bag a on iorokwar bag on mes wei atonio yababan wanbibitai on arimon inrabob. ³²Men on wat, yau fifi an yawas aurin on tamau aurin aumatan. Yau awur au, “Yau fifi men anboai anmatabir aurim, yau arimon au yawas tutufinai ubar anboai.” ³³Au kavian, on mes karun abifefeyanim, yau on ari nin anama on fifi an efan anboai ani agirotiu, ato on eikirir tutuan mat sinmatabir sinan. ³⁴Yau on fifi men bisiwui on anmatabir anan tamau aurin? Ambin bag! Yau men agogoi atonio komasin anitai innat tamau au tefan inag.”

Joseph Taitain Tutuan Ikasones On Iyafan

45 ¹Joseph on men fofonin an bobo orot matasi toun ititotorai itiwaniai on, on mes Egypt yangan engon tutufin iyawures goa emon sigat, weie Joseph taitain tutuan ikasones on iyafan. ²Joseph fonan gagaminai bag itou ato Egypt yangan fonan sitatam. Ato duran sibotein inai aiwab orot an goa amonai sabu engon sitatam. ³Namon Joseph on taitain tutuan iyawures iyau, “Yau on Joseph. Yau tamau nana yawasin emama?” Baise taitain tutuan on men fofonin sitiyafofai, yabin osi engon on siber kwakwan. ⁴On mes Joseph iyawures iyau, “Karun, abifefeyanim, omi ne ne auriu wonat.” Namon taitain tutuan aurin bag sinat. Ato on iyawures iyau, “Yau on taim tuam Joseph. Omi ato wotoboni u atan Egypt nan ati agir mes. ⁵Ato ari on men woniyakomas a men toum woniubar bobonen yabin yau wotoboni u on mes. God Toun bag on iyafareu ainau anat nin sabu aniyawasis mes. ⁶Ari on gomar an kwanda bairuin wat atonio tafanamai. Ato arimon kwanda nim ba amonai nan on bofefes a kuwain ambin. ⁷On mes God ainau iyafareu anat atonio nin on omi ati baisim men wotarab mes. Yabin atonio yawas baiduduranin imamatar nan on nanatum wawam agirim fani min arimon inbotanis yawasis nin tafanamai sinama. ⁸On mes men dura bag omi yau woiyafareu anat nin on, baise God. Yau on God iyameu anat aiwab orot, on an bainetewar orot gagamin amatar. Yau on baibad abo aiwab orot an aiwab goa amonai an sabu engon akakaifares. Yau on Egypt tafanam engon tutufin akakaifarai.

⁹Omi ari gariwat wonan tamau aurin ato wonawur wonau, “Om natum Joseph on ato nanaba iyau, ‘God iyameu anat Egypt tafanam engon tutufin akakaifarai. Yau auriu sasasan wat unnat.’ ¹⁰Om arimon tafanam Goshen Egypt amonai nan unama, on min yau bisiui. Om, nanatum, awawam, am bobaitu a abi abi om ebinoanim engon mat. ¹¹Om Goshen amonai nan unama on, yau arimon ankaifarem. Gomar on arimon nana inan kwanda nim ba ato yau men agogoi om am dam warar a am bobaitu mat wonibitanangi.”

¹²Joseph an dura ibotein iyau, “Omi engon a om Benjamin mat on ari weie woiteu wosagob yau on dura bag Joseph. ¹³Omi tamau wonkasonai mamaba nin Egypt amonai faiwar gagamin abo abotan a abi abi matamui woiten on mat engon wonkasonai ato gariwat wonboai wonmatabir wonnat auriu.”

¹⁴On tain Benjamin irous a Benjamin on eb tuan irous ato rus sitou. ¹⁵Namon Joseph on nana itotou auman taitain tutuan kakaita kakaita irorousis iboyayanis. On gibunai weie taitain tutuan usis siforab ato sibosuruf Joseph mat sikakafun.

¹⁶On an rai Egypt aiwab orot an bobo netewarotis mat dura sitatam Joseph taitain tutuan sinat on, osi men sunub siyasisir. ¹⁷On mes aiwab

orot on Joseph iyawur iyau, “Om taitaim tutuam yawures asi bobaitu sinabo ato sinmatabir men sinan au Canaan tafanam. ¹⁸Om unawures tamam a ami dam warar mat engon sinboes sinmatabir men sinat au Egypt. Yau arimon efan obin bag Egypt amonai anites. Ato osi auris on arimon bayu fofonin wat sinam sinama. ¹⁹Osi yawures motob an wa gugudis Egypt emon sinabo awawas nanatu auris a tamas mat sinboai sinmatabir sinned. ²⁰Osi asi sawar fani sinbikiriren auris on men siniyababan mes. Sawar obis obis engon tutufin Egypt tafanam amonai sen on engon osi asi sawar.”

²¹On mes Jacob nanatun aifan si yawures on nanaba sifour. Joseph motob an wa gugudis ites mamaba aiwab orot i yau ba a eta an bayu mat ites. ²²On taitain tutuan usis asi sawar on eb kakaita iraramis. Baise Benjamin on usin an sawar on nim a agim silver 300 on mat itai. ²³Joseph on Egypt sawar obis obis bag on iboen donkey auyotoat tefasis iyagagaien ato taman aurin iyafaren. Mat on donkey toub auyotoat tefasi on sawareg, rafi a bayu fani mat iyagagaien eta an bayu aurin. ²⁴Namon Joseph taitain tutuan iyawures sinan mes. On an ra osi sibosuruf sitan mes ato on iyawures iyau, “Omi wonnanan etai on men wonagam bonen mes.”

²⁵Osi Egypt sikirir ato simatabir men sinai au Canaan tamas Jacob aurin. ²⁶Osi tamas sikasonai siyau, “Joseph on nana yawasin emama. On Egypt tafanam engon ebinetewar.” Osi tamas on dura itatam on iror ato men itutumes on.

²⁷On an werai osi aifan Joseph i yau on engon tamas sikasonai a motob an wa gugudis ato Joseph iyafaren sinat on sinboai sinmatabir men au Egypt on iten weie, Jacob an not itotorai. ²⁸Namon Jacob iyau, “Ari weie abitutum! Yau natu Joseph on nana yawasin emama. Yau anan anitai weie anarab.”

Jacob An Dam Warar Mat Sinai Au Egypt

46 ¹On mes Jacob an sawar engon iwabunagen isawar ato on an dam warar mat sibosuruf sibib sinned au Egypt. On an rai osi sinat efan Beersheba nan sigat, Jacob on nan sirifu ikutetai taman Isaac an God aurin. ²On fom, God on bomomoutai Jacob aurin iyor iyau, “Jacob! Jacob!”

On iyafotai iyau, “Men, Yau nio.”

³Namon On iyau, “Yau on God, om tamam Isaac an God, au Egypt nai aurin on men unaber mes; Yau arimon on tafanamai nan aniyamem nanatum wawam agirim on sinarat gagamin bag sinmatar. ⁴Yau arimon rut tanan au Egypt, ato Yau arimon nanatum wawam agirim on anboes men sinmatabir atonio tafanamai. Ato om unarab weie Joseph toun imanai ingarobim.

⁵Jacob Beersheba emon igat inai. On nanatun on tamas sibo, nanatus gugudis a awawas siboes motob an wa gugudis ato Egypt an aiwab orot ibiyafaren on tefasi siyagagaiis. ⁶Osi asi bobaitu a sawar gugu ato Canaan nan simama sibobo on siboen ato sinai au Egypt. Jacob nanatun wawan agirin engon iboes mat sinai: ⁷on nanatun orot awawas mat a wawan orot jever engon iboes mat sinai au Egypt.

⁸Atonio on Jacob an dam warar on iboes inai au Egypt on wabis: Jacob natun ainau orot wabin on Reuben, ⁹ato Reuben nanatun orot wabis min: Hanoch, Pallu, Hezron a Carmi. ¹⁰Simeon a on nanatun orot wabis min: Jamuel, Jamin, Ohad, Jachin, Zohar a Canaan jever natun Shaul. ¹¹Levi a on nanatun orot wabis min: Gershon, Kohath a Merrari. ¹²Judah a on nanatun orot wabis min: Shelah, Perez a Zerah (Judah nanatun fani, Er a Onan on Canaan nan sirabob.) Perez nanatun orot on Hezron a Hamul. ¹³Issachar a on nanatun orot wabis min: Tola, Puah, Jashub a Shimron. ¹⁴Zebulun a on nanatun orot wabis min: Sered, Elon a Jahleel. ¹⁵Atonio fifirig orot on Leah awan Jacob rus nanatus, Leah Mesopotamia tafanamai itu a natun jeverei Dinah mat. Atonio osi engon on Leah nanatun wawan agirin orot kaitamom, orot ta aurin auyotoat an yayatan ton. ¹⁶Gad a on nanatun orot wabis min: Zephon, Haggi, Shuni, Ezbon, Eri, Arod a Areli. ¹⁷Asher a on nanatun orot wabis min: Imnah, Ishvah, Ishvi, Beriah a osi robus Serah. Beriah nanatun on Heber a Malchiel. ¹⁸Atonio osi on Jacob nanatun wawan agirin Zilpah itu, engon auyotoat an yayatan nimtereban kaitamom. Zilpah on Laban ibo natun Leah itai an bobo jever mes.

¹⁹Jacob awan Rachel on fifirig ruam itues: Joseph a Benjamin. ²⁰Egypt nan on Joseph nanatun orot ruam sirat: Manasseh a Ephraim, awan Asenath itu, on min tafaror bainetewar orot wabin Potiphera natun jeverei, Heliopolis mafam emon. ²¹Benjamin nanatun on: Bela, Becher, Ashbel, Gera, Naaman, Ehi, Rosh, Muppim, Huppim a Ard. ²²Atonio osi on Jacob nanatun wawan agirin auyotoat an yayatan bat awan Rachel itu.

²³Dan a natun orot Hushim. ²⁴Naphtali a on nanatun orot wabis min: Jahzeel, Guni, Jezer a Shillem. ²⁵Atonio osi on Jacob nanatun wawan agirin nimtereban ruam Bilhah itu. Bilhah min Rachel an bobo jeverei taman Laban itai.

²⁶Jacob nanatun wawan agirin on an tara emon iyabon mat sinai au Egypt on orot wat ton an yayatan nimtereban kaitamom, men nanatun orot awawas mat siyabarai on. ²⁷Joseph nanatun orot ruam on Egypt nan sirat, ato osi mat sibikaita on Jacob an dam warar on orot wat ton orot ta aurin auyotoat.

Jacob An Dam Warar Mat Egypt Nan

²⁸Jacob on Judah iyafarai ainau inai Joseph inawur innat Goshen tafanam ai nan innefotes. Osi sinat sigat mom, ²⁹Joseph on motob an wa

ibo ato inai Goshen nan taman inefotai. On an werai sinofoten, Joseph on taman anjonai iman ireben bonai irous ato weromin bag itou. ³⁰Jacob on Joseph aurin iyau, “Yau ari weie yasisirai anarab, yau aitem asagob nono om on nana yawasim emama.”

³¹Namon Joseph on taitain tutuan a taman an sabu mat auris ikakafun iyau, “Yau on anan aiwab orot ankasonai insagob on yau taitaiu tutuau a tamau an sabu mat Canaan simama on sinat auriu sigat. ³²Yau ankasonai insagob omi on sheep asi kaifarotim on mes sheep sigaraba woboen wonat a ami sawar engon mat sigaraba woboen mat wonat. ³³On an werai aiwab orot inyorem wonan ato on arimon initetemim inau, omi ami bobo on abifan, ³⁴omi dura bag wonkasonai insagob on omi on bobaitu kaifarotim ato nanatum wawam agirim sifofour ba. A mat wonawur omi ami sawar engon woboen wonat ainau nanatum wawam agirim sifofour ba. On etaai on arimon inboem tafanam Goshen nan inyeinim wonama.” Joseph dura atonio iyau yabin Egypt yangan on men asi gogoi on sinned sheep kaifarotis auris siniufin.

47 ¹Joseph inai aiwaib orot aurin ato iyawur iyau, “Yau tamau a taitaiu tutuau on engon Canaan emon asi sheep, goat, cow a asi sawar engon mat siboen sinat. Osi on ari Goshen tafanamai nan semama.” ²Joseph on taitain tutuan engon nim irubines ato sinat aiwab orot nanai sitawar. ³Aiwab orot on itetemis iyau, “Omi ami bobo on abifan?”

Osi siyafotai siyau, “Kavian, wei ai bobo on sheep kaifaroti, ainau tatamai a wawai agiri sifofour ba. ⁴Wei wanat atonio tafanamai wera dibon wanama mes, yabin tafanam Canaan amonai on gomar gagamin imatar, motob iraran iwani, wayo sirabob ato wai bobaitu auris on bayu ambin. Karun, wabifefeyanim fofonin utibasitei ato wei tafanam Goshen nan watama.” ⁵Aiwab orot on Joseph aurin iyau, “Ari on tamam a taitaim tutuam sinat mat wonama. ⁶Atonio tafanam Egypt on osi noas. Om eikirires tafanam Goshen nan sinama, on tafanam on obin bag. Ato osi sanasi orot iyabon fofonis on baibad unites yau au bobaitu sinkaifares.”

⁷Namon Joseph on taman Jacob ibo inat aiwab orot aurin. Jacob aiwab orot imomoginai, ⁸ato aiwab orot on itetemi iyau, “Om am kwanda on biyam?”

⁹Jacob iyafotai iyau, “Yau atonio tafanamai ai dadadanam abib on au kwanda 130 mom. Osi kwanda on men weromin bag ato yababan sigaraba maiu agaturen. Ato baise yau tatamau wawau agiriu asi kwanda on weromin bag sima men yau au kwanda ba.” ¹⁰Jacob on aiwab orot iyau baitotorai ato ikirir inai. ¹¹Namon Joseph on aiwab orot ifonaboai ato taman a taitin tutuan asi mair ma iyabunagai efan obin bag Egypt amonai ites, Rameses mafam gagamin bisinai. ¹²Joseph on bayu

ibononoat taman aurin, taitain tutuan, taman an dam warar a gugudis bag mat engon auris.

Gomar

¹³Gomar gagamin bag imatar ato tafanam au engon on bayu ambin. On an werai Egypt a Canaan sabu engon on bayu mes sirarabob ato usis engon sisam. ¹⁴Joseph on Egypt a Canaan sabu sawareg sitotobon an agim on engon iboai i nan aiwab orot an goai. ¹⁵On an rai Egypt a Canaan yangan asi agim engon bayu aurin sireben isawar, Egypt sabu on sinat Joseph aurin ato siyawur siyau, “Karun, wabifefeyanim fofonin bayu utitei! Wei ai agim engon wareben isawar, ato wei bayu men wanam on ari atonio namui wanafeu wanarab.”

¹⁶Joseph iyafotes iyau, “Omi ami agim wonreben insasawar mes on, basit, omi ami bobaitu on wonboes wonnat ato angaramin on arimon bayu anitem.” ¹⁷On mes osi asi bobaitu horse, sheep, goat, cow a donkey on Joseph sitai ato angaramin on bayu ites. On kwanda amonai on osi bobaitu engon on sitai ato angaramin on bayu ites.

¹⁸On kwanda inai isawar ato kwanda tani ba osi sinat Joseph aurin ato siyawur siyau, “Wai kavian, wei arimon men aifan tani om matamu wanibuni on. Wei ai agim engon wareben isawar a wai bobaitu mat engon on om inoanim. Wei men aifan tani auri yen arimon wanitem on. Ab wei toui usi a ai motob on wat on yen. ¹⁹Om men unikirirei wanarab mes mat ai motob on engon iraran fofou imatar. Om wei a ai motob mat on bayu ai etoboni mom. Wei on aiwab orot an agiroti wanmatar ato ai motob on innat on ininoanai. Sawareg eitei on inibaisi wanama a fesi eitei ai masauai wantanumen.”

²⁰Joseph Egypt tafanam amonai motob engon itobon aiwab orot aurin. Egypt sabu engon tutufin asi motob sikuteten Joseph itobonen, yabin gomar on irat bag, on etaiai motob engon on aiwab orot inoanai. ²¹Joseph on Egypt sabu iyames sinat agirotis simatar aiwab orot si agirai. ²²Baise motob kaitamom wat Joseph men itotobon on, tafaror asi bainetewarotis asi motob. Osi men fofonin on motob sitobon yabin aiwab orot on osi asi bobo aurin on ibibaiyanis. On mes osi auris agim fofonin asi bayu sitotobon. ²³Joseph sabu iyawures iyau, “Omi woit, yau omi atobonim a ami motob mat engon atobonen aiwab orot aurin. On mes fesi anitem ato ami masauai wontanumen. ²⁴On an rai omi ami masauai bayu wonkukuwain on, ami bayu matas engon nim wonaya. Omi matan kaitamom on wonboai aiwab orot wonitai ato matas bat on wonbotan omi ami fesi mes a awawam nanatum mat ami bayu aurin.”

²⁵Osi siyafotai siyau, “Wei ai kavian, om on wei uiyawasi. Om am obin on irat kwakwan wei auri ato wei wabiyasisir on wei wanat aiwab orot an agiroti mes wamatar.” ²⁶On mes Joseph on baifafaro tani iyamai Egypt

tafanam aurin. On an ra sabu asi masauai bayu sinkukuwain on, asi bayu matas nim sinaya ato matan kaitamom wat on sinboai aiwab orot sinitai ato matas bat on sinbotan osi auris. Atonio baifafaro on ari nana yen. Tafaror an bainetewarotis ekesis wat asi motob on men aiwab orot inoanai on.

Jacob On Joseph Ifefeyanai Men Egypt Nan Ingarobai Mes

²⁷Israel sabu on nana Goshen nan sima Egypt tafanam amonai. Osi on sinat sawarotis simatar a mat nanatus mat on sison kwakwan. ²⁸Jacob on Egypt nan kwanda ayotoat an nimtereban ruam ima. On iyabarai on an kwanda on 147. ²⁹On an Jacob an wera inat iufin itarab mes, ato on natun Joseph iyor inat ato iyawur iyau, “Om imam sasanawui eiwan ato unifaro on men arimon Egypt nan ungarobiu mes. ³⁰Yau anrarabob an ra on agogoi tatamau sigagarobis on nan wongarobiu. Omi Egypt emon wonboeu angkat menan tatamau sigagarobis on nan wongarobiu.”

Joseph iyafotai iyau, “Om dura aifan u yau on yau arimon on nanaba aniyamai.”

³¹Jacob ikakafun iyau, “Om auriu eifaro.” Ato Jacob ifaro iyau on arimon nanaba iniyamai. Namon Jacob on an tutukai iyen bar ato natun Joseph ikakawai.

Jacob Ephraim A Manasseh Rus Imomogines

48 ¹Wera fani isawar gibunai, Joseph sikasonai on taman on isawau. On mes on nanatun ruam, Manasseh a Ephraim rus iboes ato sinai taman Jacob sitfasiuai mes. ²On an werai Jacob sikasonai on natun Joseph inat infasiuai mes, Jacob an faiwar engon ibo ato an en bubur efanai imisir imair. ³Jacob on Joseph aurin iyau, “God Faiwarin Bag, on Lus nan auriu irobotet Canaan tafanamai ato imomogineu. ⁴On iyawureu iyau, ‘Yau arimon fifirig sigaraba anitem, on emon arimon om nanatum wawam agirim inarat bag; yau arimon atonio tafanam on om nanatum wawam agirim anites osi ininoanis au wantoan.’ ”

⁵Jacob an dura ibotein iyau, “Joseph, om nanatum ruam on nin Egypt sirat weie yau anat nin bisimui, osi on yau anboes nanatu mes, Ephraim a Manasseh on yau nanatu bag Reuben a Simeon ba. ⁶Om nanatum fani gibui sinrarat on om noam, tafanam ato osi inbinoanis on arimon Ephraim a Manasseh rus emon innat. ⁷Yau atonio bobo abiyamai yabin ayom Rachel on yababan gagamin iteu. Yau Mesopotamia emon amatabir anat Ephrath aurin abiufin on nan irabob. Yau Ephrath eta rewanai nan agarobai.” (Ephrath min ari seyoyorai Bethlehem)

⁸On an rai Jacob on Joseph nanatun ites, on itetamai iyau, “Osi fifirig on iyabon?”

⁹Joseph iyafotai iyau, “Osi on yau nanatu, yau nin Egypt amama on God iteu.”

Jacob iyawur iyau, “Om fifirig eboes enat auriu ato animomogines.”
¹⁰Jacob on matan idib yabin on iorokwar bag on mes on men fofonin itites tiwag on. Joseph fifirig iboes sinat aurin ato irosis iboyayanis.
¹¹Jacob on Joseph aurin iyau, “Yau men anonosin om magim atitai men on, ato ari God iyamai on om a nanatum mat magim aiten.”
¹²Namon Joseph on Jacob atefan emon fifirig ruam ibogais ato nanai sindan irouson itur isur magin motob iruyein.

¹³Joseph on Ephraim ibo Jacob asun asugagaf ai imairai a Manasseh ibo asun asumaiau ai imairai. ¹⁴Baise Jacob on iman iyasbonai asumai au on Ephraim tefanai iyagai, on min giya orot ato iman asugagaf on Manasseh tefanai iyagai, on min ainau orot.

¹⁵Namon on Joseph imomoginai iyau; “God ato yau tatamau Abraham a Isaac rus aurin sibobo on atonio fifirig eimomogines! God ato yau ibinetewariu mom inat ari on, atonio osi eimomogines!”

¹⁶Anea ato komasis engon emon irufafareu on, osi eimomogines! Yau wabiui, tatamau Abraham a Isaac wabis on atonio fifirig asi yawasai inen, ato nanatus wawas agiris on inison nin tafanamai.”

¹⁷Joseph it on taman iman asumaiau on Ephraim tefanai iyagai on men ibasitai, on mes on Ephraim uninai taman iman ibo ityabonai Manasseh uninai ityagai mes. ¹⁸Joseph on taman iyawur iyau, “Bada, men on nanaba on. Atonio fifi on ainau orot, imam asumaiau on tefanai iyagai.”

¹⁹Baise taman iman men iboseir ato iyau, “Yau natu, yau asagob aifan abiyamai. Manasseh nanatun wawan agirin an sabu mat on arimon inarat bag, Baise on tain giya orot on arimon inarat gagamin bag men tuan ba, ato on nanatun wawan agirin on an sabu mat on arimon inison bag.”

²⁰On mes on imomogines ato ibikakafun iyau “Israel yangan on baimomogin an rai omi wabim on sinkurereb. Osi arimon sinau, ‘God itfourim Ephraim a Manasseh rus ba wotmatar.’ ” On an etai on Jacob Ephraim ainau iyein weie Manasseh.

²¹Namon Jacob on Joseph iyawur iyau, “Om ato uit, yau kafakai mom anarab, baise God on arimon omi mat ato arimon inboem wonmatabir men wonan wawam agirim asi tafanamai. ²²Yau Shechem tafanam an motob bubusar abitem on om aurim men taitaim tutuam mat auris on. On tafanam min Amor yangan mat au seri a au fidu ai agagam asowar aboai on.”

Jacob An Dura Kanfoun Nanatun Auris Ikakafun

49 ¹Namon Jacob nanatun engon iyores ato iyawures iyau, “Omi engon newat wonat wo kufifineu ato ra arimon gibui e nat omi aurim aifan inmamatar on ankasonem:

²“Omi Jacob nanatun, wonat bisiwui womair ato tamam Israel inbikakafun on wontatam:

- 3 “Reuben, yau natu ainau orot, om on yau au faiwar, om am rat emon on yau anat tamam amatar. Om on taseseirim a wafatatim nanatu engon tefasi.
- 4 Om on sareu egat yan egagamatabir ba, baise om men arimon taitaim tutuam uninetewaris on, yabin om yau au goa an bobo jever rum woen. Ato tamam an en bubur efan on men ukakafai.
- 5 “Simeon a Levi rus on ainau giya. Osi rus sebibasit bonen ato baigagam sawar sebobo sabu sebikomasis.
- 6 Osi rus dura bubunia nan sebikakafun onai on men amosi anar mes a asi baidudur amosi men anikakafun on, yabin osi yatatabai on sabu sasububunues a bull seboes sas fininimes asir yasisir kwarer ba sebiyamen.
- 7 Yau on asi yatatab on audabai, yabin osi on yas sowaris a yau on asi faiwar audabai, yabin osi on tous goyis. Yau on arimon ankugeyis sintagege sinan mabis mabis Israel tafanam engon inboai ato sinan dam ta ta mat nan sinama.
- 8 “Judah om taitaim tutuam arimon om sinifaim, om ragit arimon anyosi nan unabo unarou. Taitaim tutuam arimon namui sindas sinrouen usos sintur.
- 9 Judah on kuke lion boboun ba, on sabu yasububunues ato emamatabir e nan an ob efanai nan yeinir yen usin ebiyarirai. Men iyafan tani aurin inan inkuneneai on.
- 10 Judah on arimon aiwab an kututu inboai. Ato nanatun wawan agirin arimon ra fufur sininetewar. Judah on nana inbinetewar weie Shiloh innat ato sabu engon tutufin sinifonabo a nanai sindas sinrouen usos sin tur.
- 11 On an donkey kafakai on wengar wine ai iyous etatawar, on wengar wine on obin anbabaton. On an sawar on wengar uwan wine mururin kerin tara ba onai esosouen.
- 12 On sareu wine etotoman on mes matan fofous mururis, on yaya kakakaiin etotoman on mes wan kakakaiis.
- 13 “Zebulun on kamit bisinai inama. On an tore on wa asi awaru obin. On an tafanam arimon inan Sidon mafamai ingat.
- 14 “Issachar on wawanin donkey ba an sifumama sanasi yeinir yen.
- 15 Baise on it on baiyarir efan on iyobin anbabaton. Ato on tafanam on yasisir nuabo efan. On mes on ekwakwafir an bit ekikin ato serukokou ai inabo agirotin ba.
- 16 “Dan on arimon ininetewar an sabu auris. Osi on arimon Israel amonai dam fani ba.
- 17 Dan on arimon mota ba eta rewanai yen a mota wan rarabob ba on eta sesebinai yen, on horse yai an werai on ann etun egigiai ato orot horse bo ayaiotin on aufut aufut eribirirai esusur.

18 “BADA, yau amomousin Om uniyawasiu mes.

19 “Gad on arimon sabu bainauotis siniragital, baise on arimon inrutabir gibusi infaitanis inan.

20 “Asher an tafanamai on arimon bayu obis intanum inkuwain. On arimon bayu obis inbononoat aiwab orot aurin.

21 “Naphtali on rega an goat jever ba fetag fetag baiyaiotin. On wengar ba fafamen obis eyaya.

22 “Joseph on wengar wine ou bibirootin ba kibubur sareu bisinai ato fafamen on fafa tefanai sirabon.

23 On an ragit wawaninai si ragital ato si faitan sinai fiduai siyo.

24 Baise on an fidu on asir ibotan mom, ato iman iyamen siwani. Jacob an God Faiwarin Bag an faiwarai, Rufafarotin Kaifarotin Wabinai Israel an Tutut Agim.

25 On on om tamam an God on ibaisim, God Faiwarin Bag on imomoginem, an baimomogis usan aiyetun emon esusur a kibubur sareu motob emon segeg, a baimomogin ato jever fifirig sigaraba sinitu a bobaitu mat nanatus bobous sinitu.

26 Baimomogis om tamam aurin on gagamin bag men ato sawar obis oyau wantoanin an baimomogin ba, baimomogin om tamam aurin on gagamin bag men ato sawar obis oyau atamanis tefasi ba. Yau ababayoi atonio baimomogin on Joseph uninai inan, yabin on arimon innat taitain tutuan nasi intawar ininetewar.

27 “Benjamin on rega an kuke gagamin tutuenin ba. Fomenei on masono yasubunuen yam ato rabirabi on sawar aifan ibobo on eraram.”

28 Atonio on Israel an dam auyotoat an yayatan ruam. Atonio on tamas an baikakaiu dura osi kakaita kakaita asi yawas mamaba on nanaba auris ikakafun ato imomogines.

Jacob Irabob Ato Sigarobai

29 Namon Jacob nanatun ifores iyau, “Yau on kafakai mom anarab, usiu on tatamau mat agim dogu ato Hitt orot Ephron an motobai wongarobiu, 30 agim dogu ato Machpelah motobai Mamre au wera matan na Canaan tafanamai, ato Abraham Hitt orot Ephron emon motob mat itobon gagarob efan mes. 31 On nan on Abraham awan Sarah rus a Isaac awan Rebecca rus sigarobis ato Leah min on nan agarob, 32 motob a dogu on Abraham nan Hitt yangan bisisi emon itobon. Omi on nan wongarobiu.” 33 On an werai Jacob nanatun dura iyaubaiyates isawar, on ann ibo an enbubur efanai iya ato an kanfoun iyaratein ato irabob.

50 ¹On an werai Joseph it on taman irabob, on mes on taman irous ibotouousai a magin iboyayanin. ²Namon Joseph an fio orot iyores taman usin sibotitiwagai a fio simutai. ³Fio orot Jacob usin

siyabunagai a fio sibimutai on ra orot ruam isawar ato Egypt yangan on ra orot ton, orot ta aurin auyotoat on Jacob aurin sitou siyababan.

⁴On an werai tou yababan isawar gibunai, Joseph on aiwab orot an bainetewarotis iyawures iyau, “Karun, abifefeyanim atonio dura wobo wonai aiwab orot aurin: ⁵‘On an werai tamau itrabob mes on, on iyawureu aumatana on Canaan tafanamai toun budi ibotitiwig yen on nan angarobai. On mes karun abifefeyanim, eikirireu anan tamau angarobai weie anmatabir.’ ”

⁶Aiwab orot iyafotai iyau, “Om unan tamam ungarobai, mamaba uyaumatan on nanaba.”

⁷On mes Joseph inai taman itgarob mes. Egypt aiwab orot an bainetewarotis, kuayo ta ta an bainetewarotis a orot toufumis engon Joseph mat sinai. ⁸On awan nanatun, taitain tutuan a taman an dam warar engon mat sinai. Osi nanatus gugudis a iyabon men fofonin sitan on sheep, goat a cow mat Goshen tafanamai nan sima. ⁹Orot on baigagam wa ato horse seteteinen sai on tafasi sigai simairirin a orot horse tefasi sigai simmair engon mat sinai, kuayo on gagamin bag.

¹⁰Osi sinat mafam wabin Atad, Jordan Sareu au wera matan emon on nan sigat. On efanai on sabu sawareg sebobo fefemis seboseirenen ato yabis on mabisi seyaya. Osi nan ra weromin maiiau usin sibotan fonas gagaminai bag sitararag sibotouousai simama. Joseph on tafaror kaitamom amonai on taman aurin itou iroso. ¹¹On an rai Canaan sabu sites osi Atad nan sitotou on osi siyau, “Osi Egypt yangan on tou yababan gagamin bag seboai!” On fasinai Canaan sabu on efan wabin siyor Abel Mizraim.

¹²On mes Jacob nanatun mamaba ibifores on nanaba siyamai. ¹³Osi usin siyabar sinai Canaan tafanamai ato agim dogu Machpelah motobai nan Mamre bisinai sigarobai. Abraham on Ephron Hitt orot aurin on motob itobon gagarob efan mes. ¹⁴Joseph taman igarob isawar gibunai, on taitain tutuan a sabu on mat sinai taman sigagarob on mat simatabir men sinat au Egypt.

Joseph Taitain Tutuan Asi Bainonot Ikufaiwarai

¹⁵Osi tamas irabob gibunai, Joseph taitain tutuan siyau, “Ot ainau Joseph aurin komasin taiyamai inbinonotai mes on, ari weie wan inyoai.”

¹⁶On mes osi dura siyafar Joseph aurin ato siyau, “Weie tamam itrabob, on wei auri dura atonio nanaba ikakafun: ¹⁷On iyawurei dura atonio nanaba watawurem mes. ‘Joseph, karun, yau abifefeyanim om taitaim tutuam einotbures, yawas fetag siyamai a bobo komasin bag aurim sifour.’ Ato ari on wei tamam an God an agiroti, wei ba wabifefeyanim, karun, om wei einotburei.’ ” Joseph atonio dura itatam on iyababan itou.

¹⁸Namon Joseph taitain tutuan sinat on nanai sindas sirouen usos situr ato siyawur siyau, “Wei on om am agiroti.”

¹⁹Baise Joseph iyawures iyau, “Omi men wonaber mes, yau tou on men fofonin God an efanai anyeiniu mes. ²⁰Omi bubuniai woyanu yau wotikomasiu mes, baise God on komasin on iyabatabir obin imatar sabu sigaraba itiyawasis mes, ato on min imatar. ²¹Omi men aifan tani aurin wonaber mes. Yau arimon omi nanatum mat engon ankaifarem.” Joseph taitain tutuan dura ai ikufaiwaris ato moa obinai auris ikakafun nunuas ibo.

Joseph Irabob

²²Joseph on nana taman an dam warar mat Egypt simama, on an kwanda on 110 weie irabob. ²³On imama Ephraim nanatun a wawan sirat ites. On eb on imama natun Manasseh natun Makir nanatun iboes ikaifares sirat on nanatun mes. ²⁴Joseph taitain tutuan iyawures iyau, “Yau kafakai mom anarab, baise God on dura bag arimon inkaifarem a ininetwarim wongat wonan tafanam ato menan Abraham, Isaac a Jacob auris ibifaro on nan wongat.” ²⁵Namon Joseph on taitain tutuan ifefeyanis aurin sitifaro mes. On iyawures iyau, “Omi waumataniu ato woifaro, on an werai God ininetwarim on tafanam aurin wonnanan on, omi au rarik wonabo mat wonan.” ²⁶Joseph ima inai an kwanda 110 ato on Egypt nan irabob. Ato on an fio orot usin sibotitiwagai simutai ato rabobis asi didiwagai siwan.